

भाईदूज—

६८७

(आसावरी)

जसुमति थार साजि कै बैठी मोहन तिलक करावें हो ।
 बैठि अंक भोजन करौ लालन ! भाई—दूज मनावें हो ॥
 देखि नंद उपनंद गोप सब प्रमुदित मन हुलरावें हो ।
 श्रीमुख चंद निरखि गोपीजन नैननि कोर सिरावें हो ॥
 मुदित भई अति रोहिनी माता सुख अंतर उपजावें हो ।
 नाना भाँति सकल गोकुल—तिय मंगल गीतनि गावें हो ॥
 यह लीला अवगाहन कीजै जो चितबनि उर आवें हो ।
 'परमानंद' प्रभू श्रीवल्लभ—चरन—कृपा—बल पावें हो ॥

प्रबोधिनी—

६८८

(बिलावल)

आनंद आजु कुंज के द्वार ।

सखी सकल मिलि मंगलगावति नैननि निरखति नंददुलार
 नव नव बसन नवल नव भूषन पुहुप दाम सब सुभग सिंगार
 मंडप मधि बैठे मनमोहन संग लियें श्रीराधा नारि ॥
 दीपमालिका रचि चहुँ दिसि तें जगमगात अँग—जोति अपार ।
 बारि आरती जुगल—रूप पर 'परमानंददास' बलिहार ॥

६८९

(बिलावल)

आजु एकादसी देव—दिवारी तजि निद्रा उठि हो गिरिधारी
 सकल बिस्व कौ प्रबोध जु कीजै जागौ परम चतुर बनबारी
 सुभग मुहूरत भवन बधाई निरखत बदन परम रुचिकारी
 'परमानंददास' छबि उपजी बार—बार जाऊँ बलिहारी ॥

६९०

(बिलावल)

देव—दिवारी सुभ एकादसी हरि—प्रबोध तहाँ कीजै आजु ।
 तजि निद्रा उठौ हे गोविंद ! सकल विस्व—हित काजु ॥
 सुभ मुहूर्त भयौ भवन बधाई ठौर—ठौर गावतिं ब्रजनार
 'परमानंददास' कौ ठाकुर जगत—पतित—आधार ॥

६६१

(बिलावल)

देव जगावति जसोदा रानी बहु उपहार पूजा के करिकै ।
 इच्छु—दंड मंडप पुहुपनि कौ चौक चहूँ दिसि दीवा धरिकै ।
 ताल पखावज भेरी संख-धुनि गावत नित मिलि जागरन करिकै ।
 धूप—दीप करि भोग लगावति दै पुहुपावलि अँजुलि भरिकै ॥
 घृत—पकवान अरु प्रीति परम रुचि बिजन सिगरे सुथरे तरिकै ॥
 'परमानंद' जगदीस बिराजौ गोकुलनाथ सुमिरि पद हरिकै ॥

६६२

(नायकी)

जागे जगजीवन जगनाइक ।
 कीयौ प्रबोध देव गन जब ही उठे जगत सुख दाइक ॥
 या प्रभु की प्रभुताई भारी सिव ब्रह्मादिक पाइक ।
 कमला दासी पाँइ पलोटै निपुन निगम से गाइक ॥
 जहँ—जहँ भीर परति भक्तनि कौ तहँ—तहँ होत सहाइक ।
 'परमानंद' प्रभु भक्त-बच्छल हरि जिनिके मन-वच-काइक ॥

20. रास

मान—

दूती वचन, श्रीस्वामिनी प्रति—

६६३

(टोडी)

हरि कौ भलौ मनाइये ।
 मान छाँडि उठि चंद्र—बदनी ! उहाँ लौं चलि आइये ॥
 निबिड कदंब छाँह तहाँ सीतल किसलय सेज बिछाइये ।
 एकौ घरी जु ता बिनु रहिये सो कत वृथा गँवाइये ॥
 दान नेमु ब्रत सोई^१ कीजै जिहि गोपाल पति पाइये ।
 'परमानंद' स्वामी सौं मिलि कै मानज^२ दुख बिसराइये

६६४

(आसावरी)

कमलनयन बोलत रूप—निधान ।
 बेगि चलहि राधिका मुगध-मनि ! उदय करनि चाहत सखि ! भान

१. तहाँ लगु (क), २. मानस (क)

सुनहि कृसोदरि ! निसा कृसा भई कृस न भयो तेरौ इहि मान
प्राची दिसि बर अरुन देखियत तै न दियौ अनुराग कौ दान ॥
चरनायुध बर बोलनि लागे तैं नहिं मौन तजी मतिमूढ !
फिर पाछे पछितैहै मिलनि कौ नंद-कुँवर नागर गुन-गूढ ॥
इतनी बात सुनी जब स्रवननि गहि दूती के चरन अरु बाँह ।
'परमानंद' स्वामी पै लै चलि जो बोली प्यारे निज नाह ॥

६६५

(सारंग)

राधे ! तैं लोचन दूत किए ।

नंद भवन तें मोहन माधौ सैन बुलाइ लिए ॥
ब्रस तैं निकसि गवन कियौ बन कौ अतिसे चतुर हिए
कुंज-कुटी में पैठि स्यामघन उर पंर उरज दिए ॥
कमलनयन मृगनैनि परस्पर हिलि-मिलि अधर पिए ।
'परमानंद' सफल दिन मान्यौ कहत हैं हम जु जिए ॥

६६६

(सारंग)

चितवनि प्रीति की पहिचानी ।

मारग मिले राधिका नागरि घूँघट में मुसिकानी ॥
ठाढे द्वार नंद जू के ढोटा दीनी गुपत निसानी ।
बेगि चलहु उठि गहरु करति कत दूती रही रिसानी ॥
भाग्य आपुने भाँवतौ पायौ नैननि माँझ समानी ।
'परमानंद' स्वामी मनमोहन तेरीये मिलनि हितानी ॥

६६७

(सारंग)

बैठे लाल कालिंदी के तीरा ।

लै राधे ! मोहन^१ पठयो है इहै प्रसाद कौ बीरा ॥
सुनि री ! समाचार श्रीमुख के जे कहे स्याम-सरीरा ।
तेरे काजै चुनि राखे हैं जे निर्मालक हीरा ॥
सुंदरस्याम कमलदल लोचन पहिरि पीतांबर चीरा ।
'परमानंददास' कौ^२ ठाकुर नैन-लोल मति-धीरा ॥

१. गिरिधर (क)

२. की जीवनि (घ.)

६६८

(सारंग)

तू हि मनाइ लेहि लाल प्यारौ ।
 रुठि रहे ब्रजनाथ राधिका कीजै चित्त सवारौ ॥
 तुम्हारौ उनकौ एक प्रान है सो कत करति निन्यारौ ।
 बिछुरि गएँ ज्यों बहुरि चाहिये सुनिये मतौ हमारौ ॥
 तू जिनि जानहु जाति ग्वाल है गोधन कौ रखवारौ ।
 'परमानंददास' कौ ठाकुर तहाँ गरबु नहिं गारौ ॥

६६६

(सारंग)

मोहन मुख देखनि आउ री !
 जहाँ स्यामसुंदर खेलत हैं अबहि मिलनि कौ दाउ री ॥
 सघन निकुंज बहुत दुम फूले बिधि निरमी इहि ठाँउ री
 नौतन दल लै कर परसत हैं नीकौ कियो है बनाउ री ॥
 दूती-बचन कहत सुख लागत धाइ गहे तब पाँउ री ।
 'परमानंद' प्रभु दरसन दैहैं आनंद-मंगल गाउ री ॥

७००

(सारंग)

मान तौ तासों कीजै जोऽब होइ मन बिखई ।
 मोहन कमल-नयन की महिमा कै बिरियाँ तुम्हें सिखई ॥
 उठि चलि बेगि गहरु कत लावति निसा जाति है खूटी ।
 उडुपति ज्योति मलिन भई भामिनि ! अरु पीरी पहुँ फूटी
 दूती वचन कहे जब सनमुख मन में ग्वालि मुसिकानी ।
 'परमानंद' स्वामी की प्यारी रबकि कंठ लपटानी ॥

७०१

(सारंग)

नंदलाल की बंदसि नीकी ।
 देखत बदन-ज्योति अति नीकी
 जाके रूप काम^१ द्युति फीकी ॥
 चितवनि नीकी बोलनि नीकी
 गावनि नीकी गति-मति नीकी ।
 सब विधि नीकी कमल-नयन की
 तैसीये हँसनि हरनि मन पी की ॥
 कौन कौन अँग करौ री ! निरूपन
 सरद-चंद सीतलता तन की ।

मिलहि राधिके ! प्रेम-रस-सागर

'परमानंद' स्वामी के मन की ॥

७०२

(सारंग)

सुनतहिं जिय धरि मुरि मुसिकानी ।

को^१ है स्याम कौन कौ ढोटा अनगढ छोली बानी ॥

कछु अनुराग हृदै कौ जनायौ अलकलडी मति ठानी ।

लै स्यामता नयन मँहि राखी कज्जल^२ रेख सयानी ॥

जिय की बात न प्रगट जनावति चौप रहति क्यों छानी ॥

'परमानंद' प्यारी विचित्र मति मुख रूखी हिय मानी ॥

७०३

(सारंग)

राधा ! माधौ कुंज बुलावै ।

सुनि सुंदरि ! मुरलिका धारें तेरौ नाँउ लै-लै गावै ॥

कौन सुकृत फल तेरौ माई ! बदन-सुधाकर भावै ।

कमला कौ पति पावन लीला लोचन प्रगट दिखावै ॥

अब चलि मुगध बिलंबु न कीजै चरन-कमल-रस लीजै

ऐसी प्रीति करै जो भामिनि ताकों सरबसु दीजै ॥

सरस-निसा सखि पूरन चंदा खेलु बनैगौ माई !

या सुख की परिमिति 'परमानंद' मो पें बरनी न जाई ॥

७०४

(सारंग)

चलहि किनि देखनि कुंज-कुटी ।

सुंदरस्याम मदनमोहन जहाँ मनमथ-फौज लुटी ॥

सुरत सौर में लरत सखी की मुगता-माल टुटी ।

उरज-तेज कंचुकि चुरकट भई कटि पट ग्रंथि छुटी ॥

चतुर-सिरोमनि सूर नंदसुत लीनी अधर-घुटी ।

'परमानंद' ग्वालनि गोविन्द-सँग नीकी जोट जुटी ॥

७०५

(सारंग)

चलि री^३ ! मदनगोपाल बुलावै ।

तेरौ ई नाँउ लै-लै बेनु बजावै ॥

१. कौन स्याम नंदसुत कैसौ (ख के अतिरिक्त)

२. अंजन (ख) के अतिरिक्त, ३. सखि ! (क).

इहि संकेत बघौ बन महियाँ ।

सघन^१ कदंब मनोहर छहियाँ ॥

मिलत परम सुख अद्भुत लीला ।

'परमानंद' प्रभु भावन-लीला ॥

७०६

(सारंग)

चलि लै मिलऊँ मदनगोपालहि^२ ।

भले ठौर बैठे मेरे^३ मोहन कूजत बेनु-रसालहि ॥

चतुर सखी मोहन^४ जू की पठई सिखवति है ब्रज-बालहि

मानि मनायौ पाँइ लागति हौं और बात जिनि चालहि ॥

माता-पिता बंधु जे गुरु-जन लाज छाँडि भजि लालहि ।

'परमानंद' प्रभु भलौ मानि है चितु दै बा बनमालहि ॥

७०७

(सारंग)

चलि री ग्वालि ! तोहि बोलत हरे ।

एते जतन आवति नांहिन कौन दूती तेरे कान भरे ॥

हौं पठई मनुहारि बहुत करि तेरे कारन कुंज खरे ।

ऐसी कृपा प्रीति मैं देखी ना जानौं कौन गुन हृदै धरे ॥

वे कमला-पति मोहन ठाकुर कहाऽब तुम्हारे गरें परे ।

'परमानंद' प्रभु सरबसु दाता जाहि के भाग ताहि कें ढरे ॥

७०८

(सारंग)

चलि सखि ! कुंज गोपाल जहाँ ।

तेरी सपत^५ जहाँ मनमोहन हौं लै जाऊँ तहाँ ॥

नीके कुसुम मंद मलयानिल तरु कदंब की छाँहि ।

तहाँ निवास कियौ नंदनंदन मन तेरे तन माँहि ॥

ऐसी बात सुनत री^६ भामिनि ! तोहि रद्यौ क्यों भावै ।

'परमानंद' स्वामी कौ^७ संगम भाग बडे तै पावै ॥

१. कुंज-कुटी अरु सीतल० (छ०)

२. गोपालै (ड छ.)-इसी प्रकार अन्य तुकांत-

रसालै। बालै। चालै। लालै। मालै। ३. मन (ग.ड. च) नंदनंदन (घ)

४. गिरिधर जू (क) माधौ जू (ग. से छ.)

५. सौंह, सौंह नंदनंदन पै (बं. १०८।२१)

६. ब्रज-सुंदरि !, ७. मनमोहन (बं. १०८।२१)

७०६

(सारंग)

छाँडि न देति झूठौ अति अभिमान ।
 मिलि रस—रीति प्रीति करि हरि सौं सुंदर है भगवान ॥
 इहि जोवन धन दिवस चारि कौ पलटत रंग सौ पान ।
 बहुरि कहाँ इहि अवसर मिलि है गोप—भेष कौ ठान ॥
 बार बार दूति का सिखावै करहि अधर—रस पान ॥
 'परमानंद' स्वामी सुख—सागर सब गुन रूप—निधान ॥

७१०

(सारंग)

मानि री ! मानि मेरौ कह्यौ ।
 मोहन^१ मदनगोपाल मिले बिनु अंत तऊ परि है न रह्यौ
 प्रथम हेमंत मास—व्रत आचरि कत जमुना—जल—सीत सह्यौ
 नंदगोप—सुत माँगि भलौ बरु भाग्य आपुने तैं जु लह्यौ
 जो हरि पठई तौ हौं आई पानि पानि ब्रजनाथ गह्यौ ।
 'परमानंद' प्रभु प्रीति मानि है इहि रस जात अकाथ बह्यौ

७११

(सारंग)

तू को री^२ ! हौं । हरि की दूती ।
 अति आसक्त रसिक नंदनंदन राधा रैनि जगाई सूती ॥
 अपने हाथ सयन—रचना रचि राखी है उहि सेज अछूती ।
 मोसौं व्यौरि कह्यौ रति—नाइक प्रथम समागम तैं सुनि ऊती
 गहे चरन उठि चली री ! मुदित है पिय संकेत सुरत रस—भूती ।
 'परमानंद' प्रभु दै आलिंगन प्रगट्यौ रूप चतुर धन दूती

७१२

(सारंग)

इतराइ चली थोरे पानी ज्यौं भादों की नरिया ।
 कमलनयन सौं मानु करति है अब माई ! तेरौ बरिया
 हौं बाबरी मनावनि आई हरि पठई पगु धरिया ।
 जानि महातमु नंद—सुवन कौ चरन—कमल उर धरिया ॥
 इहि जोवन धन सदा रमा कौ अधिक रूप गुन भरिया ।
 'परमानंद' स्वामी गुन—सुंदर पूरन—आनंद—दरिया ॥

१. मदनगोपाल लाल गिरिधर बिनु (बं. १३०/१९)

२. है (क.)

७१३

(सारंग)

कत तू करति प्रेम-रस-बाधा ।

नवरँग गिरिधर^१ लाल लाडिलौ नई दुलहिया राधा ॥
 सुनि इहि बात भली जो लागै आइ बनी है जोरी ।
 मरकत मनि कंचन मनु नवघन लाल स्याम तू गोरी ॥
 पहिली कथा फुनि-फुनि सुमिरौंगी पाँइ परे लट छोरी ।
 'परमानंद' स्वामी सौं जो रस सो कत डारति तोरी ॥

७१४

(सारंग)

तेरी बाट हरि अबलौं चाही ।

काहे कौं बिलंबु कियौ तैं राही ॥

किसलय-सैन रची हरि कानन ।

तोसौं प्रीति बढी चंद्रानन ॥

चलि उठि मुगध ! कान्ह के पासा ।

'परमानंद' प्रभु पूरन आसा ॥

७१५

(सारंग)

राधा री ! तू मदन-कला ।

देखत रूप चिहुटि चित लाग्यौ परम रसिक नंदनंद लाला ॥
 बार-बार हरि चाह करत हैं जहाँ निकुंज-निवास भला ।
 जमुना-पुलिन^२ समीर सुसीतल मगु जोवै लागै लागै न पला ॥
 रति बसंत रति-नाइक राजा भमर-निचय कूजित कोकिला
 'परमानंद' स्वामी के संगम हिलत-मिलत सुभग चंचला ॥

७१६

(सारंग)

सुनि राधा ! एक बात भली ।

तू जिनि डरै रैनि अँधियारी मेरे पाछै आउ चली ॥

तहाँ लै जाऊँ जहाँ मन-मोहन मैं देखी इक बंक गली ।

सघन^३ निकुंज सेज कुसुमनि रचि भूतल आछी बिटप-तली

हरि की कृपा कौ मोहि बहुत भरोसौ

प्रेम-चतुर चित करत अली ।

'परमानंद' स्वामी कौं मिलि किनि

मित्र-उदै जैसें कमल-कली ॥

१. दूलह (ग), २. तौर (घ)

३. कुंद कुसुम-कमलनि सिज्जा रची तापै विछाई विटप-तली ।

७१७

(सारंग)

प्यारी ! तू न करि गहरु कंचुकी कसत ।
 बेगि चलहि उठि बिलंबु करहि जिनि
 सुनि राधे ! नभ-उडुप खसत ॥
 अपनौ नेम ब्रत तू छाँडहि
 कहा भयौ जो लोक हँसत ।
 मन क्रम वचन सपथ चरननि की
 हरि के प्रान तुव माँझ बसत ॥
 जोवत पंथ अकेले मोहन कुंडल चारु कपोल लसत ।
 'परमानंद' प्रभु प्रीति जु मानत मरकत मानौं कनक कसत ॥

७१८

(सारंग)

ऐसी मैं देखी तन की ईहा ।
 अधर पीयूष पियावत काहे न
 तोकों भयो मदनगोपाल पपीहा ॥
 बार-बार मुख नाँउ उचारै ।
 सुनि राधे ! तव रूप विचारै ॥
 सुहथ कुसुम लै रचि सुख-साई ।
 बेगि चलहु ब्रजनाथ बुलाई ॥
 'परमानंद' प्रभु मारगु चाहै ।
 परै चटपटी रतिपति दाहै ॥

७१९

(सारंग)

सखि ! ऐसौ रसु कहाँ पाइबौ ।
 को ऐसौ प्रीतम को सुंदर अंग-संग मिलि गाइवौ ॥
 मोहन नयन नासिका मोहन मोहन सुभग कपोल ।
 मोहन बदन कमल-नयन कौ मधुमिव मीठे बोल ॥
 मोहन अंग अनंग कोटि द्युति मोहन अंबर-पीत ।
 मोहन सकल सिंगार कान्ह के मोहन मुरली-गीत ॥
 मोहन चाल स्यामसुंदर की मोहन बाहु बिसाल ।
 'परमानंददास' मनमोहन भृगु-पद बनि बनमाल ॥

७२०

(सारंग)

मो सौं तू काहे कौं लरति ।
 बार-बार तेरे हित कारन पाइँनु परति ॥
 अबहि तो^१ लोचन डबडबाइ जल उमगि भरति ।
 तब जानैगी नंदलाल सौं एतौ^२ मानु करति ॥
 अबहि चपल चलि बेगि चतुर पै कतइ बंक ढरति ।
 'परमानंद' मोहन बिनु देखे सु को तन-तापु हरति ॥

७२१

(सारंग)

तरनि-तनया के तीर गोपाल बजाबत हैं बाँसुरी ।
 चलि राधे ! जु सुकृत-फल पूजिहै अब मिलिबे कौ गौँसुरी
 पहरि लेहि सोने के तरिका रतन-जटित कौ हाँसुरी ।
 माँग सँवारि नयन कज्जर दै नवल प्रीति करि फाँसु री !
 वे गोपाल मन-मोहन मूरति है कमला तेरौ आसु री !
 'परमानंद' प्रभु खेल्यौ चाहत रितु बसंत मधु मासु री !

७२२

(सारंग)

तो तें लाल कनाबडे ।
 मानि मनायौ सारँग-नैनी देहि नवल दल-पाँवडे ॥
 सौँह सपत करि मेरे आगै जो हौं पीउहि जानों ।
 'परमानंद' प्रभु माथे हाथ दियौ प्रान-तुल्य वे मानों ॥

७२३

(सारंग)

जैसी प्रीति गोपाललाल कें तैसी नाहिंन तेरें ।
 सुनि री ग्वालि ! मही की माती जाति सुभाव अनेरें ॥
 इहि रसु सो जानें जो नागरि राजकुँवारि सयानी ।
 ताकी कहा कसौटी कीजें कंचन बारह बानी ॥
 केतकु समुझाई ये नागरि नंद-कुँवरु^३ है देवा ।
 'परमानंद' स्वामी सौं मिलिये मानौं श्रीपति-सेवा ॥

७२४

(सारंग)

राधे ! हरि तेरौ बदनु सराह्यो ।
 बाबा^४ की सौं हौं जानति हौं इहै ध्यान अबगाह्यो ॥

१. तू (क. ग.), २. इतनौ (क. ग. घ. ङ. छ.)

३. नंदन (क.), ४. बार बार सुनि सारँग-नैनी इहै० (घ.)

लै दर्पन अपनौ मुख देख्यौ निरखि^३ नैन मुसिकाने ।
इहि^४ मैं समुझी सारँग—नैनी तेरे ई हाथ बिकाने ॥
करत प्रसंसा बार—बार हरि मोही तैं अति नीकी ।
'परमानंद' प्रभु खेल्यौ चाहत परम भाँवती जी की ॥

७२५

(सारंग)

कान्ह अकेले ई सोवत ।
सपने तेरौ मुख देखत^१ तब उठि मारग जोवत ॥
सीतल छाँह कदम की बैठे तेरौ ई रूप विचारत ।
कबहुँक मौन करि^२ रहत ध्यान धरि कबहुँक द्रिष्टि उपारत ॥
नव पल्लव सुमन कदम—दल रचि—रुचि सेज सँवारत ।
'परमानंद' प्रभु तेरे हि कारन अति संचित हरि आरत ॥

७२६

(सारंग)

काहे को करति री ! निसा—गवनु ।
तेरौ बदन देखि री राधा ! अति लजात है रोहनी—रवनु
दिवस चलति जब अपनी सखी सँग
सकुचत मराल हरिनी बन छाँडति ।
मृगपति अपनी कटि अवलोकत
सब सौँ बैरु कहाँ लौँ माँडति ॥
इहि सरीर तेरौ रचि बिधाता सुहथ सँवारि गोपालहि दीनौ
'परमानंद' प्रभु तेरे हि कारन इहि अवतार केलि—रस कीनौ

७२७

(सारंग)

काहे को ग्वालि ! सिंगार बनावै ।
सादी ये बात गोपाल हि भावै ॥
एक प्रीति तैं सब गुन नीके ।
बिनु गुन अभरन सब ही फीके ॥
कनकहि नूपुर लेहि उतारी ।
पहिले बसन पहिरि ब्रजनारी ॥
हरि नागर सब ही की जानै ।
'परमानंद' प्रभु हित की मानै ॥

१. नैन मूँदि (घ.), २. बाबा को सौँ इहि जानति हों (घ.)
३. निरखत (च.), ४. है (ग. से छ.)

७२८

(सारंग)

तोहि मनाबत हौं हारी ।

सरबसु जात गरब के घालें बिरचे मदन—मुरारी ॥
 नील निचोल पहरि तू भामिनि ! नूपुर लेहि उतारी ।
 तैसे चलि ज्यों कोऊ न जानै ससि—बिनु रैनि अँध्यारी ॥
 तू ही बिचारि देखि अंतरगति कत इहि माँग सँवारी ।
 सो ही करहु जैसे नंदकुमार हि लागहु अधिक प्यारी ॥
 सुनि राधा ! बाधा कत कीजै चतुर मुगध तू नारी ।
 'परमानंद' प्रभु मिलत प्रेम—रस अपनौ भर्यौ न ढारी ॥

७२९

(सारंग)

मनावत हारि परी री माई !

तू चट तैं मठ होति न सुंदरि ! कत हरि लैनि पठाई ॥
 राजकुमारि होइ तौ जानें कै गुरु होई पढाई ।
 नंदनंदन कौ जानि महातमु अपनी राखै बडाई ॥
 ठोडी हाथ चली दै दूती तिरछी भौहें चढाई ।
 'परमानंद' प्रभु करौं दुलहिनी तौ बाबा की जाई ॥

७३०

(कल्यान)

सिखवत केती राति गई ।

चंद्र उदै बर दीसनि लाग्यौ तू नहिं और भई ॥
 सुनि हो मुगध ! कह्यौ नहिं मानति जामी हृदई ।
 'परमानंद' प्रभु कौं नहिं मिलती तौ प्रतिकूल दई ॥

७३१

(कल्यान)

तेरौ ज्यौ बसत गोविंदे पहियाँ ।

हौं^१ जु कहति हों काहे कों दुरावति
 जानति हौं परखति पर छहियाँ ॥
 द्विष्टि सुभाव बिचारति सुंदरि
 वह^३ ई तक लागी मन महियाँ ।
 'परमानंद' स्वामी की प्यारी
 आउऽब^४ आउ चली गहि बहियाँ ॥

१. करोंगी दुलहैया, २. काहे कों दुराव करति है री ! मोसों (बं. १३०/१)

३. सो जकि लागि रही (बं. १३०/१), ४. हाव-भाव दै चली (बं. १३०/१)

७३२

(कानरौ)

या हरि तें औरु कौन बडैतौ ।

देव—सिरोमनि राज—सिरोमनि कुँवर—सिरोमनि नंद—लडैतौ ।।
 सुनि राधा बाधा तजि^१ मन^२ की लै मिलऊँ तेरौ मान चडैतौ
 'परमानंद' स्वामी सुख—सागर रति—नागर ब्रज—ताप —हरैतौ ।।

७३३

(कानरौ)

मानिनि ! एतौ मानु न कीजै ।

इहि जोबन अंजुरि कौ जल ज्यों जब गोपाल माँगै तब दीजै
 निसि—दिन घटी—बढी नहिं सुंदरि ! जैसे कला चंद्र की छीजै
 पूरब^३ पुन्य सुकृत फल तेरौ काहे न रूप नैन भरि पीजै ।।
 चरन—कमल की सपथ करति हौं ऐसौ जीवन दिन दस जीजै
 'परमानंद' स्वामी सों मिलि कें अपनौ जनम सफल करि लीजै ।।

७३४

(केदारौ)

तेरी सों कै अपने बाबा की सों मेरे मदनगोपाल पियारे
 नंदके लाल हृदो मेरौ बेध्यो लागे है मनसिज—बान अनियारे
 निसि अँधियारी कछुवै न सूझत अरुन बसन तेरे देखियत कारे ।
 'परमानंद' स्वामी लै मिलऊँ ज्यों नहिं जानै नभ के तारे•

७३५

(केदारौ)

सूधे मन मिलि रसिक—सुजानै ।

नंदकुमार अटपटौ नागर छाँडि ग्वालि ! तू अपनी बानै
 सुंदरता की सीव साँवरौ सुख—निधान सब गुन की खानै
 बहु—नाइक बल—रासि देव—मनि कृपासिंधु सबही की मानै
 इहि जोवन धन दिवस चारि कौ ताकौ गरबु न करि री ग्वारि !
 'परमानंद' स्वामी कौ मिलि अब देखि कमल—मुख नयन पसारि ।।

७३६

(केदारौ)

मोहन—मुख की सुनहु द्वै बतियाँ ।

बिनती करि हरि हित चित की सब

जो कछु कहि जनाई अधरतियाँ ।।

१. कत कीजै (ड. छ.), २. जिय (घ.), ३. पूरन (घ)

• कुंभनदास' की छाप से भी मिलता है (ब १३०/१)

नव घन प्रगट सुभट संबर—अरि^१
 नृप—आसन बैठौ करि खतिया^२ ।
 कुसुम विसिख सर—चाप लिये कर
 इंदु—किरनि सोभित पंकतियाँ ॥
 चमर ढार मारुत बह्यो गुन—निधि
 बरुहा नट नृत्तत अनुभतियाँ ।
 कुंज—वितान गान अलि कुलकत
 जस गावत पिक कीर अनतियाँ ॥
 तव कुच—कोट ओट दुस्यो चाहत
 मदनमोहन पिय की ए गतियाँ ।
 'परमानंद' स्वामी कों जितवहि
 सुजस प्रगट करि मनसिज—हतियाँ ॥

७३७

(केदारौ)

देखि सखी ! मोहन—मुख नीकौ ।
 मोरचंद फरहरात सीस पर तैसै ही बन्यो है अर्द्ध—बिधु—टीकौ
 रूप—रासि गिरिधरन छबीलौ पायो तैं परम भावतौ जी कौ
 'परमानंद' रसिक नंदनदंन भाग बडौ वृषभानु—नंदिनी^३ कौ

७३८

(केदारौ)

उठि काहे न मोहन—मुख जोवै !
 बिनु देखें गिरिधरन छबीलौ ऐसी घरी वृथा कत खोवै
 इहि जोवन अंजुलि कौ जल ज्यों
 बिनु ब्रज—नाथ वृथा छीजै री ।
 विद्यमान अपने इन नैननि वह मुख—कमल देखि जीजै री !
 मेरे कहे तजि मान लाडिली ! काहेकौं करति सखी अनभायौ
 'परमानंददास' कौ ठाकुर तजि बैकुंठ खेलनि ब्रज आयौ

७३९

(केदारौ)

राधे ! तू देखि बन के चैन ।
 भृंग कोकिल शब्द सुनि करि प्रगट प्रमुदित मैं ॥

१. रिपु (ग.), २. घतियाँ (ग)

३. तनी कौ (ग. घ.)

कमल कुमुद—सुगंध सीतल भामिनी सुख—सैन ।
 इहै पुन्य अगाध कौ फल तू जु बिलसति ऐन ॥
 लाल गिरिधर मिल्यौ चाहत मधुर मनोहर बैन ।
 'दास परमानंद' प्रभु हरि चारु पंकज नैन ॥

७४०

(कानरौ)

हरि की आनंद केलि ।

मदनगोपाल निकट करि पाए ज्यों भावै त्यों खेलि ॥
 स्यामसुंदर की भुजा मनोहर अपने कंठ लै मेलि ।
 प्रेम—मगन अरु सावधान है छूटे^१ बार सकेलि ॥
 स्याम—तमाल नंद कौ नंदन तू जु कनक की बेलि ।
 इहि लपटानि 'दास परमानंद' मुगति पाँइ गहि ठेलि ॥

७४१

(केदारौ)

आजु सखी ! मोहन इहि कुंज ।

जुव जन तन मन करि न्योछावरि सुनि मुरुली की गुंज ॥
 तैं रहि इहाँ कहा कियौ बावरी ! तजि सुख परम निधान
 देखि बिलास जानती तब तुम इहै प्रवीन सुजान ॥
 एक सुकाज होत अति तेरौ मोपें कहत न आवै ।
 सुनि दुख प्रबल होइ चित—अंतर जिय तैं तनु बिसरावै
 हा हा सखी ! कहों पाँइ लागों बिनहि सुनें अब मरिये
 सुनि करि मन उपचार बनै कछु तिहि बिधि जतन सुकरिये
 उर अति गोप्य गोप्य गोप्य हु तैं, गोप्य भाव धरि कहिये
 जो^२ तू चतुर सयानी नागरि ! समुझि सैन मन गहिये ॥
 मारुत—सुत—पति उद्यम जानि करि ता रिपु मध्य निवासै ।
 ता उर बसि दुहुँ बिधि सजनी ! भूलि हू तोहि न त्रासै ॥
 समुझि सैन उठि चली बिचच्छन जहाँ रास—रस वृंद ।
 देखत रूप भयौ मनु औरै पूरन 'परमानंद' ॥

१. छूटी अलक

२. या ब्रज में तू ही बडभागिनि कह्यौ बचन निरबहिये (बं. १३०/१९)

जो तू समयी और न पावै समुझि समुझि मन गहिये (बं. १६५/१६६)

७४२

(आसवरी)

सुनि मेरौ बचन छबीली^१ राधा !
 तैं पायौ रस-सिंधु अगाधा ॥
 जे रस निगम नेति-नेति भाख्यौ ।
 ता कौ तैं^२ अधरामृत चाख्यौ ॥
 सिव विरंचि के ध्यान न आवै ।
 ताकौ^३ कुंजनि कुसुम बिनावै ॥
 तू वृषभानु गोप की बेटी ।
 मोहनलाल भाँवते भेटी ॥
 तेरौ भाग्य मोहि कहत न आवै ।
 कछु एक रस 'परमानंद' गावै ॥

७४३

(केदारी)

तो सी त्रिया नाहिन भुवन भटू री ।
 रूप-रासि गुन^४ -रासि रसिक-मनि जाहि भए नंदलाल लटू री !
 यौं कर सुदृढ करि गाँठि दई बिधि सुरंग चूनरी पीत-पटूरी
 'परमानंद' स्वामी रति-नाइक तू नागरि वे नागर-नटू री •

७४४

(सारंग)

कैसैं माई ! रूसिवौ बनै ।
 नंदनंदन की बहुत सखिनि में मो सी कौन गिनै ॥
 तुम जु कहति हौ बात अटपटी राखौ अपनौ सयान ।
 मन क्रम वचन लाल गिरिधर सौं तजै बनै अभिमान ॥
 चतुराई ता आगें कीजै जो प्रभु होइ अग्यान ।
 जा पर प्रीति 'दास परमानंद' सहि^५ रहिये जु गुमान ॥

७४५

(केदारी)

राधा ! माधौ कौ मुख नीकौ ।
 देखि नयन भरि मोहन मूरति मिल्यौ भाँवतौं जीकौ ॥

१. लडैती (ग), २. अधर-सुधा-रस (ग.)

३. तापें (ग. ऊ. छ)

४. रस

• 'कृष्णदास' की छाप से भी (बं. २३/१ तथा ७०/२)

५. हँसि रहिये गुन मान

सघन निकुंज—कुंज द्रुम—बल्ली^१ ठौर भलौ तैं पायौ ।
तेरी चौप प्रीति मैं जानी आनि समीप बसायौ ॥
अब जिनि टरनि देहु तुम ह्यौ तैं जो भावै सो कीजै
'परमानंददास कौ ठाकुर सरबसु दै रसु लीजै ॥

७४६

(गौरी)

स्याम जू की देखिबे की बार ।
चलि सखि ! दौरि देखि आई हौं ठाडे निकसि दुबार ॥
मंद माधुरी छाँडि चलन सखि ! काहे करति झमार ।
फुनि अब ही भीतर उठि—जैहैं मोहन नंद—कुमार ॥
सिर पर खौरि लाल उपरैना हाथ कुसुम की डार ।
'परमानंद' गिरिधरन लाल पर बारों कोटिक मार ॥

७४७

(गौरी)

राधे ! बोलत नंदकिसोर ।
ललित त्रिभंगी स्यामसुंदर निर्तत^२ ज्यों बन मोर ॥
छिनु—छिनु बिलंबु करति है सुंदरि ! क्योंऽब रहति मन तोर
आनंदकंद चंद—वृंदावन तू करि नैन—चकोर ॥
कहा कहौं तेरे भाग की महिमा आपु न गनत न और
'परमानंद' प्रभु पै चलि भामिनि ! लै मिलि उरज^३ अँकोर

७४८

(सारंग)

चलि तू मदनगोपाल बुलाई ।
छाडि बिलंबु मिलहु प्रीतम सों हठ में कौन बडाई ॥
वृंदावन में बंसीवट—तर बैठे कुँवर कन्हाई ।
नटवर—भेष धर्यौ सुर मोहति लीला बरनी न जाई ॥
तेरे काज आपु नंद—नंदन रचि—रुचि सेज बनाई ।
'परमानंद' स्वामी रति—नागर गति में गति दिखराई ॥

७४९

(सारंग)

तेरो नाँउ लै—लै गावै तू चलि भामिनि ! स्याम बोले ।
वे बैठे देखौ वृंदावन की सोभा ठौर—ठौर द्रुम फूले ॥
कोकिला—नाद मन आनंद भँवर बिहंगम भूले ।
नाना पच्छी सब्द—रासि रचि सकल बेलि केसू फूले ॥
उनमद जोवन—मद कोलाहल यहि औसर है नीकौ ।
'परमानंद' स्वामी प्रथम समागम मिल्यौ भँवतौ जी कौ ॥

१. बेली (ग.), २. नृत्त (घ), ३. प्रान (घ. ड)

७५०

(कान्हरी)

क्यों न मिलै मन दै मोहन कौ
 मान कहा गहि रही री भामिनी ।
 सुंदरस्याम बिना सुनि सजनी !
 वृथा बही सब जाति जामिनी ।
 मान किये तै कहा सचु पावति
 सोच बढावति हृदय कामिनी ।
 'परमानंद' प्रभु गिरिधर पै चलि
 प्रमुदित मन गजराज-गामिनी ॥

७५१

(श्री)

तरुन घनस्याम तन बसन वर दामिनी
 इन्द्र-धनु उदित मानौ बनमाला बनी ।
 गरजत मंद धुनि हरि गिरि सुंदरा
 भक्ति चात्रक कुमुदिनी प्रीति मनी ॥
 नंदनंदन देखि विगत मानस-बिथा
 गोपिका-प्रेम-जल नदी बाढी ।
 'दास परमानंद' सिंधु जादौ राइ
 मिलहु अनुसरी रहि न गाढी ॥

दूती-वचन, प्रभु-प्रति-

७५२

(आसावरी)

इहि प्रसंग ऐसौ है माधौ ! मानवती मनाइये ।
 जो पैं तुम्हारे जिय भावत है तौ उहाँ लौं चलि आइये ॥
 कहा भयौ जो वह नहिं आई तुम्हारे लाड की गरबी ।
 अबला के जिय^१ मान महातमु तातैं ठानी अरबी ॥
 दूती बचन कहै जे सनमुख जो तैं कही सो मानी ।
 'परमानंद' स्वामी रति-नागर नीकी बात हि^२ जानी ॥

७५३

(सारंग)

अनमना बैठी ए रहै ।
 अंतरगत की बिथा मोहिनी काहू सौं न कहै ॥

सूख्यौ^१ बदन अधर कुम्हिलाने नैननि नीर बहै ।
 रजनी निंदा करत चंद्र की अलकावली^२ दहै ॥
 तुम्हारे बिरह बियोग राधा बासर-धाम सहै ।
 बेगि मिलहु 'परमानंद' स्वामी दूती बचन कहै ॥

७५३

(सारंग)

मुगध मनाए की चाहति बाट ।

चलहु गोपाल ! कृपा करि उहिं बन जहाँ गोधन के ठाट
 मेरे कहें वहै नहिं आवति करी बहुत मनुहारि ।
 तुम ही सौं जु है गुपत बतौवा जानत रसिक मुरारि ॥
 सो अभिमान-सस है बैठी मौन धरै नहिं बोलति ।
 कठिन सुभाव अहीर^३ की बेटी उहाँतें नाहिंन डोलति
 हँसि ब्रजनाथ कह्यो दूती सौं नाहिंन तेरे मान ।
 'परमानंद' प्रभु रसिक-सिरोमनि बैठि रहे भगवान ॥

७५४

(सारंग)

गोपाल ! मनाए की चाहति बाट ।

चलु ब्रजनाथ ! कृपा करि उहिं बन जहाँ गोधन के ठाट
 तुम जु कह्यो बचन हँसि बोले वा के मन है उचाट ।
 बिलख बदन चिंतातुर तब तैं मथति न गोरस-माट ॥
 दूती-बचन कहे जब सनमुख लगी प्रेम की साट ।
 'परमानंद' प्रभु रसिक-सिरोमनि लोचन काम-कपाट ॥

७५५

(सारंग)

संदेसौ राधिका कौ लीजै ।

तुम दुरि बैठे सघन कुंज मँहि ऐसौ खेलु न कीजै ॥
 आइ फिरि गई चाहि सब कानन चंद्र-बदनि सकुमारी ।
 रहे मौन धरि ताहि देखि^४ हरि कठिन काम-सर-मारी ॥
 बेगि चलहु हरि ! बिलंबु करत^५ कत वह कदंब-तर ठाढी
 'परमानंद' प्रभु तुम्हारे रूप सौं प्रीति निरंतर बाढी ॥

१. सूख्यौ (घ), २. किरनावली (ग. घ.),

३. अभीर (क. ड. छ.)

४. देखें (ख.), ५. करहु (ग. ड. छ.),

७५६

(बिलावल)

दधि-सुत-बदनी कोप-भरी ।

अंबर खीझि लेति ब्रज-बाला सारंग बाजु^१ लरी ।।
 तब नागरि पें इहि मति उपजी लै मनि हाथ धरी ।
 ग्रसित बेर भई नहिं बाला उनि तें चतुर खरी ।।
 धरनि चंप रस^२ जब आये उदयाचल जु डरी ।
 'परमानंद' प्रभु तरसन अति सुख सरनागत उबरी ।।

७५७

(सारंग)

बहुत रही समुझाइ मनायौ मानति नाहिं गोपाल ।
 आपुनि ही पाँउ धारि मनावहु गिरिधर गज-गति-चाल ।।
 प्रीति की रीति रँगिलौ जानें मान धर्यो नँदलाल ।
 'परमानंददास' कौ ठाकुर हठ छाँडहु ब्रज-बाल ।।

७५८

(सारंग)

यों रहे निसिदिन तेरे ही ध्यान मध्य आली तैं तो बस करि लीने ललना ।
 अति चतुर महा री ! ता तें तू प्रानप्यारी तो बिनु पिय कों परति न कलना ।।
 एक टक मगु जोवत हैं ठाढे नैन निमेषनि लागति पलना ।
 गिरिधरलाल पिय तो ही सौं प्रेम नेम काहू सौं कीनी है प्रीति अचल ना^३ ।।

मानापनोदन-

७५९

(सारंग)

कैसें बनें माई मानु करत ।

सखि ! अपमान तऊ मनमोहन पाइँनु परत ।।
 झुकि बोलत हँसि-हँसि मुख लागत आगें तें न टरत ।
 रोकत हू अनुसरत निहोरत उर-अंचर पकरत ।।
 सब सहि प्रीति सबाई मानत एकौ चितु न धरत ।
 'परमानंद' प्रभु रोस तजि इहाँ मनु उलटि धरत ।।

७६०

(सारंग)

तैं मेरो भाँवतौ न कीनों ।

सुनि इहि बात स्यामसुंदर की
 उर गहि गाढौ आलिंगन दीनों ।।

१. सौं जु, २. सदस, ३. इसमें छाप नहीं है।

बेनु बजाइ बुलाई राधा आई तहाँ जहाँ बंसीबट ।
इतनौ गहरु तैं कहाँ लगायौ मदनगोपाल गही लीला लट
ऐसी प्रीति परस्पर बाढी अति आसक्त भयौ सुंदर-चित ।
'परमानंद' प्रभु बिलगु न मानहु तुम कारन संच्यो जोवन-बित ॥

७६१

(सारंग)

स्यामा जू कौं स्याम मनाएँ ल्यावत ।

ज्यों-ज्यों सुंदरि^१ चलति हरें-हरें त्यों-त्यों पाछें आवत ॥
कछु जु लच्छनता रही है मानकी तातैं अधिक छबि पावत
मानहुँ मत्त मतंग-मते तैं डरपत रहत महावत ॥
कबहुक आगै कबहुक पाछै नैन सौं नैन मिलावत^२ ।
कबहुक पथ कौ तनक तनूका दूरि करन कहँ धावत ॥
अति^३ संकित मोहन उर-अंतर बानिक कछुक^४ बनावत ।
इहि^५ लीला-बिनोद गिरिधर कौ जन परमानंद' गावत ॥

७६२

(सारंग)

कमल-नयन राधिका हि मनावत ।

मृग-नैनी-मुख निरखि मनोहर नहियाँ में केतौ सचु पावत
इतनौ ई भेद प्रीति कौ लच्छन स्यामसुंदर अंतरगत भावत
एते मान मनायौ न मानति हँसति चतुर बलबाँह छिडावत
उठि जब चले चरन लपटानी भीत भए मुख बोल न आवत
काम-केलि अपने गिरधर^६ की प्रमुदित जन 'परमानंद' गावत ॥

७६३

(सारंग)

सुनि संकेत उठी हँसि प्यारी ।

छाँडि मान गुन मानि हरषि मन

चली चपल बुधि सौं छबि वारी ॥

यौं लिपटी पिय केलि सौं मानों

स्यामतमाल के निकट लता री ।

दोऊ पौढे कुसुम-सेज पर 'परमानंददास' बलिहारी ॥

१. कुवरि चलति हौरें हौरें, २. जुडावत

३. अतिसै संक मोहन अति आतुर, ४. बहुत (क. ग. च.)

५. परम रहसि गिरिधर-रस-लीला, ६. मोहन (ग. घ. ङ. छ.)

७६४

(सारंग)

आवत लाल अरी चलि माई !
छूटि जाइगी टेक रावरी करौ हो कृपा तैं नाच नचाई ॥
यह सुनि बचन चली पिय पै हँसि
ज्यों सरिता बाहर में धाई ।
दोरु मिलि पौढे सुखद सेज पै 'परमानंद' दास बलि जाई ॥

७६५

(सारंग)

यह सुनि वचन पिया पै आई ।
मिली धाइ अकुलाइ अंक भरि मानहुँ रंक महानिधि पाई
मिलि पौढे संकेत कुंज में नव कुसुमनि की सेज बनाई
'परमानंददास' कौ ठाकुर विविध केलि कीनी बनि भाई

७६६

(नायकी)

रुसे ही रहौंगी हौं तौ रुसे ही रहौंगी ।
जब गृह आवेंगे स्याममनोहर
तिनि सौं हू बाँके बचन कहौंगी ॥
जो वे मनावेंगे तो हौं नहीं मानौंगी मनमथ—बान सहौंगी
'परमानंददास' कौ ठाकुर वे परें पाँइ हौं तौ हठनि गहौंगी

रास—

७६७

(आसावरी)

•आजु नीकौ जम्यो राग आसावरी ।
मदनगोपाल बेनु नीकौ बाजे नाद सुनत भई बाबरी
कमलनयन सुंदर ब्रज—नाइक सब गुन—निपुन कथा है रावरी
सरिता थगित ठगे मृग पंछी^१
खेवट चकित चलति नहिं नाव री ॥
बछरा खीर पिबत थन छाँड्यौ^२
दंतनि तृन खडति नहिं गाव री ।
'परमानंद' प्रभु परम विनोदी इहै मुरुली—रस कौ प्रभाव री

• मोहन ! आजु नीकौ (क.) से भी प्रारंभ है ।

१. पंखी (क. ग. ड), २. छोख्यो (ग.ज.)

७६८

(गौरी)

आई हम पाँइनु परन ।

सोई करहु जैसे संग न छूटै राखहु (अपनी) सरन ।।
 जब तुम बेनु बजाइ बुलाई अब कैसें चतुराई ।
 तुम्हारौ भजन पाप कौ कंदन इहि तो निगम बताई ।।
 चलत नहीं जु चरनगति थाकी मन न चलै ब्रजवासा ।
 'परमानंद' प्रभु हौ^१ उदार तुम छाँडहु वचन उदासा ।।

७६९

(टोडी)

बन्यौ रास-मंडल में माधौ गति में गति उपजावै हो !
 कर कंकन झनकार मनोहर प्रमुदित बेनु बजावै हो !
 स्याम सुभग तन पर दच्छिन कर पूजत चरन-सरोजै हो
 अबला-वृंद अबलोकत हरि-मुख नयन-विकार मनोजै हो
 नील पीत पट चलत चारु नट रसना नूपुर कूजै हो !
 कनक कुंभ-कुच-बीच पसीना मानौं मोतिनि^२ पूजै हो !
 हेम-लता तमाल अबलंबित सीस-मल्लिका फूली हो !
 कुंचित केस-बीच अरुझाने जानौं अलि-माला भूली हो !
 सरद बिमल निसि चंद बिराजित क्रीडत जमुना-कूले हो
 'परमानंद' स्वामी कौतूहल देखत सुर-नर भूले हो !

७७०

(गौरी)

गोपाललाल सौं^३ नीके खेली ।

बिहल भई सँभार न तन की सुंदरि छूटे बाल सँकेली ।।
 टूटत हार कंचुकी फाटत फूटत चुरी खसत सिर-फूल ।
 बंदन मिटत सरस उर-चंदन देखत मदन महीपति भूल ।।
 बाहु-बंध परिरंभन चुंबन महा महोत्सव रास-बिलास ।
 सुर बिमान सब कौतुक भूले कृष्ण-केलि 'परमानंददास' ।।

१. होहु उदार तुम राखहु चरन-निवासा (क. घ. ड. च. छ.)

होहु उदार वित राखहु चरननि पासा (ग.)

२. मोतिन हर पूजै हो !

३. सँग (अ)

अन्तर्धान—

७७१

(सारंग)

अब कैं जो लाल मिलै अचरा गहि झगरौं री ।
 काहे तैं तुम छाँडि गए संग लागि डगरौं री ॥
 जुवतिनि कौ इहि सुभाव मान करत सोभा ।
 नागर नँदलाल कुँवर काहे चित-छोभा ॥
 बाँधौ कुच-भुजनि-बीच नैन-बान मारौं ।
 'परमानँद' प्रेम लरौं जीतौं कै हारौं ॥

७७२

(सारंग)

माई ! डार-डार पात-पात बूझति बनराजी ।
 हरि कौ पथ कोउ न कहै सबनि मौन साजी ॥
 बसुधा जड-रूप धर्यौ मुख हूँ न बोलै ।
 हरि कौ पद परसु भयौ संगु लागि डोलै ॥
 'परमानँद' स्वामी गोपाल नितुर भए माई ।
 हमारौ गुन-दोषु जानि कीनीं चतुराई ॥

७७३

(सारंग)

पूछति है खग-मृग द्रुम-बेली ।
 हमें तजि गए री ! गोपाल अकेली ॥
 अहो चंपक ! मालती ! तमाला ।
 तुम्हें सपरसि^१ गए नँदलाला ॥
 ज्यों गजराज बिना बन-करनी ।
 कृष्णसागर बिनु व्याकुल हरनी ॥
 'परमानँद' प्रभु मिलहु न आई ।
 तुम्हारे दरस बिनु हंस उडाई ॥

७७४

(सारंग)

ग्वालिनि ! अनमनी सी काहे ठाढी !
 दारुन पीर मदन^२ की बाढी मदनगोपाल अकेली छाँडी ॥
 तैं ही रसिकिनि ! रही सयानी जिहिं सनेह प्रभु बन लै आयौ
 नैंकु छुडाइ कछु कियौ माधौ सौं तुरतहि कियौ आपुनौ पायौ
 चलिरी सखी ! जाइ दूढें बन-बन चरनकमल के अंक निन्यारे
 ध्वजा बज्र अंकुस जब रेखा कहाँ दुरहिंगे कान्हर प्यारे ॥

१. परसि कहँ, २. बिरह

लोचन सजल प्रेम अति आतुर सूखे अधर चंद—मुख गौ^१ घटि ।
‘परमानंद’ बिरहिनी हरिकी पीउ—पीउ करति अनाथ रही लटि

७७५

(कानरौ)

•जिहि तें रस रहै रसिक—कुँवर सौं
सोई सयानी ! तुम्ह करहु बसीठी ।

इहि अपराधु परस्यौ अनजानत लाडकडी कछु बात उचीठी
काँधारोहनु माँगि सखी री ! नंदनँदन सों मैं कीनी ढीठी
जुवति—जाति दोस कौ भाजनु समुझति नहिं कछु करई^२—मीठी ॥
अब अभिमान करौं नहिं कबहूँ तेरे हाथ देऊँ लिखि चीठी
‘परमानंद’ प्रभु आनि मिलाबहु कमल—नयन की महिमा दीठी ॥

महारास—

७७६

(गौडी)

टूटि परी मोतिनि की माला ढूँढति फिरति सकल ग्वाली
मुकुलित कुसुम—माल कच बिगलित निरखि हँसे बनमाली
रास—बिलास गहँ कर—पल्लव इक—इक भुज ग्रीवाँ मेली ।
बिच—बिच गोपी इक—इक माधौ नृतत संग सहेली ॥
सरद विमल निसि चंद बिराजित नृतत नंदकिसोरा ।
‘परमानंद’ प्रभु बदन—सुधा—निधि भामिनि नैन—चकोरा ॥

७७७

(सारंग)

कर गहि अधर धरी मुरली ।
देखहु परमेसुर की लीला ब्रजबनितानि की मन—चुरली ॥
जाकौ नाद सुनत गृह छाँड्यो
प्रचुर भयौ तन मदन बली ।
जिनि सनेह सुत—पति बिसराए
हा हरि ! हा हरि ! करति चली ॥

१. ग्यौ (क)

• जा तें रस० से भी प्रारंभ है ।

२. करई

बिहँसित बदन प्रफुल्लित लोचन

रबि-उद्योत जनु कमल-कली ।

'परमानन्द' प्रीति पद-अंबुज कृष्ण-समागम बात भली ॥

७७८

(गौडौ)

बन्यो लालने^१ रसिक राधे ! सरद चाँदनि-राति ।

तत्त थेइ थेइ तत्त थेई करत गोपीनाथ ॥

इक-इक गोपी इक-इक माधौ बनी अनोपम भाँति ।

जै-जै सब्द करत सुर-मुनि-जन बरसत कुसुमनि जाति ॥

रथ टेकि ससि हारि रह्यौ सिर पर होत नहीं परभात ।

'दास परमानन्द' प्रभु हरि निरखि अनँग लजात ॥

७७९

(केदारौ)

आली री ! रास-मंडल-मध्य निरत^२ मदनमोहन

अधिक प्यारौ^३ लाडिली रूप-निधान ।

चरन-चाल हस्त-भेद मिलवत^४ आछी जति

भाँति सों लेत नैननि ही में मान ॥

दोऊ^५ मिलि राग अलापत गावत

होडाहोडी उघटित विकट तान ।

'परमानन्द' स्वामी^६ निरखि और रीझि रहीं

गोपी-जन वारति हैं निज तन मन प्रान ॥

७८०

(सारंग)

माधौ चाचरि खेलें ही खेलें री ! जमुना के तीर ।

रास-बिलासी चाचरि खेलें ही गोकुल-नाइक जमुना के तीर

कुमकुम-बरनी गोपिका केसौ री ! घनस्याम-सरीर ।

नील-पीत-पट-मंडिता नाँचत री ! वे प्रेम-गँभीर ॥

बीच-बीच गोपी बनी बिच-बिच री ! वे बने हैं मुरारि ।

मरकत-मनि कंचन-मनी माला हो ! मानों गुही है सँवारि ॥

१. तालिम (क.)

२. मंडित (ग.), ३. सोहत

४. निरतत आछी-आछी भाँति नैन-भाँ-विलास-मंदहास नैननि ही मान (बं. १२७/१०)

५. नाचत गावत दोऊ रीझि परस्पर उरप-तिरप मान लेत विकट (बं. १२७/१०)

६. प्रभु नवकिसोर निरखि-निरखि ललितादिक (बं. १२७/१०)

किंकिनी नूपुर बाजै ही सबदहि री ! कोलाहल केलि ।
 कुनित बेनु ब्रज^१—नाइका लटकत लाल भुजा गल मेलि ॥
 कर—तल ताल बजावें ही गावैं री ! वे गीत रसाल ।
 मदन—महोदैं मन रह्यौ^२ लीला—सागर गिरिधरलाल ॥
 एकत पान खवावैं ही एकजु माँगैं देहु उगार ।
 एकत मुख चुंबन करैं एकनि भूले टूटे हार ॥
 चंद भूलि कौतुक रह्यौ नर—नारी मोहे मुरुली के नाद ।
 थाक्यौ रथ कैसे चलै ब्रज—जुवतिनि बिरमायौ बाद ॥
 चढि बिमान सब देवता बरसनि री ! वे लागे फूल ।
 जै—जै—जै जदुनंदना रास रच्यौ रति—नाइक भूल ॥
 सो प्रसाद हम कौं दियौ हरि परिरंभन बाहु पसारि ।
 'परमानंद' प्रभु श्रीपति पुन्य—पुंज—कृत^३ गोकुल—नारि ॥

७८१

(श्री)

निर्तत मंडल—मधि नंदलाल ।

मोर—मुगट मुरली पीतांबर उर^४ गुंजा बनमाल ॥
 मुरज^५ मृदंग संगीत बजत हैं ततथेई बाजत^६ ताल ।
 उरप तिरप नाचत नटनागर गंधव गुनी रसाल ॥
 बाम भाग^७ वृषभानु—नंदिनी गज—गति मनहुँ मराल ।
 'परमानंद' प्रभु की छबि निरखत सुख पावत ब्रज—बाल ॥

७८२

(केदारौ)

रास रच्यो बन कुँवर—किसोरी ।

मंडप विपुल सुभग वृंदावन जमुना—पुलिन स्यामघन—गोरी
 बाजत बेनु रवाब किन्नरी कंकन नूपुर किंकिनी—सोरी ।
 ततथेई ततथेई सब्द उघटत पिय
 भले बिहारी—बिहारिनि—जोरी ॥
 बरुहा मुकट चरन—तट आवत गहै भुजनि में भामिनि—भोरी
 आलिंगन चुंबन परिरंभन 'परमानंद' डारत त्रिनु तोरी ॥

१. मधि (अ), २. हर्यो (ग.)

३. ब्रज (घ), ४. गरै (अ), ५. ताल (ग.)

६. ततथेई बोलत लाल (ग)

७. अंग (ग.)

७८३

(बिलावल)

सरद-निसा-ससि-सोभा हरे-हरे।

कमल-नयन मन लोभा हरे-हरे॥

रवि-तनया के तीरा। बिपिन बसे आभीरा॥
 सोवन जूथिका फूली। कुंज-कुटी पर झूली॥
 अति संकीरन द्वारा। बैठे नंद-कुमारा॥
 किसलय-तलप बिछावै। रचि-रुचि कुसुम बनावै॥
 मत्त मधुप गुंजारा। मनु गत मदन-बिकारा॥
 मृगमद भाल-बनाई। हौं तोहि लैनि पठाई॥
 गावत तुव गुन-गीता। है त्रैलोक्य पुनीता॥
 प्रथम उबटि सिर खोरी। ग्रथित सुरंग पट जोरी॥
 भाल तिलकु दै स्यामा। कमल-नयन की बामा॥
 स्रुति ताटक सँवारी। भौंह चितैनि अनियारी॥
 चपल नयन मसि-रेखा। मधुकर मत्त बिसेखा॥
 नक-बेसरि कौ मोती। मेटत दिन-मनि-जोती॥
 चिंबुक चारु कंबु-ग्रीबा। सुंदरता की सींवा॥
 उलटि धरे मनु ताला। कंचुकी-मध्य बिसाला॥
 पहिरें मोतिनि-माला। रिझवति मदनगोपाला॥
 नीबी नाभि सुदेसं। मोहन मदन-प्रबेसं॥
 मृग-रिपु कृस कटि नारी। जघन नितंबनि भारी॥
 गति गजराज मरालं। लटकट बाहु-मृनालं॥
 नूपुर चरन सुढारं। पिय-सनमुख पाँउ धारं॥
 अंग-अंग सुकुवाँरी। रसिक कुँवर की प्यारी॥
 स्रवन सुनत मृदु बानी। ब्रज-सुंदरि अकुलानी॥
 चपल चली पिय-तीरा। मथत मदन की पीरा॥
 नवल कुँवर कों भेटी। मानों द्रुम-लता लपेटी॥
 कुच-जुग बसन दुरावै। गिरिधर-प्रेम बढावै॥
 नीवी-ग्रंथि न खौलै। नेति-बचन मृदु बोलै॥
 सुरति हिंडोरे झूली। मानहुँ कुमुदिनी फूली॥
 रसना कोटिक पाऊँ। कोटि जनम भरि गाऊँ॥
 मदनमोहन जू की जोरी। उपमा कहै सो थोरी॥

क्रीडत कुंजबिहारी । भक्तनि के हितकारी ॥
चरन-कमल-रज पाऊँ । मुदित बिमल जस गाऊँ ॥
'परमानंद-व्रत कीनौ । पद-अंबुज चित दीनौ ॥

७८४

(टोडी)

निर्तत मोहन रास बिलास ।

गुन गावति वृषभानु-नन्दिनी उघटत सब्द ताथेई तास ॥
करतल ताल मिलत मुरली-सँग बिच-बिच मोहन-मुख-मृदु-हास ॥
जै-जै करत कुसुम सुर बरषत गुन गावत 'परमानंददास' ॥

जल-क्रीडा-

७८५

(टोडी)

करत गोपाल जमुना-जल-क्रीडा ।

सुर नर असुर थकित भए देखत
सिरि गई तन-मनजा^१ ब्रीडा ॥
मृगमद मलय^२ कुमकुमा केसरि^३
अगर कपूर सुबास बहु भुरकनि ।
कुच-जुग गगन^४ मगन नंदनंदन
कोमल^५ पानि परस्पर छिरकनि ॥
निरमल सरद-काल-रितु^६-सोभा
बरषत स्वाति-बिंदु-सम मोती ।
'परमानंद' कनक^७ छबि गोपी
मरकत-मनि गोविंद तन^८ जोती ॥

७८६

(सारंग)

मोहि मिलनि भावै जदुवीर^९ की ।

सरद-निसा पूरन ससि उदौ^{१०} करि खेलनि जमुना-तीर की
हरि हम कौं हम हरि कौं छिरकति पैसि^{११} दफोलनि नीरकी
हँसि^{१२} कर खेंचि लेत ऊँडे^{१३} जल अंक^{१४} माल भुज भीर की ॥

१. जिय., २. तिलक., ३. चंदन रसिक, ४. मगन रसिक,

५. कमल., ६. कृत, की, ७. कंचन-मनि, ८. मुख,

९. बल-वीर, १०. उदए, ११. पैठि

१२. हरि (ड. छ.), १३. औँडे (ग.), १४. अंस भुजा भरि भीर की.

जबै निकसि होत जल ठाढे निरखि अँगोछनि चीर की
'परमानंद' स्वामी रति-नागर बलि-बलि स्याम-सरीर की

७८७

(सारंग)

बैठे घनस्यामसुंदर खेवत हैं नाउ ।
आजु सखी ! कान्ह-संग खेलनि कौ दाउ ॥
पथिक हम खेवट तुम लीजैं उतराई ।
बीच धार-माँझ रोकि मिस कै डुलाई ॥
जमुना गंभीर नीर अति तरंग लोल ।
गोपिनि प्रति कहनि लागे मीठे मधु^१ बोल ॥
डरपति हौं स्यामसुंदर राखहु पद-पास ।
एहि^२ रस मिल्यौ चाहै 'परमानंददास' ॥

युगल-रस-वर्णन-

७८८

(सारंग)

राधा बैठी तिलकु सँवारति ।
मृग-नैनी कुसुमायुध के डरु सुभग नंद-सुत-रूप बिचारति ॥
दरपन हाथ सिंगारु बनावति बासर-जाम जुगति यौं डारति
अंतर प्रीति स्यामसुंदर सौं प्रथम समागम केलि सँभारति ॥
बासर-गत रजनी ब्रज आवत मिलत लाल गोवरधनधारी
'परमानंद' स्वामी के संगम रति-रस-मगन मुदित ब्रजनारी

७८९

(सारंग)

• नवरंग कंचुकी तन गाढी ।
नव रँग सुरँग चूनरी ओढे^३ चन्द्र-बधू सी ठाढी ॥
नव रँग मदनगोपाललाल सौं प्रीति निरंतर बाढी ।
स्याम-तमाल लाल उर लपटी कनक-लता सी आढी ॥
सब अँग^४ सुंदर नवलकिसोरी कोक-कला-गुन पाढी ।
'परमानंद' स्वामी^५ की जीवनि रस-सागर मथि काढी ॥

१. मृदु (ग), २. याही मिस (क),

• सुरंग...से भी प्रारंभ है,

३. पहिरें, ४. गुन-सीव चतुर नागरी (बं. ३४ ॥७)

५. गिरिधरनलाल हित

७६०

(सारंग)

राधा रसिक गोपाल^१ हिं भावै ।
 सब गुन—निपुन नवल अंग सुंदरि
 प्रेम—मुदित कोकिल—सुर गावै ॥
 पहिरि कसूँभी कटाव की चोली चंद्र—बधू सी ठाढी सोहै ।
 सावन मास भूमि हरियारी मृग—नैनी देखत मन मोहै ॥
 उपमा कहा देउँ को लाइकु केहरि के वाही मृग लोचनि
 'परमानंद' प्रभु प्रान-वल्लभा चितवनि चारु काम-सर-मोचनि

७६१

(सारंग)

राधा माधौ सौं रति बाढी ।
 चितवति तहाँ जहाँ नंदनंदन सब तें लियौ मन काढी ॥
 एक द्यौस जमुना—मज्जन करि निकसि तीर भई ठाढी ।
 सुकवति बार बाम कर सिर धरि बनी है कंचुकी गाढी ॥
 स्यामा नवल कनक—चंपक—तन नागरि मनसिज गाढी ।
 चाहति मिल्यौ प्रानप्यारे कौं 'परमानंद' गुन—आढी ॥

७६२

(सारंग)

राधा माधौ बिनु क्यों रहै ।
 एक स्यामसुंदर के कारन और सबनि की निंदा सहै ॥
 प्रथम भयौ अनुराग द्रिष्टि तैं इत मोहन मन हर्यौ ।
 पिय के पाछें लागी डोलै बंधु—वरग सौं बैरु पर्यौ ॥
 मनक्रम—बचन और गति नाही बेद—लोक—लज्जा तजी ।
 'परमानंद' तब तैं सचु^२ पायौ जब तैं पद—अंबुज^३ भजी ॥

७६३

(सारंग)

अति रति स्यामसुंदर सौं बाढी ।
 देखि सुरूप गोपाललाल कौ रही ठगी सी ठाढी ॥
 घर नहिं जाइ पंथ नहिं रेंगति चलनि—बलनि गति थाकी
 हरिनी ज्यौं हरि कौ मगु जोवति काम—मुगध मति ताकी
 नैनहु नैन मिले मनु अरुझ्यौ इहि नागरि वह नागर ।
 'परमानंद' बीच ही बन में बात जु भई उजागर ॥

१. गोपालै

२. सुख. (ग.), ३. अंभोज (ग.)

७६४

(सारंग)

साँची प्रीति भई एक ठौर ।

मृगनयनी कमल-दल-लोचन लाल स्याम राधा तन गौर
 तुम सिर सोहति पाट की डोरी हरि-सिर रुचिर चंद्रिका मोर
 तुम रसिकिनी वे रसिक-सिरोमनि तुम ग्वालनि वे माखनचोर ॥
 तुम करिनी वे गजबर-नाइक तुम मालती वे भोगी भौर
 'परमानंद' लाल^१ गिरिधर के राधा-सी जोरी नहीं और ॥

७६५

(कान्हरी)

तेरौ मुख नीकौ कै मेरो री प्यारी !

दर्पन हाथ लिएँ ब्रज-नंदन साँची कहौ वृषभानु -दुलारी ॥
 तुम हौ नंद के छैल छबीले हम हैं गूजरी दासी तिहारी ॥
 'परमानंददास' कौ ठाकुर चरन-कमल की हौं बलिहारी ॥

७६५

(ईमन)

आजु बने सखि ! नंदकुमार ।

सँग सोभित वृषभानु-नंदिनी ललितादिक गावति गुन-सार ॥
 कनक-थार कर लिएँ कामिनी मुक्ता फल-फूलनि के हार
 रोरी कौ सिर तिलकु बनावति करत आरती हरषि अपार
 यह जोरी अविचल वृंदावन दें असीस मिलीं वृज-नारि
 कुंज-भवन में बैठे दोऊ 'परमानंददास' बलिहार ॥

७६७

(सारंग)

जसुमति जीवन नंदलाल-सँग राधा सुंदरि जोरी ।
 अगर कपूर कुमकुमा मिलि रस किये चंदन तन खौरी ॥
 कटि पर सुभ सु बसन किंकिनी खचित नगनि अति राजै
 मुक्तामाल सुढार हृदै वर कौस्तुभ-मनि कल भ्राजै ॥
 निरखि सकल गोपी-जन हरषति सुर-बधू सुमन बधावत
 अति आनंद मोर मुदित मन जन 'परमानंद' गावत ॥

७६८

(सारंग)

राधा सों रस-रीति बढी ।

सादर करि भेटी नंदनंदन दूने चाउ चढी ॥

१. नंदनंदन के (ग. ज.)

बृंदावन में क्रीडत दोऊ कुंजर-सँग करिनी ।
‘परमानंद’ स्वामी मनमोहन ता कौं^१ इहि मन-हरिनी ॥

७६६

(सारंग)

लटकि लाल रहे राधा कें भर ।
सुंदर बीरी बनाइ सुंदरी हँसि-हँसि जात^२ देति मोहन कर
गोपी सनमुख चितवति ठाढी तासौं केलि करत सुंदरबर
ज्यों चकोर चंदा कौं^३ चितवत त्यों आली निरखत गिरवरधर ॥
कुंज-कुटी अरु बाग बृंदावन बोलत मोर कोकिला तरु पर
‘परमानंद’ स्वामी मोहन की हौं बारी या लीला-छबि पर०

८००

(सारंग)

अलक लडी मोहन जू की जोरी ।
वे^४ रस-पुंज नंदजू की जीवनि इहि दुलहिनि बृषभानु-किसोरी
वे कुंचित कच मधुप बिसेषित इहि सुदेस ग्रंथित सिरडोरी
वे अंबुज-मुख इहि बिधु-बदनी वे कोमल कर उरज-कठोरी
वे गजमत प्रबल रति-नाइक इहि सारंग-रिपु कृस-कटि थोरी
वे बृंदावन-ससि ‘परमानंद’ इहि निसि-नागरि नैन-चकोरी ॥

८०१

(सारंग)

घन मँहि छुपि^५ रही ज्यौ^६ दामिनि ।
नंदकुँवर के पाछें ठाढी कुँवरि राधिका भामिनि ॥
बाल-दसा अपने^७ रँग खेलति सरद सुहाई जामिनि ।
‘परमानंद’ स्वामी रस-भीजी प्रेम-मुदित गज-गामिनि ॥

८०२

(सारंग)

आजु बनी दंपतिबर-जोरी ।
साँवल^८ गौर बरन रूप^९ महा नंदकिसोर बृषभानु-किसोरी

१. ताहू कौ मन० (ग.) २. जाइ (घ.) ३. तन (घ.ड. छ.)
• चतुर्भुजदास की छाप से भी-‘चतुर्भुज’ प्रभु मदनमोहन पिय बलिहारी या छबि पर
(बं. ३७।३, ८।४)
४. तुम (सर्वत्र) (बं. १३०।२)
५. छिपि (क. घ.), ६. मानों (बं. ५७।६)
७. मोहन-सँग बिलसति (बं० ५७।६), ८. सँग क्रीडति प्रेम-पुंज (बं. ५७।६)
९. गौर-स्याम राजत दोऊ जन नंदलाल, १०. निधि (ग. ज.), अति सुंदर, तन अनुपम

एक सीस पचरँग^१ चूनरी एक सीस अद्भुत पट खोरी ।
 मृगमद—तिलक एक के माथें एक माथें सोहै मृदु रोरी ॥
 नख^२—सिख उभय भाँति भूषन—छबि रितु बंसत खेलत मिलि होरी ।
 अतिसै रंगु बढ्यौ 'परमानन्द' प्रीति परस्पर नाँहिन थोरी

८०३

(सारंग)

गोपी प्रेम की ध्वजा ।

जिनि जगदीस किए बस अपने उर धरि स्याम—भुजा ॥
 सिब^३ बिरंचि प्रसंसा कीनी उद्धव संत सराहीं ॥
 धन्य^४ भाग गोकुल की बनिता^५ अति पुनीत भव माहीं ॥
 कहा बिप्र—घर जनमहि पायें हरि^६ सेवा—बिधि नाहीं ।
 तेई पुनीत 'दास परमानन्द' जे हरि सनमुख जाहीं ॥

८०४

(सारंग)

कवन रस गोपिनि लीनों घूँटि ।

मदनगोपाल निकट करि पायो प्रेम—काम की लूटि ॥
 देखत^७ रूप—ठगौरी लागी सकुच^८ गई तन छूटि ।
 'परमानन्द' बेद सागर की मरजादा गई फूटि ॥

८०५

(सारंग)

अराधन राधिका कौ नीकौ ।

जाकै संग मिलें हरि खेलत जो ठाकुर सब ही कौ ॥
 पूरब नेंमु लियौ सो साँचौ नन्द—नन्दन पति करिहों ।
 देव—लोक तजि धातृ—आज्ञा गोकुल में अवतरि हों ॥
 जो बृषभानु प्रबल गोपनि में चंद्र—बदनि तहाँ आई ।
 देखत रूप अनूप मनोहर मदनगोपालहिं भाई ॥
 बाल दसा मँहि प्रीति निरंतर क्रीडत गोकुल—बास ।
 गौर—स्याम तन इहि जोरी पर बलि 'परमानन्ददास' ॥

१. पगिया रँग—बोरी

२. करत बिलास दोऊ जमुना तट बढयो रस सिंधु आनँद—झकझोरी ।
 कहत न बनत 'दास परमानन्द' (बं. ६२।२)

३. सुक मुनि व्यास, ४. भूरि (बं० १३०।१),

५. ललना (१३०।१), ६. जो हरि से यो (बं० १३०।१)

७. निरखि सरूप नन्दनन्दन कौ लोक—लाज गई छूटि (बं. १३०।१), ८. लाज (ड. क.)

८०६

(सारंग)

लाल ! तेरी लाडिली लडबौरी ।
 चाहति फिरति अकेली बन-बन लागी प्रेम-ठगौरी ॥
 इहि तुम करी नंद के नंदन बाँह बोलि दै हटकी ।
 जानै करम^१ मरम अति भोरी रूप देखि तब लटकी ॥
 सुनु ब्रजनाथ ! अनाथ-नाथ तुम एहि न बूझिए नागर ।
 'परमानंद' प्रभु अब न छाँडत हौं करी सब बात उजागर ॥

८०७

(कानरौ)

गोबिंद प्रीति कै^२ बस कीनों ।
 अंतरगत तैं स्याम-मनोहर अनत जान नहिं दीनों ॥
 नहिं सहि सकति बिछुरनौ पलु भरि भलौ नेंमु तैं लीनो
 'परमानंद' प्रभु मोहन मूरति-चरन कमल चितु दीनो ॥

८०८

(बिलावल)

इहि पट-पीत कहाँ तैं पायौ ।
 इतनी^३ प्रीति गुपत मोहन की तैं राधे ! त्रैलोक सुनायौ^४ ॥
 ना या कौ मोलु न या कौ गाहक
 ना लियौ मोलु न घर उपजायौ ।
 एक बार खेलत बृंदावन बहुत जतन करि मोहि उढायौ
 सुमिरन भजन बसत उर अंतर
 इहि मिस करि लालन समुझायौ ।
 प्रीति की रीति चतुर सोई जानें 'परमानंद' प्रभु यौं बोहरायौ

८०९

(मलार)

बोलें माई ! गोवर्द्धन पर मुरवा ।
 ऐसी स्याम-धुनि-मुरली बाजै तैसें उठें घन-धुरवा ॥
 चलहु सखी री ! रंग-महल में पवन बहत अति झुरवा ।
 'परमानंद' प्रभु तुम्हारे मिलनि कौं जागत ही भयो भुरवा

८१०

(मलार)

नँदलाल माई ! गुपति चलावत फीची ।
 कुचहि कपोल ताकि-ताकि मारत फुनि खोदत में नीची

१. कहा (ग. ज.), २. सों, ३. इतनिक (ग), ४. बतायौ

बालक जानि गए वृंदावन खेलनि आँखिनि मीची ।
सबहिं सखिनि के ओट दै ठाढी उनि मेरी लर खीची ॥
राव करो री ! जसोदा आगै लै उर अंतर-रस भीची ।
'परमानंददास' कौ ठाकुर अधर-सुधा-रस सीची ॥

८११

(केदारौ)

महल में बैठै^१ मदनगोपाल ।

भीतर जानि सोइ जन पावै जाहि बोलत नँदलाल ॥
स्याम सुभग तन चंदन-चर्चित उर सोहै बनमाल ।
नंद कौ लाल संग राधा के करत परस्पर ख्याल ॥
विविध विनोद करत रस-क्रीडा सज्ज्या कुसुम गुलाल ।
'परमानंददास' द्वारै^२ ठाढौ चितवन नैन बिसाल ॥

८१२

(सारंग)

कुंज-भवन बैठे नँद-नंद ।

स्यामा-स्याम जहाँ दोऊ राजत पवन चलत गति मंद-गयंद
मदनमोहन मोहीं पठई बिरह-बिथा काटत दुख-द्वंद ।
छल सब त्यागि समुझि अपने उर रति-रन-जोर सफन्द
अंग-अंग हिय-पिय नै लीनों मानों पियौ सरस राग-मकरंद
'परमानंद' प्रभू कौ चेरौ गुन बरनत मति-मंद ॥

८१३

(सारंग)

सोभित नव कुंजनि छबि भारी ।

अद्भुत रूप तमाल सौं लिपटी कनक-बेलि सकुँवारी ॥
मदन-सरोज डहे-डहे लोचन छबि-छबि सुखकारी ।
'परमानंद' प्रभु मत्त मधुप,पें श्रीवृषभानु-सुता फुलवारी ॥

८१४

(सारंग)

नीकी बानिक नवल कुंज की ।

बरन-बरन प्रफुलित द्रुम-बेली मधुमाते अलि-गुंज की ॥
करत बिहार तहाँ पिय-प्यारी संपति आनँद-पुंज की ।
'परमानंद' प्रभु की छबि निरखत मनमथ-मनसा लुंज की ॥

१. सोए

२. कौ ठाकुर

८१५

(सारंग)

आज नव कुंजनि की अति सोभा ।
करत बिहार तहाँ पिय—प्यारी निरखि नैन—मन लोभा ॥
रूप वारि सीचत निज तन कौ उठत प्रेम की गोभा
'परमानंद' (दास) प्रभु चितवत लागति चित कौ चोभा ॥

८१६

(कल्याण)

कहै राधा देखहु गोविंद !
भलौ बनाव बन्यौ है बन कौ पूरन राका—चंद ॥
मंद—सुगंध सीतल मलयानिल कालिंदी के कूल ।
जाई जुही मल्लिका जूथी फूले निरमल फूल ॥
सब अभिलाष होत हैं मन के^१ नहीं रहति जिय साध ।
तुम्हारे समीप कवन रस^२ नाँही नाथ ! सकल सुख—लाध ॥
सुनि ते^३ बचन बहुत भलौ मान्यो हँसि दीनी अँकवारि
'परमानंद' प्रभु प्रीति जु जानी नागर रसिक मुरारि ॥

८१७

(सारंग)

कुंज बाहि दिखाबहुँ आजु ।
माँगै जोइ देउँ नंद—दुहाई यों बोलत ब्रज—राजु ॥
चितवत चित हस्यौ उहि नागरि मोहि वाहि सौँ काजु ।
है किसोर जोवन नहिं परसी सबै मनोहर साजु ॥
फुनि^४ दूती राधा जू पें आई बचननि स्याम समाजु ।
'परमानंद' प्रभु जो धन मिलऊँ तौ मेलौँ मुख नाजु ॥

८१८

(सारंग)

आजु तुम इहाँई रहौ कान्ह प्यारे !
निसि अँधियारी भवन दूरि है चलि न सकत पाँ हारे ॥
तोरि पत्र की सेज बिछाऊँ वा तरुवर की छाँह ।
नंद के लाल तुम सैन करहु देउँगी उसीसे बाँह ॥
सँग के सखा सब घर को विदा करौ हम तुम रहेंगे दोऊ
'परमानंद' प्रभु—मन राधा भावै अनख करौ मति कोऊ

१. पूरन (ज. च.), २. गुन (ग.)

३. कै (इ. ग. से ज.), ४. फूली

८१६

(केदारौ)

कुंज महल में पौढे दोऊ ।

नन्द-नँदन बृषभानु-नंदिनी उपमा कौ दूजौ नहिं कोऊ ॥
 नाना^१ कुसुम की सेज रची है कोक-कला जानत हैं सोऊ
 रसिक-मुगट-मनि रँग में भीने 'परमानंद' तहाँ द्वारें होऊ

८२०

(केदारौ)

पौढे रंग महल गोबिंद ।

राधिका-सँग सरद-सजनी उदित पूरन चंद ॥
 बिबिध चित्र अनेक चित्रित कोक कौतुक-फंद ।
 निरखि-निरखि बिलास बिलसत दंपती रस-कंद ॥
 मलय^२ चंदन अंग-लेपन परसि अति आनंद ।
 कुसुम-बीजन बायु ढोरै सजनी 'परमानंद' ॥

८२१

(कानरौ)

पौढे हरि झीनौ पट दै ओट ।

संग श्रीवृषभानु-तनया सरस रस की मोट ॥
 मकर-कुंडल अलक अरुझी हार गुंजा-ताटक ।
 नील-पीत दोउ अदल-बदले लेत भरि-भरि अंक ॥
 हृदय-हृदय सौं अधर-अधर सौं नयन सौं नयन मिलाइ ।
 भ्रौंह-भ्रौंह सौं तिलक-तिलक सौं भुजनि-भुजा लपटाइ ॥
 मालती और जाई चंपौ सुभग जाति बकूल ।
 'दास परमानंद' सजनी देति चुनि-चुनि फूल ॥

८२२

(केदारौ)

पौढे रावरी सुख-सेज ।

संग श्रीवृषभानु-तनया सुरत-रस कौ हेज ॥
 नवल कुंजनि जाल-रंधनि बहत मलयज पवन ।
 'दास परमानंद' आली करत ब्रज-जन-गवन ॥

१. किसलय-दल-कुसुमनि की सज्जा (अ.)

२. अगर

सुरतान्त-

८२३

(ललित)

राधे जू ! हारावलि टूटी ।

उरज कमल-दल-माल मरगजी वाम कपोल अलक-लट छूटी ॥
 बर उर उरज करज कर अंकित बाहु जुगल बलयाबलि फूटी ।
 कंचुकि-चीर बिबिध रँग-रंगित गिरिधर-अधर माधुरीघूँटी
 आरस-बलित नयन अनियारे अरुन उनीदे रजनी खूटी
 'परमानंद' प्रभु सुरत-समै रस मदन नृपति की सेना लूटी

८२४

(बिलावल)

चली उठि कुंज-भवन तैं भोर ।

डगमगात लटकत लट छूटें पहिरें पीत-पटोर ॥
 अरुन नयन घूमत आरस-बस मनु रस-सिंधु-हिलोर^१ ।
 गिरि-गिरि परत गलित कुसुमावलि सिथिल सीस-कच-डोर ॥
 पद-नख अंक जुगल वर राजत सुभग हियें तन गोरि ।
 'परमानंद' प्रभु रमी निसा अब लपटि हँसी मुख मोरि ॥

८२५

(सारंग)

आवति आनंद-कंद-दुलारी ।

बिधु-बदनी मृग-नैनी राधा दामोदर की प्यारी ।
 जा के रूप कहत नहिं आवै गुन बिचित्र सुकुमारी ।
 मानहुँ कहुँ पर्यौ घुन-आखर बिधिना सुहथ सँवारी ॥
 प्रीति परस्पर ग्रंथि न छूटै ब्रजजन इहै बिचारी ।
 'परमानंददास' बलिहारी मानहुँ साँचे ढारी ॥

८२६

(सारंग)

बाँह डुलावति आवति राधा ।

बदन-कमल झंपति न उधारति रह्यौ है तिलक मिटि आधा

१. हिंडोर (क.)

गिरिधरलाल कुँवर^१ नंदनंदन तैं जु प्रेम करि लाधा ।
 रहसि मिली^२ प्रान-प्सारे कौ रही न एकौ साधा ।
 काजर अधर मिल्यौ नैननि कौ मिटी काम की बाधा ॥
 'परमानंद' स्वामी रति-नागर तेरौ पुन्य अगाधा ॥

८२७

(सारंग)

कहा फूली आवति है राधे !
 मानहुँ मिले अंक-भरि माधौ प्रगटित प्रेम अगाधे ॥
 बार-बार मुसिकाति बदन-छबि बिकसित पदम^३ जु आधे
 लोचन चारु बंक अवलोकनि काम नचावति ताधे ॥
 इहि रस-मत्त फिरत मुनि-मधुकर संभु रहत दिन साधे ।
 सोई रसु दियौ 'दास परमानंद' श्रीनिकेतन राधे ॥

८२८

(सारंग)

छूटी री ! अलकलट काहे न बाँधत ।
 मदनगोपाल रिझावे हि कारन सहजहि नैन-कुसुम-सर साधत ॥
 इहि चतुराई तेरी प्रगट देखियत तू नागरि नागर मन मोहति ।
 बसीकरण तेरी प्रीति-रीति है सखियनु माँझ सुहागिल सोहति ॥
 बिनु सिंगार नीकी लागति है एहि रूप गोपालहि भावत
 'परमानंद' प्रभु प्रान बल्लवा करत हहा रे ! सुमुखि मनावत

८२९

(सारंग)

उपरैना स्याम-तमाल कौ ।
 तैं धौ कहाँ लयौ ब्रज-सुंदरि ! ललित त्रिभंगीलाल कौ ॥
 सुभग कलेवर प्रगट देखियत हाथनि कंकन-जाल कौ ।
 तू-रस मगन भई नहि समुझति बाल केलि ब्रज-ख्याल कौ
 निसि-दिन रहत गोप-ग्वालनि सँग चंचल नैन बिसाल कौ
 'परमानंद' प्रभु गोधन चारत मत्त गयंदबर चाल कौ ॥

८३०

(सारंग)

रस पायो नंदकुमार^४ कौ ।
 सुनि सुंदरि ! तोहि नीकौ लाग्यो या मोहन-अवतार कौ

१. रसिक (घ), २. मिली हैं प्रान-प्रिया सों (बं. ११६/१)

३. कमल (घ), ४. मदनगोपाल (ग.)

कंठ बाहु धरि अधर—पान दै प्रमुदित हँसत बिहार कौ
गाढे आलिंगन दै—दै मिलिबौ बीच न राखत हार कौ ।।
लोकपाल पावन जसु-गावन^१ प्रगट^२ हरन भुव-भार कौ ।
सेस—अंक तजि गोकुल आए देख्यो चरित उदार कौ ।।
बेनु बजावत नाचत गावत इहै बिनोद सुख—सार कौ ।
'परमानंददास' की जीवनि रास—परिग्रह दार कौ ।।

८३१

(टोडी)

भली बनी बृषभानु—नंदिनी प्रात समै रन जीतें आवै ।
नूपुर मधुप—अलक—लट छूटी मधुर चाल—मद गजहि लजावै ।।
नागर छैल—रसिकिनी नागरि सुरत—हिडोरें झूलै गावै ।
वे दोउ सुघर केलि—रस—मंडित नासत^३ मदन ठौर नहिं पावै
पिय की नख—मनि उरहि बिराजित बिनु सूते हि माल बनावै
'परमानंद' रूप—निधि नागरि बदन—कांति रबि^४—जोति छुपावै ।।

खंडिता—

८३२

(ललित)

कमल—नयन स्याम—सुंदर^५ निसि के जागे हौ आलस—भरे
कर—नख उर अरुन^६ रेख मानहुँ ससि^७ अर्द्धधरे ।।
लटपटी सिर पाग बनी खसित बसन तिलक टरे ।
मरगजी उर कुसुम—माल भूषन अंग अंक परे ।।
सुरत—रँग उमगि रहे रोम—पुलक होत खरे ।
'परमानंद' रसिकाइ जाहि के भाग ताही के ढरे ।।

८३३

(ललित)

• साँवरे भले हौ रति—नागर !
अब कें दुराएँ क्योंऽब दुरति है प्रीति जु भई उजागर ।।

-
१. गावत (ड. छ.), २ भक्तनि प्राण—अधार कौ (ग.)
३. भागत (छ.) ४. ससि कांति (बं. ११६/१९)
५. घनस्याम मनोहर तुम निसि के जागे आल—रंग—भरे (बं. ३/१९)
६. राजतमनों अरध ससि धरे.
७. वाल ससि धरे (बं. ११५/१९)
• भले आए साँवरे रति० (बं० ११५/१९) सेभी प्रारंभ है ।

अधर काजर में नयन रगमगे रची कपोलनि पीक ।
उर नख-रेख प्रगट देखियतु है परी मदन की लीक ॥
पलटि परे पट तिलकु गयौ मिटि जहाँ-तहाँ कंकन-गाउ
'परमानंद' स्वामी मधुकर-गति भली आपुनी चाउ ॥

८३४

(बिलावल)

भली करी जु आए हौ सवारे ।
बहुरि भानु कौ उदय होहिगौ प्रगट देखियत अंक निन्यारे ॥
पलटे पीत नील-पट ओढे ऐसी कौन चतुर धन भावत ।
एते मान देह-सुधि भूली तुम हि जु आपुनपौ बिसरावत ॥
पाँउ धारिये बहुत मया भई कर गहि कंत तलप बैठारे ।
'परमानंद' प्रभु तुमतेँ और कोऊ संध्या-वचन बदे नहिँ टारे ॥

८३५

(सारंग)

राधे ! बात सुनहि किनि मेरी ।
घर-बैठे आई सखि मोपै सौँह करत है तेरी ॥
हौँ आयौ चाहत हौँ तुमपै बीचि लियौ उनि घेरी ।
बहुत चतुराई रहि रहि देखी कैसै हू जात न फेरी ॥
भवन आपने तानि लियौ सखि अरु भई रयनि अँधेरी
पर-बस परे 'दास परमानंद' काहि सुनाऊँ टेरी ॥

८३६

(बिलावल)

भलै आए गिरिवरधारी नागर ।
जिय की कृपा में तब ही जानी भोर खुलाए आगर ॥
रति के समाचार लिखि पठए सुभग कलेवर कागर ।
जासौँ तुम अति खेलु रच्यौ है चतुर नारि के बागर ॥
जाके रस तुम रहे जु बींधे सो धौँ कौन अचागर ।
हमारी चिंता अरुन नैन भए सकल निसा के जागर ।
बलि-बलि जाऊँ मुखारविंद की सुरत-रंग-रस-सागर ।
'परमानंद' प्रभु हमहिँ लजावत आपुनि सदा उजागर ॥

८३७

(बिलावल)

• लाल ! तुम पीत ओढिनी कहाँ बिसारी ।
एतौ लाल ढिँगनि की औरै है काहू की सारी ॥

१. कै कै (ग. च. छ.)

• पीत पिछौरी कहाँ बिसारी (बं. १२८ १४) (३० १२) से भी प्रारंभ है

हौं^१ गोधन लै गयो जमुन—तट तहाँ हुती पनिहारी ।
भीर भई सुरभी सब बिडरीं मुरली भलें सँबारी ॥
ए^२ तौ हाथ परी काहू की सो लै गई हमारी ।
'परमानंद' प्रभु^३ भली बनावत बलि जसुमति महतारी ॥•

८३८

(बिलावल)

रति—रन जीते ई आवत मदन—फौज—रस लूटे ।
सिथिल अंग मुख स्रवत जल मोतिनि हार—लर टूटे ॥
पेच पाग के रसिक पगे सब कटि—पट—फेंट बँधे अधछूटे
लटकत केस जुल्फ घुघरारी बोलत सब्द हलाहल कूटे ॥
कौन त्रिया ऐसी तुम पाई जहाँ भये कबार अधर—रस छूटे
'परमानंद' स्वामी जिय सकुचे
प्यारी फंद परी मेरे उर के भेद सब खूटे ॥

८३६

(सारंग)

मैं तुम देखे स्याम—मनोहर ! गूँथत काहू की बैनी ।
जदपि बे गुन जानति नागरि तौऽब करति कतलैनी ॥
मुख औरै अंतरगति औरै ताहि बडाई दैनी ।
'परमानंद' स्वामी पाँ लागूँ पर—दुख—कातर—छैनी ॥

८४०

(मलार)

आई जु फिरि गई बिनु आदर ।
मैं वा की सँभार^४ न कीनी रबकि जु आए बादर ॥
धौरी दुहत भई दुचिताई प्रथम पहर की जामिनि ।
मेरे प्रेम भवन तजि आई बिमुख गई वह भामिनी ॥
बा के मन में कहा बीतति है प्रान—जीवन—धन^५ राइ ।
'परमानंद' प्रभु कह्यौ प्रनय करि दूती तू चलि जाइ ॥

१. हौं वा घाट पिबावत गैयाँ जहाँ भरति पनिहारी (बं. १२८ १४)

२. हौं लै भजौँ और काहू की बो. (बं. १२८ १४)

३. बलि—बलि बतियनि पै तून तोरति महतारी (बं. १२८ १४)

• सूरसागर प० सं० १३११ तथा ३७ १३ व १५ २० में भी
'पीत उदनियाँ कहाँ बिसारी' सूरदास—छाप से

४. सँभाषन (ख.), ५. जदुराई (ड. छ.),

सूआ पढावति सारंग-नैनी ।

बदति सँकेत लाल गिरिधर सौं गुरु-जन-निकट गुपति मति कैनी ॥
अहो कीर ! नीलवरन तन नैकु सु चितै ममबुद्धि चितु-लैनी
होति अबार जात गृह दिन-मनि हम तुम भेट होइगी रैनी
तब लागि तुम^१ सिधारौ सदन निज हौं जाऊँ जमुना-जल-लैनी ।
'परमानंद' प्रभु प्रीति अंतरगत मृदु मधु बचन कहति पिक-बैनी ॥

21. युगल-गीत

को बिसरै उह गाँइ चराबनि ।

बाम कपोल बाम भुज पर धरि दच्छिन भौंह उचावनि ॥
कोमल कर अंगुलि गहि मुरली अधर-सुधा-बरसाबनि ।
चढि बिमान जे सुनत देव त्रिय तिननि मोह-उपजावनि ॥
हार-हास अरु थिर चपला उर रूप-दुखित सुख-लावनि ।
दंत धरें तृन रहत चित्र ज्यौं गाँइनि-सुधि बिसरावनि ॥
मोर-मुगट स्रवननि पल्लव कटि मल्ल-स्वरूप-बनावनि ।
चरन-रेनु बांछत कंपित भुज सरितनि गमन थँभाबनि ॥
आदि पुरुष ज्यौं अचल भूत है संग सखा गुन-गावनि ।
बन-बन फिरत कबहुँ मुरली कर गिरि चढि गाँइ-बुलावनि ।
लता-बिटप मनु माँझ प्रनत है फल-भर भूमि नचावनि ।
ततछिन हरित होइ प्रति अवयव मधु-धारा-उबटावनि ॥
सुंदर रूप देखि बनमाला मत्त मधुप-सुर-गाबनि ।
आदर देत सरोवर सारस हंस-निकट-बैठावनि ॥
बल-सँग स्रवन पुहुप-सोभा गिरि सिखर नाद पुरवावनि ।
बिबिध भाँति बन-गमन बिचछन नूतन तान बनावनि ।
सुनत नाद ब्रह्मादिक सुर-गन अधिक चित्त-मोहावनि ।
चलत ललित गति हरत ताप ब्रज-भूमि-सोक-बिनिसावनि ।
ब्रज-जुवती-मन मैन उदित करि हरनी-भवन-छिडावनि ।
कुंद-दाम-शृंगार सकल अँग जमुना जल-उछरावनि ॥

१. तुमहु सिधारौ सघन बन हौं जाऊँ.

मुदित सकल गंधर्व—देव—गन सेवा उचित करावनि ।
 आरत द्रग ब्रज गाँइनि के मन अति आनंद—बढावनि ।।
 गो—रजरंजित नव बन—माला सुख दैवे ब्रज—आवनि ।
 घूमत द्रिग मदमान देत कुंडल स्त्रुति—जुग—झलकावनि ।।
 बदर—सदृस आनन सूचत सब बिधि ज्यों अंग—सिरावनि ।
 जुग—जुग गोपी रजनी मुख सब अति पुनीत जस—गावनि
 इहि लीला चित बसौ लसौ नित गोपी—जन सुख—पावनि ।
 'परमानंददास' कों दीजै ब्रज—जन—पद—रज—धावनि ।।

८४३

(देवगंधार)

वे हरिनी हरिनी बन जाई ।

जिनि तन कृपा—कटाच्छ चितै तुम अपने ढिंग बैठाई ।।
 जे गुन—सिंधु जानि हरि—मूरति कृष्णसार तजि आई ।।
 जिनि नैननि मोहन कों गोपिनि सुरति दिवाई ।।
 करि करुना जिनि गोपिनि की ज्यों घर की आस छिडाई ।
 मनि—माला कर गनतै गैयनु जे चितभीतर—लाई ।।
 जिनकी दृष्टि—वृष्टि अमृत की देखत रूप सिराई ।
 जिनु गोपाल के अंस बाहु धरि लीला गूढ दिखाई ।।
 प्रेम—बिबस रस—हरि—दरसन के तन—सुधि जिनि बिसराई ।
 'परमानंद' स्वामी करुना तैं गोपिनि की गति पाई ।।

22. मथुरा पधारितौ

८४४

(सारंग)

गोकुल बैठौ कान्ह मथुरा लैन कहै ।

सुनु रे राजा कंस ! तेरी^१ बहुत सहै ।।

वासुदेव वसुदेव कौ नंदन वल्लव जाति कहावै ।
 मानुष—देह धारे कमलापति गोधन—वृंद चरावै ।।
 समाचार सब नारद भाख्यौ सावधान रिपु कीनों ।
 सोवत सिंध जगायौ पापी संतनि कों दुख दीनों ।।
 बैठि मते अक्रूर पठायौ राम—कृष्ण कों लैन ।
 'परमानंद' स्वामी आवहिंगे कंसहि पूजा दैन ।।

८४५

(सारंग)

माधौ सों कत तोरिये ?

कीजे प्रीति स्यामसुंदर सों बैठौ सिंघनि रोरिये ॥
 बहन देवकी पाँइ लागिये बसुदेव बंदि छुडाइये ।
 'परमानंद' गोकुल कौ ठाकुर नंद बोलि पहराइये ॥

८४६

(सारंग)

केसी तृनावर्त जनि मास्थौ काली कौ विषु सोघ्यो ।
 एक हाथ गोवर्द्धन-गिरि धरि इहाँ आनि प्रबोध्यौ ॥
 सुनि हो कंस ! हमारी बातें मथुरा सचु जो चाहै ।
 'परमानंद' स्वामी सौं हिलिमिलि निज नातौ निरबाहै ॥

८४७

(सारंग)

गरब काहू कौ सहि न सकै ।

रावन हिरन्यकसिपु इनि^१ मारे काहेकौं कंस बकै ॥
 आँखि देखि कहा साखि बूझिये अब^२ ही लौं कहा कियौ ।
 जो बिष दैन गई ही गोकुल पूतना प्रान पियौ ॥
 सो धौं करै ताहि कौ नीकौ चरन-सरोज गहै ।
 'परमानंद' प्रभु सब विधि समरथ बेद-पुरान कहै ॥

८४८

(सोरठ)

कहति हों बात डराँत डराँत ।

जो मथुरा में सुनि आई हों तुम्हारी कथा बल-भ्रात ॥
 धनुष-जाग कौ ठाटु कियौ है चोंह दिसि रोपे माँच ।
 रंग-भोमि नीकी कै छोली मल्ल सँकेले पाँच ॥
 कालि दूत आबनु चाहत है राम-कृष्ण कहँ लैन ।
 नंदादिक सब ग्वाल बुलाए अपनी वार्षिक दैन ॥
 हँसि ब्रजनाथ कह्यौ तू साँची तेरी^३ कही हों मानौ ।
 'परमानंद' स्वामी मुसुकाने कालि कंस कौं भानौ ॥

८४९

(सारंग)

अरी ! तू अब मथुरा तै आई ।

कहै धौं समाचार उहाँ के बूझत कुँवर कन्हाई ॥

१. इहि (क. ग. घ. ङ. छ.)

२. अबहि कहा है (ग. घ. ङ. छ.) ३. तेरी कह्यौ (ङ. छ.)

कहा धौं बात चलति नगर में नृपति कंस के आगें ।
 काकौ भरमु ओइ करत भोजपति बैरु करत किहि नातें ॥
 सुनहु कृष्ण ! तुम्हरी सपत करौ सब कोऊ इहि गावै ।
 बोल^१—समेत नंद के नंदनु मधुपुरी देखनि आवै ॥
 बातें करत प्रेम—रसु बाढ्यौ नैन रहे अरुझाई ।
 'परमानंददास' उहि ग्वालनि घरहि कौन बिधि जाई ॥

८५०

(सारंग)

गोपाल जू की सब कोउ करत दुहाई ।
 गोरस बेचनि गई बबा की सौं हौं मथुरा सुनि आई ॥
 विद्यमान नृप कंस नगर मँहि राज तेज नहिं देख्यौ ।
 जबतैं बैरु कियौ माधौ सौं जीवत मृतक करि लेख्यौ ॥
 करत अवज्ञा प्रजा—लोक सब कंस—अवज्ञा मानें ।
 ठकुराई हलधर के सब की जन 'परमानंद' जानें ॥

८५१

(सारंग)

अपने हाथ कंस मैं मारौं ।
 हँसि गोपाल कहत^२ ग्वालनि सौं रंग—भोमि में डारौं ॥
 अहो बलराम ! सुनहु श्रीदामा ! आज रात कौ सपनौं ।
 हम—तुम सब मिलि गए मधुपुरी मिल्यौ जाति—कुल अपनौं ।
 प्रातकाल भयौ बतौआ संध्या पठ्यौ दूत ।
 'परमानंद' प्रभु भावी भाखी भयौ चलनि कौ सूत ॥

८५२

(सारंग)

तैं इहि^१ बालक सुत करि पाल्यौ ।
 इहि हम सुनी नाम कान्हर धर्यौ
 धाइ जसोदा उर धरि लाल्यौ ॥
 राजा कंस सुहथ लिखि पठई
 गुपत हि नंदगोप कौं पाती ।
 इहि न बूझिये पै नीकी कीनी
 राखी प्रगट स्वान धरि काती ॥

१. बल (घ.)

२. कह्यो (ङ. छ.)

या कौ प्रति—उत्तर लिखि पठवौ
को इहि आहि कहाँ तै आयौ ।
या कौ फल आगें पावहिगौ
मरम 'दास परमानंद' गायौ ॥

८५३

(कल्यान)

ब्रज—जन देखें ही जियत ।
नयन—चकोर सुधाकर हरि—मुख दृष्टि पियत ॥
तुम अक्रूर चले लै मधुवन हरि मेरे प्रान—आधार ।
राम—कृष्ण गोकुल के लोचन सुंदर नंदकुँवार ॥
इतनी करहु पाँइ लागति हों बेगि घोष लै आवहु ।
'परमानंद' स्वामी है लरिका कान लागि समुझावहु ॥

८५४

(कल्यान)

सुनियत ब्रज मँहि ऐसी चालि ।
माधौ—राम संग काहू कें मधुवन चलनि कहत हैं कालि ॥
सब मिलि गई जसोदा के घर कौन पाहुनौ तुम्हरे आयौ
कहा है नाम पुत्र है काकौ कौने हित करि घोष पठायौ ॥
घर—घर घोंन^१ मथान सबहिनि कें
भली बात देखति नहिं माई ।
'परमानंद' प्रभु बिछुरनि लागे
बिधिना बिधि कछु और बनाई ॥

८५५

(कल्यान)

गोपाल^३ हिं मधुवन जिनि लै जाहु ।
मोहि प्रतीति कंस की नाही सोम—बंस कौ राहु ॥
तुम अक्रूर बड़े के बेटा अति कुलीन मति—धीर ।
बैठत सभा सकल राजनि की जानत हौ पर—पीर ॥
बहिन देवकी वसुदेव सज्जन उन्हकों दीनों त्रास ।
बालक हू तैं निगड में राखे कारागृह मों बास ॥

१. इक (उ. छ.)

२. घोर (उ. छ.), ३ गोपाले (उ. छ.)

कहति जसोदा सुनु सुफलक-सुत ! हरि मेरे प्रान-अधार ।
‘परमानंददास’ की जीवनि छाँडि जाहु इहि बार ॥

८५६

(कल्यान)

कैसें माई ! जानि गोपालहि दैहों ।
कमलनयन-मानिक पर-हथ दै बहुरि कौन पै लैहों ॥
कपटी कंस दूत पै कपटी कपटी सब परिवार ।
कपटी होंइ राज के मंत्री कपट-चल्यो ब्यौहार ॥
धनुष-जाग कौ काज रच्यो है^१ मन में औरै बात ।
तब तें बैरु अधिक करि मान्यो सुनी पूतना घात ॥
‘परमानंद’ स्वामी की लीला कहा जसोदा जानें ।
ज्यों-ज्यों पुरुषारथ दिखरावै बहुरि-पुत्र करि मानें ॥

८५७

(सारंग)

गोविंद ! तुम जु चलत कौन राखै ?
ऐसे बचन कौन कहि जानै गिरा^२ अमी ज्यों भाखै ॥
जो हों कहों जाहु जिनि मधुबन^३ तौ तौ सब टिटाई लागै ।
जो रथ गहों अमंगल-सूचक लोक-लाज-कुल भागै ॥
बिछुरत प्रान रहै कैसें मोहन ! सोचत ही तनु छीजै ॥
‘परमानंद’ प्रभु रसिक-सिरोमनि परै बिचार सो कीजै ॥

८५८

(कल्यान)

आजु की घरी बिलंबि रहौ माधौ !
चलनि कहत हौ कत उहि गाँउ ॥
कहे पराएँ कत लागत हौ इहि ब्रज अपनौ नीकौ ठाँउ ।
फिरि देखौ मुख-चंद्र सबनि कौ
चित्र-लिखी सी बलि-बलि जाउँ ॥
जो तुम त्याग करौ गोकुल कौ
तौ हम काकें पेट समाउँ ।
‘परमानंद’ प्रभु प्रान-जीवन-धन
नैननि ओट होत मरि जाउँ ॥

१. कछु (ग. घ), २. बचन (ग. घ. उ. छ), ३. मथुरा (क. उ. छ)

८५६

(कल्याण)

वह तौ कठिन नगर की बात ।
 देखि अवास लोभ जिनि उपजै
 तुम गोकुल तें पहिले जात ॥
 सब ग्वालनि मिलि सिखवनि लागीं
 सुनियत पोच कंस कौ राजु ।
 पठयौ दूत कपट-मनसा करि
 नातर घोष कहा है काजु ॥
 दधि-रोचन कौ तिलकु दियौ सिर
 रूपे-सहित सुपारी पाँच ।
 'परमानंद; स्वामी चिरजीवहु
 तुमै जिनि लागहि ताती आँच ॥

८६०

(सारंग)

बदन^१ मुकुंद देखि-देखि जीवति ।
 सुन्दर रूप नैन भरि पीवति ॥
 रे अक्रूर ! क्रूर बटमारे ।
 प्राण काढि लै चले हमारे ॥
 बिरहाकुल फूलीं ब्रजनारी ।
 द्वार के चित्र मानों लिखी बिसारी ॥
 छाँडि लाज रथ गहौ^२ धाई ।
 चरन^३ गहौ सुंदर कन्हाई ॥
 प्राण गए तन केतिक आस ।
 कठिन प्रीति 'परमानंददास' ॥

८६१

(कल्याण)

देखो माई ! कान्ह बटाउ से रहे जात ।
 तब की प्रीति अब की रुखाई फिरि पाछें बूझत नहीं बात ॥
 रथ-आरूढ भए बल-केसब ओइ^४ देखौ विमल ध्वजा फहराति ।
 दोऊ बीर चले अति आतुर कहाँ बसहिंगे आजु की राति ॥

१. बदन कौ देखि (ग.), २. पकस्यौ (ग. ड. छ.) पकरिहु (घ)

३. चरन-कमल गहौ सुंदर कन्हाई (ड. छ.) चरन गहौ जैसें रहै कन्हाई

४. वे (ग. घ. ड. छ)

मधुवन आजु महामंगल रसु सब कोऊ गावत हैं गीत ।
‘परमानंद’ प्रभु चले हैं दिखावनि अपने चरन-सरोज पुनीत ॥

८६२

(कल्याण)

सगत्य^१ सब लेऊँगौ राजधानी ।
कंसै मारि लूटि रँग-भोमि^२ आगें चलैंगी कहानी ॥
करिहौं^३ सत्य गिरा नारद की अहो ! जु अकास भई बानी ।
कहत बात अक्रूर के आगें ‘परमानंद’ सुख^४ दानी ॥

८६३

(कल्याण)

आए-आए सुनियत बाग मेला न भयो ।
तब लगु मदनगोपालै देखनि कौ जासूस गयो ॥
कान लागि कें कही मते की हौं वसुदेव पढायो ।
नंद-गोप तुम भली न कीनी लै गोपाल हि आयो ॥
काली-दमन पूतना-सोषन इहि^५ भरोसौ आवै ।
मथुरा राज नंदनंदन कौ जन ‘परमानंद’ गावै ॥

८६४

(कल्याण)

निंदक मारिए त्रासु कीजै ।
नाहिन दोषु सुनहु नंदनंदन आपुनि मधुपुरि लीजै ॥
इहै^६ धर्म निति-निति स्तुति गावै संतनि को सुख दीजै ।
दानव-सेन-समुद्र बढ्यौ है सो अगस्त्य ज्यों पीजै ॥
कहत ग्वाल सब हरि के आगें जदुकुल अपनों छीजै ।
‘परमानंद’ स्वामी सुख-सागर सो करि आनंद दीजै^७ ॥

८६५

(कल्याण)

मथुरा देखिये नंदनंदन ।
भले अवास रचे कंचन के केसी-कंस-निकंदन ॥
बैठे मोर झरोखें बोलत मारग सेंच्यों^८ चंदन ।
भले लोग सनमुख आवत हैं चरन-कमल -रज बंदन ॥

१. सगति हौं सब लेऊँगौ रजधानी (ग.) २. भूमि में (ग.)

३. करहुँ (ख.) ४. प्रभु सब सुख (ग.)

५. मोहि (ड. छ.) ६. यह तौ धरम नित्य स्तुति गावै (क)

७. जीजै, ८. सींचत (ग.)

कहत श्रीदामा सुनहु स्यामघन ! मोरि^१ लेहु इहि पाटन ।
‘परमानंददास’ कौ ठाकुर बहुत दैत्यनि^२ कौ डाटन ॥

८६६

(बिलावल)

आए—आए होइ रहे नँद—ढोटा ।

देखत लोग मधुपुरी के सब तरुन बिरध अरु छोटा ॥
गौर—स्याम तन नील—पीत पट बनी दुहूँ की जोटा ।
सुफलक—सुत बालक कत लायौ कंस असुर बड बोटा ।
गहे केस कर धाए माइ पर सीस धरनि धर लोटा ।
‘परमानँद’ बलि—बलिऽब भुजनि की
हत्यो भोज—कुल छोटा—मोटा ॥

८६७

(सारंग)

आवै बाबा नंद कौ हाथी ।

बाहु बिसाल कमलदल—लोचन बल बिचित्र^३ कौ साथी ॥
अपनी इच्छा रहत बन—भीतर ग्वालनि के सँग खेल्यौ ।
केसी तृनावर्त्त जेहि मारे सकट पाँइ गहि पेल्यौ ॥
वासुदेव देवकीनंदन कंस—बंस कौ कालु ।
‘परमानंददास’ कौ ठाकुर नाइक नंद कौ लालु ॥

८६८

(सारंग)

देखौ माई ! गोबिंद अपने रस कौ ।

बल—विद्या कैसे हु न पईये केवल एक भगति के बस कौ ॥
ग्वालनि के सँग गाईं चराबत अनुदिन पर्यौ दूध कौ चसकौ ।
क्षीर—समुद्र में बसत निरंतर संत बिचार करत वा जस कौ ॥
‘परमानँद’ प्रभु त्रिभुवन—ठाकुर कैसें होत कंस के गस कौ ।
मारे मल्ल असुर सब जीते जद्यपि कान्ह बरस है दस कौ ॥

८६९

(सारंग)

आवै निरंकुस मातौ हाथी ।

देखि नयन—भरि कुँवर साँवरौ संकरषनु कौ साथी ॥
कहति नागरी सब मथुरा की कंस पगाइ ढहायौ ।
सब काहू कौ भलौ करैगौ जो गोकुल^४ तें आयौ ॥

१. मारि (ग. घ. ड. छ), २. दैतन (ख.)

३. संकरषन (ग. घ. ड. छ), ४. मथुरा में (घ)

तोस्थौ धनुष कुवलयया मास्थौ चारौ मल्ल पछारे ।
‘परमानंददास’ बलिहारी मंगल किए हमारे ॥

८७०

(सारंग)

आयौ मथुरा मल्ल हठीलौ ।
देखहु माई ! मोहन मूरति कंस—हृदै कौ कीलौ ॥
कुंजरदंत कंध धरि लीनें रुधिर—बिंदु लपटानें ।
सोभा भई स्यामसुंदर तनु मोरचंद सिरबानें ॥
गावहु नाचहु करहु कुलाहल घर—घर मंगलचारु ।
‘परमानंददास’ की जीवनि नाइक नंदकुमारु ॥

८७१

(सारंग)

देखि गोपाल कौ तमासौ ।
अबकें तौ नीकी बिधि ऊग्यो जैसें बरजे बासौ ॥
मारे दुष्ट संत सब राखे सुबसु कियो देवनिवासौ ।
‘परमानंददास’ बलिहारी ब्यास कियो है रासौ ॥

८७२

(सारंग)

काहे कों मारग में अघ छेटत ।
नंदराइ कौ मातौ हाथी आवत असुर लपेटत ॥
कहत ग्वाल सब सखा नंद के गल गरजत भुज ठोकत ।
कंस—बंस कौ परिचित करि^१ है कौन भरोसे रोकत ॥
नाहिन सुन्यौ पूतना मारी तृनावर्त्त बक केसी ।
‘परमानंददास’ कौ ठाकुर इहि गोपाल^२ औरे सी ॥

८७३

(सारंग)

सुदामा कें माधौ आए ।
चरन पखारि बैठारि सिंघासन विविध भाँति माला पहिराए ॥
तोस्थौ धनुष असुर सब मारे बालक आनंद मोद बढाए ।
माँगि लियो कुबिजा कौ चंदन वा के कूबर^३ उहाँहि लगाए ॥
फिरि आए देरा^४ फुनि बाबा नंद तहाँइ पाए ।
पाउँ धारिकें भोजन कीनों ‘परमानंददास’ गुन गाए ॥

१. हरि (घ.), २. गोकुल (घ.)

३. वाहि (ग. घ. ड. छ), ४. डेरा (ग. छ.) जहाँ अपने डेरा (घ)

८७४

(सारंग)

लागौ प्रीति कौ मोहिला हो ।

देखनि रूप नगर सब लाग्यौ मदनगोपाल उमाहौ ।।
जब तैं सुने नंदनंदन कौ लै आए अक्रूर ।
मथुरा ढोल दमामें बाजै कंस करैगौ चूर ।।
नर-नारी सब कौतुक आए गाढें देई असीस ।
'परमानंद' प्रभु राजु तिहारौ इहाँई रहौ जगदीस ।।

८७५

(सारंग)

महावत ! करिहो हाथी हाँतौ ।

जम-सदन पठवोंगौ पापी दै छाती पर लातौ ।।
दंत उपारि मारि या गज कों अबहिं करों भौं पातौ ।
तबहिं पाँउ धारिहौं आगें इहि मारि कुवलया मातौ ।।
रंगभूमि में मल्ल पछारौं ग्रीव कंस की तोरौं ।
बन्दि-वास बसुदेव-देवकी तिनहुके बंधन छोरोँ ।।
उग्रसेन के छत्र करौं सिर मथुरा जादौ-राज ।
'परमानंद' प्रभु कहत सदाई मोहि भक्तनि सौं काज ।।

८७६

(सारंग)

काहे तैं मदनगोपाल बिरोध्यौ ।

कीनों बैर स्यामसुंदर सौं भोज-बंस सब सोध्यौ ।।
तैंऽब कत मनुज करि जान्यौं परब्रह्म अवतारी ।
बीरसेन महँ कहति रुदन करि कंस नृपति की नारी ।।
ऐसी जानि बहुरि जिनि कोऊ नंदलाल सौं खौरौ ।
'परमानंद' कंस अभिमानी कितौक भीत पर दौरौ ।।

८७७

(सारंग)

मथुरानाथ सौं बिगारी ।

रंग-भोमि मँह पर्यौ भयानक क्यो पति रहेगी तुम्हारी ।।
तब काहे चेत्यौ नहिं पापी जब हि पूतना मारी ।
मूरख अधम कर्म-बस^१ तेरे बालक-सृष्टि पछारी ।।
विकल भई दोऊ कर मीडै कहै कंस की नारी ।
'परमानंददास' कौ ठाकुर गिरि गोवर्द्धन-धारी ।।

८७८

(गौरी)

जीत्यौ^१ बे^१ जीत्यौ नँदनंदन व्योम दमामे बाजै ।
 बरषत कुसुम देवगन गावत रितु मेघ^२ ज्यों गाजै ॥
 नाचत ग्वाल बजावत मुरली रंग-भोमि मँह राजै ।
 मल्ल पछारि कंस-सिर तोर्यौ नौतन भूषन साजै ॥
 तब हूँ हम आनँद में रहते मदनगोपाल निवाजै ।
 'परमानँद' प्रभु गोधन चारत डोलत कानन त्राजै ॥

८७९

(लोरठी)

अपने जन कहँ राज दियो ।
 उग्रसेन बैठारि सिघासन आपु जुहार कियो ॥
 रंग-भूमि महँ मल्ल पछारे कंस बाहु-बल मास्यौ ।
 हत्यौ रजक लीनें नाना पट पूरब-बैरु संभास्यौ ॥
 कापै होहि कौन करै ऐसी किहि इहि मोसरु आवै ।
 ठाकुर करै दास की सेवा सुख दै काज करावै ॥
 यामें कहा घटै श्रीपति कौ जानि गरीब निवाजै ।
 'परमानंददास' कौ ठाकुर जसु तिहुँ लोक बिराजै ॥

८८०

(सारंग)

नीकौ मथुरा नगरु ।
 मूरतिवंत सदा संतनि हित स्याम सगरु ॥
 जनम मरन^३ मुंजी-ब्रत दाहक मुक्ति अगरु ।
 कोउ कैसैं रहौ करी नाहिन कगरु ॥
 उत्तम मध्यम अधम भेद नहिं एक हि डगरु ।
 'परमानंद' स्वामी महातमु अधिक लगरु ॥

26. गोपी-बिरह

८८१

(सारंग)

चलत हूँ न कान्ह कह्यौ रहनों ।
 लै अकूर चले गोविंद कों मधुपुरि ही कौ लहनों ॥
 बिनु ब्रजनाथ अनाथ भई हम लागीं दुख सहनों ।
 गोकुल-ससि कान्ह बिना चाँप्यौ मनु गहनों ॥

१. जीत्यो है (ड. छ.) जीत्यो हो (ग.)

२. बरषा (ग. घ. ड. छ.), ३. करम (ड. छ.)

माई बिरहानल दुखित^१ भयौ लाग्यौ देह दहनों ।
‘परमानंद’ संग समुझि लोचन जल बहनों ॥

८८२

(सारंग)

चलत^२ हूँ न देखनि पाये लाल ।
नीक करि न बिलोक्यौ हरि—मुख इतनौ रह्यौ जिय साल ॥
लोचन मूँदि रहे जल—पूरति दुष्ट भये तिहिं काल ।
दूरि भएँ रथ ऊपर देखे मोहन मदनगोपाल ॥
मीडति हाथ बिसूरति सुंदरि आतुर बिरह—बिहाल ।
‘परमानंद’ स्वामी फिरि चितयो अंबुज—नैन बिसाल ॥

८८३

(सारंग)

जिय की साध जिय हीं रही री ।
बहुरि गोपाल देखनि न पाए बिलपति कुंज अहीरी ॥
इक दिन सो जु सखी इनि मारगु बेचनि जात दही री ॥
प्रीति के लिये दान मिस मोहनु मेरी बाँह गही री ॥
बिनु देखें घरी जात कलप भरि बिरहा—अनल दही री ।
‘परमानंद’ स्वामी बिनु दरसन नैननि नदी बही री ॥

८८४

(सारंग)

कौन बेर भई चले री गोपालहिं ।
हौ मौसार^३ गई हो न्यौंते बार—बार बूझति ब्रज—बालहिं ॥
तेरे तन कौ रूपु कहाँ गयौ भामिनि ! अरु मुख—कमल सुकाइ^४ रह्यौ ।
सब सौभाग गए हरि के सँग हृदौ सुकोमल बिरह दह्यौ ॥
को बोलै को नैन उघारे को ऊतर देई बिकल मन ।
जो सरबसु अक्रूर चुरायो ‘परमानंद’ स्वामी जीवन—धन ॥

८८५

(कल्याण)

विधिना बिधि करी बिपरीत ।
स्याम—मनोहर बिछुरनि लागे बालदसा के मीत ॥
लै अक्रूर चले कहु मधुबन सब ब्रज भयौ भय—भीत ।
विवस भए तबहि हम जाने गरग जु गाए गीत ॥

१. प्रचुर (क.), २. चलत न देखन (क.)

३. प्यौसार (छ. ग.) ननसार (ग.), ४. सुखाइ (ड. छ.)

चूक परी सेवन नहिं पाए चरन—सरोज पुनीत ।
‘परमानंद’ अब कबहि मिलहिंगे सुबलु—श्रीदामा—मीत ॥

८८६

(सारंग)

सरबसु लै गए ब्रज खाली ।
तुम्हारे बिरह साँबरे माधौ ! काम—धेनु भई टाली ॥
वृंदावन हरी^१ तृनु दै—दै काहे कों प्रतिपाली ।
अब ऐसी कीनी तुम नागर ! सोक सिंधु मँह^२ घाली ॥
स्याम—मनोहर बिछुरनि लागे बिरह भली करि^३ जाली ।
‘परमानंद’ प्रभु सींचि जियावहु ज्यों ग्रीष्म—रितु माली ॥

८८७

(केदारौ)

जिनि गोपालहि जानि दैहि ।
अब ब्रज नंद बगदि आए हूँ इहि मन पछतावौ लेहि ॥
मोहन कान्ह मोहिनी मथुरा मोहन लोगु मोहिनी नारि ।
मोहन गति मोहिनी हरि—लीला मोहन गति त्रैलोक—मझारि ॥
बसुदेव पिता देवकी माता इहि सब प्रगट भई नर लोक ।
‘परमानंद’ स्वामी कत आवहिं^४ सुंदर—स्याम बिनासन—सोक ॥

८८८

(सारंग)

तहाँई अटक जहाँ प्रीति नई ।
वह रस गयो जु बालदसा कौ अब गोपाल—मति और भई ॥
कवन दोस दीजै ब्रजनाथहि^५ परंपरा ऐसी चलि आई ।
कँटक कंस हुतौ सो मास्यौ राजधानी मथुरा की पाई ॥
अब जो कृपा करहि^६ तो आवहिं^७ कृपनपालु प्रभु जदुराई ।
‘परमानंद’ स्वामी सरबेसुर राम—कृष्ण दोउ भाई ॥

८८९

(सारंग)

अहो ! तुम गोबिंद सौ कहियौ जाई ।
बहुत दिवस प्यारे मनमोहन मैं नाहिन सुधि पाई ॥
नंदग्राम तैं अपनि दासिका मथुरा गुपत पठाई ।
सुहथ पत्रिका लिखि मृगनैनी अपनी प्रीति जनाई ॥

१. हरिय, २ में (ग. ड. छ.), ३. परि (ग. ड. छ.)

४. आवै (ट. छ.), ५. ब्रजनाथै (घ.), ६. करै (ड. छ.), ७. आवै (ड. च)

चरनकमल गहि विनती कीनी बैठे जहाँ कन्हाई ।
ताकौ कौन हाल नँदनंदन अपने संग खिलाई ॥
ओइ तौ तनु-मनु तुमहि समर्थो चरनकमल लपटाई ।
'परमानंद' प्रान आतुर हरि ! बारक देहु दिखाई ॥

८६०

(सारंग)

जानी कान्ह पुरातन जोरी ।
करचक^१ हुती पहले हि नाँते सोई प्रीति चटक^३ दै तोरी ॥
तृन^४ तरवर सींचेई पलु है जो बरषत है मेघ बहोरी ।
जोबन गयौ बहुरि नहीं आवै जो सुर द्रव तेतीस करोरी ॥
तुम दिन तरुन किसोर मूरति हास-बिलास लेत चितु चोरी ।
'परमानंद' मिलन कब है है करति बिषाद राधिकागोरी ॥

८६१

(सारंग)

कान्ह बिनोदी रे ! मधुबनियाँ ।
अब काहे कों गोकुल आवहि^५ भावति नव-जोबनियाँ ॥
बाल-दसा तें मैं जु खिलाये लएँ^६ रहति ही कनियाँ ।
सुनि री सखी ! कहाँ लगु बरनों उन्हकी प्रीति अपनियाँ ॥
पाँच बरष तें पहिरनि सिखये लाल पटंबर तनियाँ ।
अपनें हाथ पोवति पहिरावति कंठ कनक के मनियाँ ॥
तब वह चोंप स्यामसुंदर की भये गोरस के दनियाँ ।
'परमानंद' सुमिरि वह बातें नयन बहत घन पनियाँ ॥

८६२

(सारंग)

मेरी सुरत्यौ गई ।
मथुरा बसत नँदनंदन प्रीति भई नई ॥
इतनि दूरि इहै मथुरा निकट कियो विदेस ।
कागद मसि खूटि गई पठयौ न संदेस ॥
हरिनी ज्यों जोवति मगु ऊरध लेति उसास ।
इहै दसा देखि जाहु 'परमानंददास' ॥

१. लौ लाई (ग.), २. रंचक हुती (ग. घ. ड. छ.), ३. तृटक (ड. छ.),

४. तरवर तृन (क)। तरवर बिन सींचे
नहीं पलु है जो बरषे रितु० (ड. छ.)

५. आवै (ग. ड. छ.), ६. लिये (ग. ड. छ.)

८६३

(सारंग)

सुधि करति कमलदल-नैन की ।

भरि-भरि लेति नीर अति आतुर रति वृंदावन चैन की ॥
गाढे आलिंगन दै-दै मिलति ही कुंजलता-द्रुम-ऐन की ।
वे बतियाँ कैसैं कें बिसरति बाँह उसीसे सैन की ॥
बसि निकुंज में रास खिलाये बिथा गँवाई मैन की ।
'परमानंद' प्रभु सो क्यों जीवहि जो पोषी मृदु बैन की ॥

८६४

(सारंग)

वे बात कमलदल-नैन की ।

बार-बार सुधि आवति सजनी वह दुरि दैनी सैन की ॥
वह लीला वह रास सरद कौ गोरज-रंजित आवनि^१ ।
अरु वह ऊँची टेर मनोहर मिस करि मोहि सुनावनि ॥
वे बातें सालति उर-अंतर को पर पीर हि पावै ।
'परमानंद' कह्यौ न परै कछु हियौ सुरुँध्यो आवै ॥

८६५

(सारंग)

बिधाता ! करहु हमारौ भावतौ ।

नंद गोप कौ लाल मिलावहु^२ जो रस-रास खिलावतौ ।
वे दिन कहाँ रसिक वृंदावन अधर पीयूष पिवावतौ ।
ऐसी प्रीति परस्पर करतौ कर गहि कंठ लगावतौ ॥
कमलनयन केतौ सुख देतौ जब मुरली रस गावतौ ।
स्याम-कलेवर गोरज-मंडित बासरगत ब्रज आवतौ ॥
तब वह कृपा स्यामसुंदर की नैननि नैन मिलावतौ ।
'परमानंद स्वामी सुख-सागर बिरह-ताप बिसरावतौ ॥

८६६

(सारंग)

लाल ! तुम कौन बिनोद कियौ^३ ।

वृंदावन बसि कुँवर लाडिले ! सब संतोष दियौ ॥
जो सरूप मन-बचन-अगोचर सो तुम प्रगट दिखायौ ।
नंदकिसोर बाललीला धरि सबकौ भलौ मनायौ ॥

१. वन तें आवनि (क. ख.), २. रसीलौ (छ.)

३. किये (ग. घ. ड. छ.), ४. दिये (ग. घ. ड. छ.)

गिरि-तर^१ वर-सरिता-पसु-पंछी बपु हि दिखाइ निस्तारे ।
'परमानंददास' कौ ठाकुर दीनानाथ मुरारे ॥

८६७

(सारंग)

हरि बिनु अब ऐसे दिनु आए ।
रूप सुभाव तेज या तन कौ लै गोपाल सिधाए ॥
एक दिवस^२ सूती^३ आँगन महि^४ कंकन कान्ह चुराये ।
तब^५ हँसिकें हौं माँगन लागी कुसुमलता अरुझाए ॥
सुमिरत बाल-दसा की बातें नैन नीर भरि आए ॥
'परमानंददास' क्यों जीजै प्रीतमु भये पराए ॥

८६८

(सारंग)

जो पै कोऊ माधौ सौं कहै ।
तौ कत कमलनयन मथुरा मँहि एकौ घरी रहै ॥
प्रथम हमारी दसा सुनावै गोपी बिरह दहै ।
हा ! ब्रजनाथ ! रटति^६ बिरहातुर नैननि नीर बहै ॥
बिनती करि बलवीर-धीर सौं चरन-सरोज गहै ।
'परमानंद' प्रभु इत सिधारिबौ ग्वालनि दरसु लहै ॥

८६९

(सारंग)

मोपें हरि बिनु रह्यौ न जाइ ।
कमलनयन घनस्थाम मनोहर चले^७ उमाहौ लाइ ॥
प्राननाथ मधुपुरी सिधारे सब गोकुल कर लाइ ॥
वा मूरति कौ ध्यान धरत^८ मेरौ मन राख्यौ^९ बौराइ ॥
प्रगट मिलें तौ काहे न जीजै अवधि-बचन की आस ।
कबहुक बिरह प्रान लै जैहै कहै^{१०} 'परमानंददास' ॥

९००

(सारंग)

प्रीति माई ! बिनु भएँ बरु रहती ।
मधुवन चलत गोपाललाल कें कत एतौ दुख सहती ॥
कत इहि कामु कटकई करतौ कत बंसत-रितु दहती ।
बिनु बरषा-रितु नैन जलद तैं उर-सरिता कत बहती ॥

१. गहवर (ग. घ. उ. छ), २. द्यौस (घ), ३. सोई (ग), ४. में (ग. घ. उ. छ)
५. जब (उ. छ), ६. विलपति (उ. छ), ७. चलि लै मोहि मिलाइ (क.)
८. धरत ही (ग. उ. छ), ९. रह्यो भुराइ (ग. उ. छ), १०. सुनि (उ. छ)

जो जानती बहुरि नहिं आवनु चलत^१ धाइ पटु गहती ।
‘परमानंद स्वामी के बिछुरे अनत न सुख^२ सचु लहती ॥

६०१

(सारंग)

गोबिंद बीचु दै सरमारी ।

उर-तिन-कुटी बिरह-दावानल फूँकि-फूँकि सँधि जारी ॥
सोच पोच तन^३ छीन भयौ अति कैसी देह बिगारी ।
जो पहिलें हरि^४ हित कारन बिधिना सुहथ सँवारी ॥
बरु गोपनु घर जनमु न लेती रहति गरभ में डारी ।
‘परमानंद’ इतनी^५ कत होती नाँउ धर्यौ ब्रज-नारी ॥

६०२

(सारंग)

मेरौ मन उहाँई^६ चाह करै ।

वह मुसकानि बंक अवलोकनि हृदैं तै न टरै ॥
जब गोपाल गोधन-सँग आवत मुरली अधर धरै ।
मुख की धूरि दूरि अंचर करि जसोमति अंक भरै ॥
संध्या-समै घोष मे डोलत वह सुधि क्यों बिसरै ।
‘परमानंद’ प्रीति अंतरगत सुमिरत नैन भरै ॥

६०३

(सारंग)

जोबन काहें कोऽब गयौ ।

अब इहि देह देखि दुख लागत हरि सौं बीचु भयौ ॥
सकुचत गात बात नहि आवत^७ केस पलित भई बानी ।
लोचन तिमिर पंथ नहि सूझत काम-प्यास मंदानी ॥
तीन अवस्था करी बिधाता ता मँह इहि गति पोच ।
‘परमानंद’ बिरहिनी गोपी बर-बार जिय सोच ॥

६०४

(सारंग)

क्यों ब्रज देखनि हैं हरि आवत ?

नव बिनोद नई राजधानी नौतन नारि मनावत ॥

१. तो धाइ पीतपट (क.), २. कछु सुख (उ. छ.)

३. सूकत अंतर तन (ग. उ. छ.)

४. विधि हरि के कारन अपने हाथ सँवारी (ग. उ. छ.)

५. एती (ग. उ. छ.), ६. ह्यौई (ग.), ७. आवै (ग. उ. छ.)

सुनियत कथा पुरातन इनि की बहुत लोक है गावत ।
मधुकर न्याँइ सकल गुन चंचल रस लै रति बिसरावत ॥
को पतिआइ स्याम तन^१ कै तब जे पर-मनहि चुरावत ।
'परमानंद' प्रीति पद-अंबुज हरि-अंतरगत भावत ॥

६०५

(सारंग)

ता बिनु बीतत कठिन दिना ।
हमारें प्रीतम कोउ नाँहिन एक गोपाल बिना ॥
माता-पिता सजन-बंधव सब करत रहे उपहास ।
सब की छाती पाँउ दै गई स्यामनोहर-पास ॥
इहि ब्रत नेमु निबाहें बनिहै जब लगि है उर-स्वास ।
तन-मन-प्राण समर्पनु कीनौ चित चातक ज्यों प्यास ॥
बाल-बिनोद सँभारति पुनि-पुनि लोचनि मुंचति वारि ।
'परमानंद' प्रभु मधुवन गवने जाम जात जुग चारि ॥

६०६

(सारंग)

अब कै^२ बन-बन फिरति बही ।
तब काहे न गोपाललाल-रस छिनु इक संग रही ॥
पूरब-संचित सुकृत-रासि-फल श्रीपति बाँह गही ।
तू ग्वालिनी जोबन की^३ माती गरब की बात कही ॥
कहा पछितायें होहि अबहि कें बिरहा-अनल दही ।
'परमानंद' अब का सों खेलें हरि-बिनु सोच सही ॥

६०७

(सारंग)

पथिक ! इहि पंथ न कोऊ आवै ।
गोकुल देत दाहिनों-बायों हम हि देखि दुख पावै ॥
का सौ कुसल संदेसौ पाऊँ का प्रीतम मन भावै ।
मथुरा निकट भई^४ सत जोजन को हरि बात सुनावै ॥
ब्रज-बनिता बिरहानल-जारी^५ को तन-तपति बुझावै ।
बिधि प्रतिकूल 'दास परमानंद' को हरि^६ आनि मिलावै ॥

१. तू नेकों ते (क)स्यामघन तन कों (घ), २. क्यों (ग)

३. मदमाती (ड. च. छ), १. करी (ग. घ. उ. छ),

२. व्यापित (ग. ड. छ), ३. तन सींचि जिवावै (ग)

६०८

(सारंग)

सखी री ! अब चित्त कौन बिचार ?
 वह सुख वह रस वह मन—आनँद लै गए नंदकुमार ॥
 रह्यौ मैल भरि टूटि गई सरि वह मुक्ता—मनि—हार ।
 का कौ पहिरि ओढि दिखराऊँ नवसत साजि सिंगार ॥
 सब बिसर्यो गोपालहिं बिछुरें भोजन सयन बिहार ।
 'परमानँद' स्वामी के^१ बिछुरें ब्रज चाँप्यौ दुख—भार ॥

६०९

(सारंग)

सखी री ! ता दिन काजर दैहों ।
 जा दिन नंद—नँदन के नैननि अपने नैन मिलैहों ॥
 करिहों न तिलक तँवोर तिरोनाँ बसन पलटि पहिरैहों ।
 करौं हटतार^२ सिंगार सकल कौ कंठनि पोत बँधैहों ॥
 अब तौ जिय ऐसी बनि भूलि न अनत चितैहों ।
 'परमानँद' प्रभु इहै परेखौ या^३ करिकै मरि जैहों ॥

६१०

(सारंग)

ब्रज में बातें पै रही ।
 सुमिरत ही सालति उर—अंतर मदनगोपाल कही ॥
 सुनि री सखी ! बिथा या तन^४ की ज्यों बन—बेलि दही ।
 'परमानँद' स्वामी के बिछुरें बन^५—बन फिरति बही ॥

६११

(सारंग)

कान्ह—सँदेसे^६ तें ऊ टूटी ।
 आखर चारि लिखि न पठावत मसि—कागद उत खूटी ॥
 तब जु कह्यौ हम सौ हरि आवनि सोउ मरजादा फूटी ।
 का सौं करौं पुकार अकेली मदन—चोर इत लूटी ॥
 बाल—दसा हिलि—मिलि कें खेले सोउ प्रीति अब छूटी ।
 'परमानँद' एती कत होती दै चलते बिस—घूँटी ॥

१. बिन इहि गति (ग.)

२. हठतार (उ. छ.), ३. आकरषे (ग. घ. उ. छ.)

४. मन (ग. छ.), ५. घर—बन (क. ग. उ. छ.), ६. संदेसन (घ.)

६१२

(सारंग)

किते दिन भए रेनि सुख सोएँ ।
 कछु न सुहाइ गोपालहि बिछुरे रहे पूँजी सी खोएँ ॥
 जब तैं गए नँदलाल मधुपुरी चीर न काहू धोए ।
 मुख तंबोर नयन नहिं कज्जर बिरह सरीर बिगोए ॥
 ढूँढत घाट बाट बन परबत जहाँ—जहाँ हरि खेल्यौ ।
 'परमानँद' प्रभु अपनौ पीतांबर मेरे सीस पर मेल्यौ ॥

६१३

(सारंग)

दिन—दिन तोरन लागे नातौ ।
 मथुरा बसत गोपाल पियारे प्रेम कियौ हठि हातौ ॥
 इतनी दूरि जु आवत नांहेन मन औरहि ठाँ रातौ ।
 मदनगोपाल हमारे ब्रज की चालत नांहेन बातौ ॥
 बिरह—बिथा अब जारन लागी चंद भयौ अति तातौ ।
 'परमानँद' स्वामी के बिछुरे भूलि गई अब सातौ ॥•

६१४

(सारंग)

माधौ काहे कौं दिखाई अपनी काम की कला ।
 तुम सौं जोरि सबनि सौं तोरी नंद के लला !
 जो गोपाल मधुवन ही बसते गोकुल—बास न करते ।
 जो हरि गोप—भेष नहिं धरते कत मेरौ मन हरते ॥
 तुम्हारौ रूप तजि और न भावै चरन—कमल मन बाँधौ ।
 'परमानँद' प्रभु द्रोण—बान ज्यों बहुरि न हूँ जो साँधौ ॥

६१५

(सारंग)

माई री ! अब तो डरु लागत बृंदावन जात ।
 गोबिंद—बिनु भीत भए तरवर के पात ॥
 उई निसि उई ससि उई सखी साथ ।
 उई गुल्म—वल्ली पै परत नहीं हाथ ॥
 उई समीर जमुना तीर दहत है सरीर ।
 'परमानँद' प्रभु सीतल निधि नांहेन बलबीर ॥

• पाठभेद और परिवर्तन से सूरसागर में प० सं० ४५५२ पर भी

१. दूजौ (ग. घ.)

६१६

(सारंग)

कान्ह मनोहर मीठे बोलै ।

मोहन—मूरति कब देखोंगी सरसिज चंचल डोलै ॥
 स्याम सुभग तन चंदन—चरचित पहिरें नील^१ निचोलै ।
 हीरा लाल कंठमनि माला नंद लए बहु मोलै ॥
 बेनु बजावत गावत आवत उर—कपाट प्रभु खोलै ।
 'परमानंद' स्वामी सुख—सागर बाल—दसा—गुन लोलै ॥

६१७

(सारंग)

माधौ मुख देखे के मीत ।

पाछें कौन^२ कौन को चलवत मँडहा—तर के गीत ॥
 सो प्रीतम जो और निबाहै सदा करै निहचीत ।
 मथुरा बसत देवकीनंदन सुनी कथा विपरीत ॥
 सब ही प्रान समरपनु कीनी^३ अघर—सुधा—रस पीत ।
 'परमानंद' प्रभु पाँइ लागिये कंस मारि रनु जीत ॥

६१८

(सारंग)

कबहुक साँवरौ माई ! गोकुल आवै ।

मदनगोपाल त्रिभंगी सुंदर कब^४ वह बदनु दिखावै ॥
 मोर—चंद कौ मुकटु बनायौ कटि पीतांबर सोहै ।
 बाल गजेन्द्र—चाल मन मोहै या उपमा कौ को है ॥
 जाकौ जसु त्रैलोक्य सुमंगल बेद—उपनिषद भाख्यौ ।
 सो प्रभु कृपावंत 'परमानंद' लीला गोकुल राख्यौ ॥

६१९

(सारंग)

कब लागि मन करों हौं धीरौ ।

मदन—मूरति मेरे नैननि लागी स्याम बरन पट पीरौ ॥
 आजु सखी सपने में भेटे मिलत भयौ तन सीरौ ।
 अब कहा जरनि कहीं जागे तें तपति हरन नहिं नीरौ ॥
 सुनि री सखी ! कहौ अब का^५ सौं सुख कौ आँकु बिधि कीरौ ।
 'परमानंददास' कौ ठाकुर निकसि गयौ हरि हीरौ ॥

१. पीत (ग. घ. ड. छ), २. को का की चलवत (ग. ड. छ.)

३. कबहूँ (ड. छ), ४. को हौं (ग.)

६२०

(सारंग)

इहि बिरियाँ बन तें आवते ।

दूरहि तें बेनु अधर धरि बारंबार बजावते ॥
 कबहुक केहू भाँति चतुर चित अति ऊँचे स्वर गावते ।
 कबहुक लै^१ लै नामु मनमोहन^२ धौरी धेनु बुलावते ॥
 इहि मिस नाँउ सुनाइ स्यामघन मूरछ—मदन जगावते ।
 आगम—सुख उपचार विरह—जुरि वासर—अंत नसावते ॥
 रुचि—रुचि प्रेम प्यासी^३ नयनन्हि दै क्रम—क्रम बलहि बढावते ।
 'परमानंद' प्रभु गुन—निधि दरसन पुनि पथ प्रगट करावते •

६२१

(सारंग)

सुनि सखि ! जोबन—सिंधु लट्यौ ।

तेज स्वभाव रूप या तन कौ बिनु ब्रज—नाथ घट्यौ ॥
 ता दिन तैं बिधि और करी कछु उलटे हि ठाठु ठठ्यौ ।
 है उहि बात सबै इहिं गोकुल पुन्य कौ अंकु कट्यौ ॥
 बज्रहु तें कठिन जानति हौ बिरहा हयौ न फट्यौ ।
 'परमानंद' स्वामी के बिछुरें चात्रुक भयौ रट्यौ ॥

६२२

(सारंग)

कमल—नयन बिनु औरु न भावै अन्^४ दिनु रसना कान्ह—कान्ह रट ।
 रोदन कै—कै नैन गँवाए बिलखत बदन ठाढी जोवति बट ॥
 तुम्हारे परस—बिनु वृथा जातु है मेरे उरज धरे कंचन—घट ।

ए^५ गोपाल प्रभु तबहिं मिलहुगे

जबहिं होइगी सीस सुकल लट ॥

दुर्बल भई देह छाँडे सुख

और बात बिसरि मलिन भए पट ।

'परमानंद' प्रभु अबहिं बिसरि गयौ

हमरौ तुम्हरौ खेलु रयनि जमुना—तट ॥

१. धौरी धेनु मनोहर लै—लै नाउँ (ग. ड. छ.)

२. मनोहर (घ)

३. प्रिया सैननि दै (घ. ड. छ.)

• पाठान्तर से सूरसागर प० सं० ३८१६ पर भी

४. अहनिस (ग.), ५. नंद—गोप—सुत (घ.)

६२३

(सारंग)

हरि ! भए और के मिलनियों ।
 बाल^१—दसा तें मैं काहे कों लै जु खिलाए कनियों ॥
 जानै को बिधाता की गति कुबिजा नव—जोबनियों ॥
 'परमानंद' प्रभु प्रकट दिखाई चपल प्रीति आपनियों ॥

६२४

(सारंग)

हरि तेरी भावती जु पहेली ।
 बार—बार चित चाह करत है उह^२ हि लाड़ गहेली ॥
 बसन कुचील चिकुर अति रूखे सजल नैन मुख—मलिनी ।
 या तन की गति ऐसी देखी हेम—हई जैसी नलिनी ॥
 बाल—दसा जासों मिलि खेले मीठे बचन दुलारी ।
 'परमानंद' प्रभु प्रिया राधिका बिछुरि काम—सर मारी ॥

६२५

(धनाश्री)

ते दिन चलि गए मेरी माई !
 इहि कानन हिलि—मिलि खेलत हे कमल—नयन लरिकाई ।
 उहि रस प्रीति बाल—लीला कौ तब दै सैन बुलाई ।
 मातु—पिता काहू नहिं जानी तैसें हरि पँहि आई ॥
 नव—जोबन धन नंद—सुवन पिय कर गहि कंठ लगाई ।
 ऐसी मिलनि स्यामसुंदर की रयनी कुंज बसाई ॥
 लेखे कौन हमारे लागै जो रजधानी पाई ।
 'परमानंद' स्वामी की बातें समुझि बधू पछिताई ॥

६२६

(सारंग)

तब उहि कृपा प्रीति अधिकाई ।
 एकौ घरी न मो—बिनु रहते बालक—दसा कन्हाई ॥
 एक दिवस^३ सूती आँगन मेंह डेली मेलि जगाई ।
 उठि राधिका कमल—मुख देखौं नैननि परै जुडाई ॥
 नैकु रिसाइ रही जो पिय सौं करि मनुहारि मनाई ।
 उइ^४ गुन सुमिरि^५ दास 'परमानंद' हृदैं न दाह बुझाई ॥

१. बालक (ख.), २. उहाँई (ग. घ. ङ. छ.)

३. द्यौस (ङ. छ.), ४. वे (क. घ.) वेइ (ङ. छ.)

५. समुझि (क. ग. घ. ङ. छ.)

६२७

(सारंग)

दिन चारि आइबौ पहिले हु^१ नातैं ।
 स्यामसुँदर^२ गोबिंद ! खेल-बिनु
 जाति है वृथा सरद की रातैं ॥
 बरसु दिन बीतगौ^३ अवधि ऐसी भई
 बेद-बानी क्यों टरै टारी ।
 बहुरि परतीति को करै जादौराइ !
 मरति गोपीबुंद बिरह की मारी ॥
 कहौ ऊधौ ! चरन-अंबुज टेकि
 नंद-नंदन बहुरि वेद-रस दीजै ।
 मिलहु अब की बार जियत ब्रजपाल !
 प्रेम 'परमानंद' प्रगट कीजै ॥

६२८

(धनाश्री)

लेहु माई ! चरननि कौ चंदनु ।
 ब्रह्मा महादेव इन्द्रादिक इहि सबहू कौ बंदनु ॥
 स्याम सरीर कमल-दल-लोचन भावत है नँदनदनु ।
 जो मथुरा-मानिनी-मनोहर लाला कंस-निकंदनु ॥
 बाल-बिनोद राधिका-बल्लभ रूपु देखि अस्पंदनु ।
 'परमानंददास' कौ ठाकुर जोगी जन-मन-रंजनु ॥

६२९

(सारंग)

कमल-नयन कौ मथुरा राजु ।
 चलहु सखी ! मिलि देखनि जईये
 अब धौँ कहाँ कियौ है साजु ॥
 सुनियत हैं वे भेषु उतारे मोर मुकुट गुंजा-मनि-हार ।
 'परमानंद नए-नए भूषन पहिरनि लागे राजकुमार ॥

१. पहिलेउ (क. ग. घ. ङ. छ.)

२. गोविंदचंद-संग खेले बिनु (ग. घ.)

३. गयो (ग. घ.)

६३०

(सारंग)

• जदपि हौं बाबरी गँवारि ।

कान्ह प्यारे कौं यौं भावति ही ज्यों प्यासे कौं वारि ॥
घरी-घरी कौं रूसनौ अरु घरि^१-घरि की मनुहारि ।
घरी-घरी हँसि बोलावनौ^२ सुख पावते मुरारि ॥
जब मोहि नैक अनमनी देखत बाँधत बार सँवारि ।
ओइ^३ गुन सुमिरि 'दास परमानंद' हृदौ बिरह-दौ जारि ॥

६३१

(सारंग)

सँभारौ माधौ^४ पहिले बोल ।

जे तब कहे सबे पलटाने सँग बन करत कलोल ॥
अपनें हाथ करि मोहि पहिरावत मेरेई नील निचोल ।
कसन कंचुकी बाँधते कबहूँ हस्तकमल अति लोल ॥
बिसरि गये रजधानी पाई क्यों जिय कियौ निटोल ।
'परमानंद' प्रभु दासि और भई लोगु^५लिए बहु मोल ॥

६३२

(सारंग)

माधौ ! इतनी दूरि टरि गए काल ।

मिलत कहा घटि जात मनोहर !

जसुमति केरे लाडिले लाल ॥

जोवत पंथ मलिन^६ भए लोचन

बिनु दरसन हम भई बिहाल ।

निकट विदेस कियौ क्यों जीजै

ब्रजनाइक ! तुम्ह औरहि ख्याल ॥

जब उहि सुरति संग की आवै

हृदौ चटपटी परति गोपाल ।

'परमानंद' प्रभु अवधि अधिक भई

को मेतै छतियाँ कौ साल ॥

-
- जद्यपि ० (ग. घ. ङ. छ.) से भी प्रारंभ ।
१. घरी-घरी मनुहारि (ङ. छ.), २. बुलावते (ङ. छ.)
३. 'परमानंद' प्रभु वह गुन सुमिरत (ग. घ. ङ. छ. ङ.)
• सँभारहु० से भी प्रारंभ,
४. गिरिधर (क. ग. ङ. च.), ५. लोक (क.), ६. मिलत (घ)

६३३

(सारंग)

वे दिन या देह अछित बिधनों जो आनै री ।
 स्यामसुँदर—संग रंग जुवति—वृंद ठानै री !
 जद्यपि अक्रूर कूर परमगति पठावै री ।
 नंदनँदन प्राननाथ बंसी न बजावै री ॥
 कहा करौं परम कठिन कह्यौ कोउ न मानै री !
 'परमानँद' विरह—पीर बिरही पै जानै री ॥ •

६३४

(सारंग)

कहा बूझति तन की दुबराई ।
 इहि^१ थोरी जियत रहियत है बिछुरे कुँवर कन्हारै ॥
 जा दिन तैं मधुपुरी सिधारे राम—कृष्ण दोउ भाई ।
 ता दिन तैं ब्रजबासी लोकनि घर—बन कछु न सुहाई ॥
 जागत सपन रयनि अरु बासर हरि-बिनु कल न पराई ।
 'परमानंददास' की^२ जीवनि कब^३ मिलहिंगे आई ॥

६३५

(सारंग)

••इह परवानों लोगनि कौ सो मैं देख्यो आँखि री ।
 कमल—नयन ऐसी करी^४ बचन मनोहर भाखि री ॥
 अपनी अरथ आदर करै न्योति जिंवावै खीर री ।
 चाउ सरें दुख बिसरयो ओइ छाछ न देत अहीर री ॥
 जब लागि जोबन—धन रह्यौ तब लागि कीनी प्रीति री ।
 'परमानंद' स्वामी हरि कीनी षटपद की सी रीति री ॥

६३६

(सारंग)

••• माई री ! मदन—बान मारि गए मदन—मूरति कोउ ।
 स्यामसुँदर चपल नयन भावत मोहि सोऊ ॥

• साधारण पाठ—भेद के साथ पद सं० ४०२० पर सूरसागर में भी

१. इहै थोरी है जु जीवत रहियतु (ख.)

२. दास कौ ठाकुर (ख)

३. कबहि मिलेंगे (ग.)

•• इहै (ङ. छ) से भी प्रारंभ

४. है कीनी (क. ग. ङ. छ.)

••• मदन—बान (ग.) से भी प्रारंभ।

सपने में^१ डहकि गए दै आलिंगन गाढे ।
जागे^२ तें दुखित नयन जल—प्रबाह बाढे ॥
मंद^३ हास गति—बिलास ताकी हौं चेरी ।
सरबसु लै अनत गए ऐसी गति मेरी ॥
कैसे^४ कें^५ प्रगट मिलौं कैसें करि देखौं ।
'परमानंद' भाग—दसा इतनौं करि^६ लेखौं ॥

६३७

(सारंग)

परदेसी कौ नेह सखी री ! अंत नहीं ठहरात ।
खायौ पियौ डगर उठि लाग्यौ ताकौ कहा पिरात ॥
सुनि बाबरी ! भूलि जिनि काढै कठिन बिरह की घात ।
मेरे जान^६ नंदनंदन—बिनु द्यौस कल्प—सम^७ जात ॥
कौन अभागी जो बिसरावै स्याम—मनोहर—गात ।
'परमानंद' स्वामी के बिछुरें अब गोकुल उतपात ॥

६३८

(सारंग)

स्याम ढिटोंना मोही री माई !
रंचक सकुच हुती मेरे जिय गहि अंचर मेरी लाज छुडाई ॥
बाल—दसा हौं कछुवे न जानौं लै निकुंज में^९ बातनि लाई ।
पत्र बिछाइ तहाँ बैठारी तरु कंदंब की छाँह सुहाई ॥
ऐसे चतुर नंद के ढोटा^८ बोलि न जानौं बरहि बुलाई ।
अपने हरि की प्रीति निरंतर चलि री सखी ! गोपाल मनाई ॥
बह रति^८ केलि—सुरति जो आवै चार्यौ^{१०} जाम समीप बसाई ।
'परमानंद' स्वामी मनमोहन पहिली कथा सबै बिसराई ॥

६३९

(सारंग)

बहुरि वे दिवस कहाँ मेरी माई !
मदनगोपाल मिलत जब हँसि कै काम—केलि सुखदाई ॥
एक बार बिहरत बन—अंतर मेरी लट कुसुम^{११} अरुझाई ।
आपुनि हँसत दूरि भए ठाढे हडि करि गारि दिवाई ॥

१. मोहि (क. घ.) २. जागों तौ (ग.) ३. गति—बिलास मधुर हास (क. घ.)
४. करि (घ.), ५. सुख (क) फल, ६. जानें (ग. घ. ड. छ.), ७. भरि (घ.)
८. नंदन (घ.), ९. रस (घ.), १०. चारों, ११. मुद्र.,

मानु करत मेरौ महतु राखते करि मनुहारि मनाई ।
‘परमानंद’ सुमिरि वह^१ बातें सोचति अरु पछिताई ॥

६४०

(सारंग)

मोहन ! वह क्यों प्रीति बिसारी ?

कहत सुनत समुझत चित—अंतर दुख लागत है भारी ॥
एक दिवस खेलत बन—भीतरु बैनी सुहथ सँवारी ।
बीनत फूल गयौ चुभि कंटक ऐसी सही बिथा री ॥
मो^२ पर कठिन हृदौ अब कीनों लाल गोवर्द्धन—धारी ।
‘परमानंद’ बलबीर बिना हौ^३ मरति बिरह की जारी ॥

६४१

(सारंग)

ऐसौ मन तैं कियौ मेरे ललना !

इतनिक दूर वहे मथुरा तैं कोई^४ आयौ चल ना ॥
नयन—नीर घट्यौ नहिं कबहूँ अधर^५ सबै दिन गीले ।
मुखहिं^६ तंबोर नयन नहिं कज्जल चिकुर सबै दिन ढीले ॥
कंकन—बलय परें खसि भूतल बहुरि उचाइ^७ न पहिरे ।
सूकौ कंठ पुकारति हरि—हरि स्रवन—रंध भए बहिरे ॥
ऐसी दसा दया तोहि नाँही बेद कहत है नागर ।
परमानन्द विरहिनी कौ मुख विनु प्रीतम दिन आगर ॥

६४२

(सारंग)

हम तौ माधौ ! तुमहिं लगे ।

जियकी बिथा^८ कवन सौं कहिये मातु—पिता—कुल—निकट सगे
पपीहा की प्यास मेघ ज्यों^९ बरषें आरति जानि पुकार करै ।
हरि सर्वज्ञ जगत के ठाकुर कृपा करै तौ फिर ढरै ॥
कीजै कृपा जानि जन^{१०} अपने जो ब्रजवासी गर्ब भरे ।
‘परमानंद’ स्वामी^{११} तुम्हरे भरोसे गनति न काहू तृन हू बरे ॥

६४३

(सोरठ)

गोबिंद मधुपुरी कत जातौ ।

उखेरी बरडै हति टैटी^{१२} लाई असुर—राज मदमातौ ॥

१. इहि (ड. छ.), २. हम, ३. हम

४. कोउ न आयो चलना (ड. छ.), ५. अंचर (छ.), ६. न (छ.)

७. वाहि नाहिं (ग. ड. छ.), ८. बात (बात (घ.), ९. क्यों (ख.),

१०. जिय (ग. ड. छ.), ११. प्रभु (ड. छ.), १२. बैठी आतुर (ग.)

बरु उह कंस जीवतौ रहतौ बैरु चल्यौ बरु जातौ ।
 बंदि—बासु बसुदेव बरु सहतौ^१ कत टूटत इहि नातौ ॥
 अब काहे कों गोकुल आवै गो—सुत—वृंद चरावन
 उहि गुन सुमिरि कियौ नहिं फेरौ दाम उलूखल^२ बँधावन ॥
 बिरह—बिथा तन बाढनि लागी प्रेम न हृदै समाई ।
 'परमानंद' नदी अंतरगत उमडि ऊपरें^३ आई ॥

६४४

(सारंग)

या मन कौ कहा करौ जो न रहै ।
 उहि मूरति नैननि बिनु देखें जीउ बिरह—दुख सहै ॥
 बार-बार समुझावति सखी री ! धीरजु करि दिन च्यारि ।
 स्याम—मनोहर या गोकुल की नाहिन.सुरति बिसारि ॥
 बदी जु अवधि टरें सो कैसें सत्य बचन प्रभु भाख्यौ ।
 'परमानंद' स्वामी के निज गन^४ में अंतर तें राख्यौ ॥

६४५

(सारंग)

इह ठौर जहाँ हरि खेलते ।
 सुनि री सखी ! कहाँ लौं बरनौं तब ग्रीवों^५ भुज मेलते ॥
 एक दिवस नँदलाल लकुटिया तेरे^६ करिया बेलते ।
 इहीं^७ निकुंज जहाँ मन—मोहन मिलि मनमथ—दल पेलते ॥
 तब कत इहै^८ जात ब्रज राख्यौ इन्द्र—कोप की रेल तें ।
 'परमानंद' कहहु^९ हरि सों^{१०} जैसें दिया बिनु तेल तें ॥

६४६

(सोरठ)

माई ! दोइ कैसें बनि आवति ।
 विमुख जु रहति कमल—लोचन सौं ताही तें दुखु पावति ॥
 कै तू होइ स्यामसुंदर की कै तू^{११} अपनें घरहि रहै ।
 कै गहु चरनकमल गाढे^{१२} करि कै अब जाइ भव-जलधि बहै ।
 इहि जु एक मन बहुत ठौर धरि कहै कौनें सुख पायौ ।
 'परमानंद' वाद है एतौ निगम—भागवत गायौ ।

१. रहतौ (ग. घ. ड. छ.), २. ऊखल (ग. ड.), ३. ऊपरें (छ.)

४. गुन (ग.) गन में दुख अन्तर (छ.), ५. भुज पर (ग.), ६. तिरछी करि (ग. घ.) तीरी

७. इहीं (ग. घ. ड. छ.), ८. वह (ख.), ९. कहौं (ड. छ.), १०. ऐसें (छ.)

११. कै अपने घर बैठि० (ड. छ.), १२. गाढौं (ग. ड. छ.)

६४७

(सारंग)

किते दिन हरि-देखे^१-बिनु बीते ।
 एकौ न स्फुरै^२ स्यामसुंदर-बिनु बिरह सबै सुख जीते ॥
 मदनगोपाल बैठि कंचन-रथ चितै किए तनु रीते ।
 सुफलक-सुत लै गए दगा दै प्राननि ही तें प्रीते ॥
 सो दिन कबहि घोष आवहिंगे मोहन-बलभद्र-समीते ।
 'परमानंद' प्रभु देह अछत अब मिलहु श्रीदामा-मीते ॥•

६४८

(मलार)

•उय मनहु बुलावत है गोपालहि^३ ।
 बहुरि नयन भरि देख्यौ चाहें मोहन गिरिधरलालहि^४ ॥
 गोवरधन परबत के ऊपर बैठि सिला पर बोलत मोर ।
 झेंव^५ उचाइ-उचाइ पुकारै नाम लेत है नंदकिसोर ॥
 पंख^६ पसारि-पसारि दिखावहिं इहि गति भई आएँ^७ ब्रज-नाइकु ।
 'परमानंद' प्रभु या बिनोद-बिनु कानन-भवन भए दुख-दाइकु ॥

६४९

(मलार)

प्रथम कृपा करि सोखी आँखिनि ।
 अब उहै ठौर रमि जु रहे मरियत हैं झँखिनि^८ ॥
 सो बिरहिनि कैसें जीवै दरसन-अभिलाखिनि ।
 ताके मन कैसे मानत अधरामृत-चाखिनि ॥
 उह चित हम ते दूरि गयौ सनमुख मधु भाखिनि ।
 'परमानंद' प्रभु हस्त-कमल गोवरधन राखिनि ॥

६५०

(सारंग)

लाल बुलावत हे उहि बरियाँ ।
 मदनगोपाल मनोहर मुख तें मुरली बिसद उच्चरियाँ ॥

-
१. दरसन (ग. ड. छ.), २ फुरै (ग. ड. छ.)
 • साधारण पाठभेद से पद सं० ४००६ पर सूरसागर में भी
 •• ओइ मन० (ड. छ.) से भी प्रारंभ
 ३. गोपालै (ड. छ.), ४. लालै (ड. छ.)
 ५. ग्रीव (ड. छ.) जेवउ
 ६. अरी ! ओइ पंख (ख), ७. न आए (ग.)
 ८. झँखिन-इसी प्रकार सर्वत्र तुकान्त (ख.)

जब घनस्याम सिधारत बन कों तबहूँ हम न बिसरियाँ ।
‘परमानंद’ दरसन भयौ दुर्लभ बिछुरे कौन कुघरियाँ ॥

६५१

(सारंग)

नहिं बिसरति वह रति ब्रजनाथ !

हौं रिसाइ रिस रही मौन धरि रस ही में खेलत इक साथ ॥
पचिहारे जु मनावौ^१ न मान्यौ आपुन चरन छुहे हरि^२ हाथ ।
तब रिसाइ सोए^३ उत मुख होइ झुकि कें झाँपि उपरेंना माथ ॥
रहि न सके जु प्रेम आतुर अति जानी रजनी जात अकाथ ।
‘परमानंद’ प्रभु ठगी^४ जु महा निसि पढि जु सुनाई प्रात^५ की गाथ ॥

६५२

(सारंग)

कमलचंद की सोभा मेटत कब देखोंगी उय^६ सुंदर मुख ।
संमिलित बेनु पीत रज-मंडित अलि-लोचन पीवत सुख ॥
ऐसौ भाग्य बहुरि कब करिहै कब करिहै या ब्रज के ऊपरि रुख ।
सुंदर-स्याम मनोहर मूरति नंद-सुवन मोचन-गोकुल-दुख ॥
उपमा कौं दूसरौ नहिं कोऊ कमल-नयन सब संतनि कौ पख ।
‘परमानंद’ प्रभु रसिक-सिरोमनि पांडव-कुल-पालक पारथ-सख ॥

६५३

(सारंग)

कब री ! मिलैगो मेरौ मदनगोपाल मनोहर ।

जा दरसन-बिनु बन री^७ ! भयौ घर ॥

कालिंदी बृंदावन इहि ब्रज देखि-देखि लागनि लागौ डर ।
सोरदूल उठि चले री ! मधुपुरी अब री सखी ! कीजतु काके बर ॥
चलियतु काहे न जहाँ री ! स्यामघन मेरौ कह्यौ तुम सब सखि परिहरु ।
‘परमानंद’ प्रभु रसिक-सिरोमनि नंदकिसोर सुभाय-कलपतरु ॥

६५४

(सारंग)

मारग माधव कौ जोवै ।

वहै अनुहारि न देख्यौ कोउ जोऽब नयन-दुख खोवै ॥

१. मनावौ (ग. घ. ड. छ.) २. हँसि (ग. घ. ड. छ.)

३. फिरि सोइ रहे उत (क. ग. घ. ड. छ.)

४. छली महा (क. ग. घ. ड. छ.) ५. प्रीति

• पर पाठ-भेद से पद सं० ३८२१ सूरसागर में भी

६. वह (ग. घ. ड. छ.), ७. ही (ग. घ.)

बाल-बिनोद किए नँदनंदन सुमिरि-सुमिरि गुनि रोवै ।
बासर-प्रति गृह-काज न भावै निसि भरि नींद न सौवै ।।
अंतरगत की ब्यथा^१ मानसी सो तन अधिक बिगोवै ।
'परमानंद' गोबिंदचंद-बिनु अँसुअनि-जल उर धोवै ।।

६५५

(सारंग)

• बहुरौं ब्रज कौ नामु न लीनौ ।
जानौं नहीं कहा जिय उपजी^२ कान्ह निठुर चित कीनौं ।।
जननी-पिता-बंधु-गोपीजन सबै घोष बिसरायौ ।
केते दिन पाछें री माई ! मैं हूँ सँदेस न पायौ ।।
अब ऐसी आवत हे मन मँह^३ नंदनंदन पँह जईये ।
कै बिनु मिले 'दास परमानंद' कठिन बिरुह-बिष खईये ।।

६५६

(सारंग)

माई ! को इहि गाँइ चरावै ?
दामोदर-बिनु अपनौ संघातीनु कौन सिंगार करावै^४ ।।
सब कोउ पूजै दीपमालिका हौं कहा पूजौं माई !
राम-गोपाल मधुपुरी गमनें धाइ-धाइ ब्रज खाई ।।
दाम दोहनी माट मथानी जाइ पासि को पूजै ।।
का कौं मिलें चलै इह गोकुल कौन बेनु-कल कूजै ।।
करत प्रलाप सकल गोपीजन मन मुकुंद हरि लीनों ।
'परमानंद प्रभु इतनी दूरि बसि मिलन दोहिलौ कीनौं ।।

६५७

(सारंग)

गोपाल-बिनु कैसें कें ब्रज रहिबौ ।
धूसर-धूरि उठाइ गोद लै लाल कवन सौं^५ कहिबौ ।।
जो मधुपुरी दिवस लागत^६ तुम्हें सोच सूल तनु दहिबौ ।
'परमानंद' स्वामी रिपु काजै^७ सरन कौन कौ गहिबौ ।।

१. विथा (ग. छ.)

• बहुरचौं (ग. उ. छ.) से भी प्रारंभ,

२. आई (ग. घ. ड. छ.)

३. मैं (ग. घ. उ. छ.), ४. बनावै (क. ग.)

५. कौन (छ.), ६. लागिहें (ख.) लागहिंगे (क.)

७. सहिबौ (घ.), ८. कोजें (क. ख.)

६५८

(सारंग)

• मानु इहाँई लौं प्रीति ।

मदनगोपाल भली है कीनी मधुकर की सी रीति ॥
 सुनियत है गुरुकुल पढि आए भली राज की नीति ।
 सेवकई^१ नीकें करि जानत कंस मारि रिपु जीति ॥
 कहौं उह^२ प्रीति जु बाल-दसा की मिलि खेलते समीति^३ ।
 'परमानंद' प्रभु उदर तें राखी अपने कुल की भीति ॥

६५९

(सारंग)

वह मुख कबहुँ^४ दिखावहुगे हरि !

जिहि मुख बस कियौ सब गोकुल
 चारु बिलोकनि मुरली अधर धरि ॥
 जिहि मुख अमृत स्रवत मधु-धारा
 पिबत स्रवन-पुट मन अति गहवरि ।
 नेकु न मलिन सदा आनंदमय
 कोटि चंद डारों^५ बारि उपरि करि ॥
 जिहि मुख धौरी धेनु बुलावत
 गावत गीत मधुर नाना परि ।
 'परमानंददास' वा मुख-बिनु
 अंध भयौ ब्रज रह्यो बिरह मरि^६ ॥

६६०

(सारंग)

सुरति आवै कल बेनु की ।

मदनगोपाल त्रिभंगी सुंदर मुख-मंडित कच रेनु की ॥
 अब उह समै बहुरि बिधि करिहै कुंज चरावन धेनु की ॥
 सात दिवस झर इंद्र-कोप तें गोवरधन कर लेनु की ॥
 नहिं बिसरति उह केलि कान्ह की घर के दधि पय-फेनु की ।
 'परमानंद' स्वामी हरि प्रहसित और लरिकवन देन की ॥

(६६१)

सारंग

हरि की^७ मधुकर की सी न्यौंई ।

एक बार रस चाखि फूल कौ बहुरि न दई दिखाई ॥

• मानों० (ग. घ. ड. छ.) से भी प्रारम्भ

१. सेवक ही (ग. छ.), २. वह (ग. घ. ड. छ.), ३. समीप (ख.)

४. कब दिखावहुगे (ड. छ.), ५. वारों ऊपरि (ग.), ६. मरि (ग. ड. छ.)

७. कीनी (ग. ड. छ.)

स्याम—बरन तन बाहिर—भीतर ताकों को पतियाई ।
 काहे कों एतौ कीजतु है झूठी असत सगाई ॥
 लेति उसास नयन जल भरि—भरि प्रेम न हृदै समाई ।
 'परमानंद' गोपिका विरहिनी प्रान—जीवन जदुराई ॥

६६२

(सारंग)

इतनि दूरि मनमोहन की कछु आवत नाहिन पाती ।
 ज्यो—ज्यों गहरु करत है मधुबन त्यों—त्यों धरकति छाती ॥
 गत बंसत ग्रीष्म रितु प्रगटी बनसपती सब पाती ।
 चातक मोर कोकिला कलरव ए बिरहिनि के घाती ॥
 कहाँ लगु जाँहि कवन^१ सौं कहिये बोलि जगाबहि राती ।
 'परमानंद' प्रभु चलत न जाने तौ संगहि उठि जाती ॥

६६३

(मलार)

चातक पीउ—पीउ बोलत ।
 पिय गोपाल की सुरति आवति ताते^२ मेरौ मन डोलत ॥
 अंबर मेघ—घटा घन गरजत चौहों दिसि कौंधति दामिनि ।
 माधौ—राम बिदेस सिधारे नींद न आवें जामिनि ॥
 नैननि नीर सरीर न सूझत अंधकार उठि भेटति ।
 'परमानंद' प्रभु तुम कब आए लज्जित चीर समेटति ॥

६६४

(सारंग)

ता दिन सरबसु देउं बधाई ।
 जा दिन दौरि कहै सुनि सजनी ! आए हैं कुँवर कन्हाई ॥
 मैं^३ अपनौ सौ बहुत करि लीनौ लाल न देत दिखाई ।
 सोचत जात दिन अवलोकत उह न कबहु न जाई ॥
 मेरी उनकी प्रीति निरंतर बिछुरत पल न घटाई ।
 'परमानंद' बिरहिनी हरि की सोचति अरु पछिताई ॥

६६५

(सारंग)

प्रान—जीवन जदुराई ! मिलिहौ कब माधौ !
 सोचत सोच भयौ तन पियरौ घटि गयौ जोबन आधौ ॥

१. कौन (ग. घ.)

२. तामें (ङ. छ.)

३. हों (ग. ड. छ.)

चंदन—चीर मंद मलयानिल सकल भए दुखदाई।
 बैरिनि कुहुकि कुहुकि कत बोलति कोकिल देहु उडाई।।
 क्यों दुख जाइ कवन सौं कहिये रहिये कहाँ सयानी।
 'परमानंद' प्रभु अवधि बितीती हरि मधुवन—रति मानी।।

६६६

(मलार)

माधौ माई ! मधुवन छाए।

कैसे^१ रहै प्रान गोविंद—बिनु पावस के दिन आए।।
 हरित बरन बन सकल द्रुम पातें मारग बाढी कीच।
 जल पूरति रथ कौ गमन^२ नहीं बैरिनि जमुना बीच।।
 का के हाथ सँदेसौ पठऊँ कमलनयन के पास।
 आवत जात इहाँ कोऊ नाँही सुनि 'परमानंददास'।।

६६७

(सारंग)

नयनाँ रहट की घरी रहाईं।

करि—करि सुरति मदनमोहन की भरि आवै ढरि जाईं।।
 बिनु ब्रजनाथ सखी ! क्यों जीजै घर—कानन न सुहाईं।
 वेई बसन वेई पट—भूषन भए भुअंगम खाँइ।।
 या मथुरा तन तेज^३ सखी री ! बायो पै न बहाइ।
 'परमानंद' स्वामी के बिछुरे हियरा^४ क्यों न सिराइ।।

६६८

(सारंग)

रहि सखि बावरी ! तन छीजै।

बिछुरन—मिलन रच्यौ बिधि ऐसौ सोचु कहाँ लौं कीजै।।
 अंबुज—नयन नीर कत ढारति उर—अंचर तेरौ भीजै।
 'परमानंद' धीरजु धरि भामिनि ! हरि के चरन चित दीजै।।

६६९

(सोरठ)

बाबा की सौं कै उनकी सौं आजु राति नहिं नीद परी।
 जागत गनत गगन के तारे रसना रटति गोबिंद हरी।।
 उह चितवनि उह रथ की बैठनि जब अक्रूर की बाँह धरी
 देखति रही ठगी—सी ठाढी बचन न आवै बिरह—भरी।।

१. मेरे सो नहिं प्रान (ड. छ.), २. गम नाहीं (घ)

३. तेजु, तन तें सखी (घ. ड. छ.), ४. हियरौ (ग. घ. ड. छ.)

उहहि^१ ध्यान अंतरगत मेरे बिसरत नाहिन एक घरी ।
‘परमानंद’ प्रभु मोहन मूरति मुरली-मनोहर स्याम-हरी ॥

६७०

(सोरठ)

अब हौं गहरें पैठि डरानी ।

कमलनयन तब कर गहि काढी प्रीति निरंतर जानी ॥
उइ दिन सुरति करति ब्रज-ललना जमुना निरमल पानी ।
अपनि अंक^३ धरि स्याम-मनोहर काढि कें बाहिर आनी ॥
उह खेलिबौऽरु हँसि-हँसि मिलिबौ बचन कहत मधुबानी ।
‘परमानंद’ करी अब ऐसी निपट बटावनि जानी ॥

६७१

(गौरी)

माई ! हरि प्रीतम परदेस ।

का कें हाथ देउं लिखि पाती को लै जाइ सँदेस ॥
नींद न परै भूख न लागै अनुदिन सोच अपार ।
कहा करौं कैसै मन राखौं बिछुरे नंदकुमार ॥
लै-लै स्वास नयन जल भरि-भरि जीवति मिलन की आस ।
कैसै कहों ‘दास परमानंद’ बिरह मनोभव-त्रास ॥

६७२

(गौरी)

बेधी हौं पद-अंबुज-मूल ।

रह्यौ न परै स्यामसुंदर-बिनु नयना मुख देखि न भूल ॥
लरिका-वृंद संग करि लीनें खेलत हैं जमुना^३ के कूल ।
बलिहारी मनमोहन मूरति नाहिन जाहि कोउ समतूल ॥
मारग चलत अचानक सखि री ! लागी कुसुम बान की झूल
तनमय भई ठगौरी लागी उपजी उर मदन की सूल ॥
बिसर्यौ गृह-व्योहार प्रेम-रस निमिष नहि भयौ चित लूल^४
‘परमानंद’ हर्यौ मन केसौ लोचन चारु कमल के फूल ॥

६७३

(गौरी)

जसोदा ! मधुबन तें आजु-कालि तेरे हु कोउ आयौ ?
बहुत द्यौस बितित^५ गए संदेसौ^६ न पायौ ॥

१. बेई (घ), २. कंध(घ), ३. कालिंदी कूल (क)

४. चूल (उ छ), ५. बीति (ग. घ. उ छ), ६. सँदेस हू (घ. उ छ)

कैसे ताहि नींद परे कैसे गृह^१ भावै ।
जाकी निधि छूटि जाइ धीरज कैसे आवै ॥
गोपिनि के बचन सुनत बिलखति नँदरानी ।
'परमानंद' प्रीति जानि^२ नयन स्रवै पानी ॥

६७४

(सारंग)

हमकोँ बिषम भई निसि सेजौ ।
ऊधौ ! कमलनयन की बातें छुटि-छुटि जरत^३ करेजौ ॥
गोवर्द्धन वृंदावन इहि ब्रज फुनि-फुनि सुरति करावै ।
इहि^४ निबास कान्ह जहाँ खेलत बल-सह गाँइ चरावै ॥
एई बेनु बिषान बेत दल मोर-पिच्छ मनि-गुंजा ।
'परमानंद' स्वामी के खिलौना सकल प्रेम के पुंजा ॥

६७५

(सोरठ)

कवन सच टरि ब्रज करौ ।
सुनि जसोमति ! गोकुल के लोचन लै गयो मोहन तेरौ ॥
कों जानै कहा जिय उपजी बहुरि न कीनों फेरौ ।
स्यामसुंदर के हित की बाँधी^१ बाढ्यौ विरह घनेरौ ॥
जा के चरनकमल मुनि-बंदित^२ भवसागर कौ बेरौ ।
'परमानंददास' कौ ठाकुर ता कौ^३ सब जगु चेरौ ॥

६७६

(केदारौ)

एते दिन अवधि के टारे ।
मदनगोपाल हमारे उनके किहिं लेखे मँह पारे ॥
तब वह प्रीति मिलनि बन मँह की प्राननि किये निनारे^४ ।
स्याम-मनोहर आइ बैठते रुचिर तलप पर वारे ॥
वत्स उबेरि खेलिबे के मिस चलते बनहिं सवारे ।
तब ऐसी करि^५ हमारे हित कौ संखचूड़ से मारे ॥
तुम ठाकुर बनिता तहाँ केती हम गुन-ग्राम बिचारे ।
'परमानंद' प्रभु तिनकी कहावति जनम नाथ-हित हारे ॥

१. इह (घ. उ. छ) २. हदै (क. घ. उ. छ.)

३. जाति इहाँ निसि वासर गिरिधर खेलत (क. ग. घ. उ. छ)

• कौन० से भी प्रारंभ (छ)

४. बीधी (ग.), ५. बंदत (क), ६. जाकौ (ग.), ७. जु न्यारे (ग.), ८. करत (ग.)

६७७

(सोरठ)

तब हरि बतियनि ही सुख देते ।

छिन्^१ एक भवन विलंब करति तब लोचन भरि-भरि लेते ॥

को जानै इहि प्रीति कपट की मुख औरहि जिय और ।

पाछैं कै^२ पहिचानि तजहिगे स्वारथ-साधक भौर ॥

तदपि इहि मन खरौ लालची करत मिलन की आस ।

नहिं^३ जात बदन बिनु देखें सुनि 'परमानंददास' ॥

६७८

(सोरठ)

अब दरसन की साधनि मरियतु ।

मदनगोपाल मनोहर मूरति

देखिबे कौं केतौ लालच करियतु ॥

जब तें कमलनयन ब्रज छाँड्यौ

सुनि री सखी ! बिरह दौ जरियतु ।

अवधि-आधार आस मिलिवे की

चलत प्रान जतननि छिनु धरियतु ॥

सुमिरत रास सरद^४ रातनि के

मनसिज-बान छिनु ही छिनु भरियतु ।

'परमानंद' स्वामी बिनु देखें

सोक-समुद्र^५ दिवा-निसि तरियतु ॥

६७९

(सोरठ)

बरजौ या चंद मंद किरन-पुंज जा रै ।

स्यामसुंदर गोविंद-बिनु कौन इहि निवारै ॥

ससि हर गुन कहियत है सीतल सुखदाई ।

ग्रीष्म काल रबि की गति हम तन दौ लाई ॥

इक कलंकु लागि रह्यौ दूसरौ क्यों मिटिहै ।

अवला बल मास मंद जुग न पाप घटिहै ॥

जा परि^६ तू एतौ करत माँझ बिमल सोऊ ।

'परमानंद' संतनि में भलौ न कहै कोऊ ॥

१. जब छिनु एक भवननि बिलंबति (क.)

२. को (क. उ. छ.) तें (घ.), ३. कछु न सुहाइ दरस देखे बिनु (क.)

४ सरद जामिनी के (छ.), ५. सिंधु (उ. छ.), ६. जा परि तुम (घ) जा बरि (क. ख)

६८०

(सोरठ)

माई ! अब इहि^१ सरद-निसा लागति है फीकी ।
 स्यामसुंदर-संग होइ तब ही पै नीकी ॥
 ससि हर संतापकारी बरषत विष-बूँदें ।
 मारुत-सुत सुभाव तज्यौ दसौं दिसा^२ मूंदै ॥
 'परमानंद' स्वामी गोपाल परिहरि हम सिखई ।
 प्रान पयान करन चाहत मिलहु कपट बिखई ॥

६८१

(सोरठ)

माई री ! मधुबन केतिक दूरि ?
 चढि गिरि-सिला बिरहिनि गोपी नैन रहे जल पूरि ॥
 जो बिधि बीच कियौ हरि हम सौं निसि-दिनु जोवति बाट ।
 रह्यौ न परै नंद-नंदन-बिनु मूँड जु पर्यौ उचाट ॥
 कहा^३ री ! करौं कैसै लै आऊँ जाऊँ स्याम के पास ।
 कछु न सुहाइ भवन अब^४ देखौ सुनि 'परमानंददास' ॥

६८२

(गौरी)

कब^५ देखिबै खरिक में ठाढे ?
 मिलिहैं मदनगोपाल मनोहर दै^६ आलिंगन गाढे ॥
 कटि पट-पीत धूरि-धूसर बपु^७ दर बिचित्र बनमाला ।
 कुंचित अलक तिलक अति^८ सुंदर लोचन चारु बिसाला ॥
 एक हाथ दोहनी कनक^९ की एक पाट की नोई ।
 बछरा मिलवत^{१०} धेनु दुहावत साँझ समै सचु सोई ॥
 कठिन बिरह उपज्यौ उर-अंतर हरि-बिनु कौन निबारै ।
 'परमानंद' मधुपुरी प्रीतम गोपी अवधि बिचारै ॥

१. तौ (उ छ.) तौ इहि (ग. घ.)

२. रहै (क. ग. घ. उ. छ.)

३. दसा (ख)

४. कहा करौं (ग. घ. उ. छ.), ५. अपने में (ग. घ. उ. छ.)

६. कबहुँक (ग. उ. छ.), ७. दैब (ग. घ. उ.) दै अब (छ.)

८. तनु (क. ग. घ. उ. छ.), ९. राजित (ग. घ. उ. छ.)

१०. की सोभा लोचन-कमल (क.) मुग-मद रुचि अंबुज-नैन (ग. घ. उ. छ.)

११. बिराजित (क. ग. घ. उ. छ.), १२. छोरत (ग. घ. उ. छ.)

६८३

(मलार)

बहुरि हरि आवहुगे किहिं काम ?

रितु बसंत अरु मकर—बितीते अरु बादरु गए^१ स्याम ।।
 तारे गगन गनत री माई ! बीते चार्घ्यो^२ जाम ।
 और^३ काज सब बिसरि गए हरि ! लेत ! तुम्हारौ नाम ।।
 छिनु आँगन छिनु द्वारै ठाढी हम सूकत ए^४ घाम ।
 'परमानंद' प्रभु रूप बिचारत रहे अस्थि अरु चाम ।।•

६८४

(मलार)

काहे कों बिलँबु कियौ बेगि न आए
 कमल—नयन ! मेरे प्रान—जुडावन ।
 दादुर मोर पपीहा बोलै
 मदन जगावनु आयौ^५ सावन ।।
 बिरह—बिथित तनु धीर न धरै मनु
 दिन—दिन लागे अवधि बढावन ।
 गनत दिना अब पावसु आयौ
 बूँद परत लागी दुख पावन ।।
 तब जु बचन बदि गमन कियौ हरि
 सुनहु^६ न सखियनु मन बहरावन ।
 'परमानंद' प्रभु रसिक—सिरोमनि
 मिलोंगी आँकौं भरि मधुबन—भावन ।।

६८५

(केदारौ)

रयनि पपीहा बोल्यौ^७ माई ।
 नींद गई चिंता चित्त बाढी^८ सुरति स्याम की आई ।।
 सावन मास देखि^९ बरषा—रितु हौं उठि आँगन आई^६ ।
 गरजत गगन दामिनी दमकति^{१०} वा में जीउ डराई ।।

१. भए (क. ग. घ. ड. छ.)

२. (घर कौ काज (ड) गृह काज (छ), ३. हैं (ग. व. ड. छ)

• प० सं० ३६२७ पर सूरसागर में भी परिवर्तन से।

४. आयो है (ग. घ. ड. छ), ५. सुनि उनि सखि

६. बोल्योरी (ग. ड. छ), ७. उपजो (क.)

८. मेघ की बरसनि, ९. धाई, १०. चमकति तातें खरी (क)

रागु मलार कियौ^१ जब काहू मुरली मधुर बजाई ।
बिरहिनि बिकल 'दास परमानंद' धरनि परी मुरझाई ॥

६८६

(केदारौ)

हमारे हितकारी गोपालु ।

सुंदर-स्याम जसोदा-नंदन गोकुल कौ प्रतिपालु ॥
जब तें जनमु नंद-गृह लीनौ बकी-पूतना-कालु ।
गोबरधन-उद्धरन एक कर कंस-हृदै कौ सालु ॥
समुझि न परै सकल अदभुत गति लीला-बिग्रह लालु ।
'परमानंददास' कौ ठाकुर गोधन-चारन ख्यालु ॥

६८७

(गौरी)

सुरति करि उहकिऽब रोइ दियौ ।

पथिक एक जात हौ मारगु राधा बोलि लियौ ॥
कहि धौ बीरु ! कहाँ तें आयौ उहु^२ मिलि प्रनामु कियौ ।
वह^३ पाइ लागि सिधाई मंदिर बहु^४ दुख जानि गयौ ॥
गदगद कंठ हृदौ-भरि आयौ^५ बचन न कह्यौ गयौ^६ ।
'परमानंददास'^७ बूझे तैं ऊतरु कछु न दयौ^८ ॥

६८८

(मलार)

या हरि कौ संदेस न आयौ ।

बरष-मास-दिन बीतन लाग्यौ^९ बिनु-दरसन दुख पायौ ॥
घन गरज्यौ पावस रितु प्रगटी चातक पीउ-पीउ सुनायौ ।
मत्त मोर बन बोलन लागे बिरहिनि-बिरह जनायौ ॥
राग मलार सह्यौ नहि जाई काहू पथिक हि गायौ ।
'परमानंददास' कहा कीजै कान्ह मधुपुरी छायौ ॥

६८९

(मलार)

ओसेरनि जियरा तपत है माई री ! माधौ के मिलन कौ ।
मोहि चातुक की सी प्यास देखन नंद के ललन कौ ॥
उद्यम बहुत किए अपने चित या मधुवन के गमन कौ ।
कहा री ! करौं कैसैं करि राखौं बिरहानल तन जरन कौ ॥
बदन बिलोकि दोष हम धरतीं इन्ह नयननि की पलन कौ ।
'परमानंददास' बिनु-देखे बरष गयौ रिपु-दलन कौ ॥

१. अलाप्यौ, २. पुहुमि (ग. घ. उ. छ).

३. इह पग लागि सिधारी (उ. छ.) वह पग लागि (ग. छ.), ४. यह (छ.)

५. आवै (छ.), ६. पस्यौ (उ. छ.), ७. बहुरि (ग. घ. उ. छ.), ८. कस्यौ (उ. छ.) कहा (ग.)

९. लागे (ग. घ. उ. छ.), • पद सं० ४०१४ पर सूरसागर में भी पाठ-भेद के साथ

६६०

(मलार)

• माई री ! माधौ-बिनु कैसेँ सहाँ सावन घनघोर ।
 चहुँ^१ दिसि बृंदाबन बोलत^२ हैं मोर ॥
 एक जु और कठिन परी चातक करै^३ सोर ।
 पीउ-पीउ पुकारात रिपु अबधि बंधत^४ जोर ॥
 बिरह-बिथा अब जु सहत प्रान अति कठोर ।
 निकसि नहीं^५ तहाँ चलत जहाँ नंदकिसोर ॥
 अब तौ इहि^६ आनि बनी मरन होत मोर ।
 प्रीति हमारी गोबिन्द की पर न चाहत ओर ॥
 कहा करौ चोर्यौ मनु माखन के चोर ।
 'परमानंद' देखि गगन विहिनि सिर ढोर^७ ॥

६६१

(धनाश्री)

सुरति आवै बदन की ।
 स्यामसुंदर कबहुँ^८ मिलिहैं मूरति कोटि मदन की ॥
 जब तैं हरि गमन कीन्हौ बिसरी सुधि सदन की ।
 कमल-नयन चारु-बयन माँखन दधि ओदन की ॥
 बिरह-बिथा कौ^९ मेटै कठिन काम-कदन की ।
 'परमानंद' हृदै बसौ केलि नंदनंदन की ॥

६६२

(धनाश्री)

मन में रमि रही ओइ^{१०} बतियाँ ।
 जिहि गोपाल गोकुल बस कीन्हे सरद बिमल सुख-रतियाँ ॥
 ओई चंद्र-किरनि फुनि ओई अब लागति है ततियाँ ।
 सब विपरीत भए तिहि^{११} औसर दाह दहन दुख छतियाँ ॥
 सीतलता लै गए नंद-सुत स्याम-सुभग तन भतियाँ ।
 'परमानंददास' कौ ठाकुर ब्रज देखति इहिं गतियाँ ॥

• माधौ-बिनु कैसेँ० से भी प्रारंभ (क.)

१. दहाँ दिसि (ख.), २. बोलन लागे क. घ. उ. छ) ३. करहि (क. उ. छ.)

४. बधत (क), ५. नाहिनेँ (क. ग. घ. उ. छ)

६. जिय आइ (क.) ७. ओर (क. उ. छ)

८. कबहि, ९. कौन (ग. घ. उ. छ),

१०. वेइ (छ.), ११. इहि (ग.)

६६३

(धनाश्री)

गोपालहिं कैसैं कै लै आऊँ ।

उन्ह तैं अधिक होंउ मैं नागरु तौ बातनि समुझाऊँ ॥
 तुम्ह जानति हौ उह बातें हैं संग मिलें पुनि गाऊँ ।
 'परमानंद' प्रभु मथुरा-राजा भाग होइ तो पाऊँ ॥

६६४

(सारंग)

री ! माधौ के पाइनि परिहौं ।

अपनौ^१ सनेही जब देखोंगी^२ तन न्यौछावरि करिहौं ॥
 लोक-वेद की कानि ना करिहौं ना काहू तैं डरिहौं ।
 नंद-नंदन की निज चेरी है पिय कौ पान्यौ भरिहौं ॥
 कमल-नयन कों^३ जब देखोंगी सरबसु आगें धरिहौं ।
 'परमानंद' स्वामी सौं मिलिकैं अपने नैम तैं नें टरिहौं ॥

६६५

(सोरठ)

हरि ! तेरी लीला की सुधि आवति ।

कमलनयन मोहन-मूरति कौ मन-मन चित्र बनावति ॥
 एक बार जाहि मिलत मया करि सो कैसैं बिसरावति ।
 मृदु^४ मुसकानि बंक अबलोकनि चाल मनोहर भावति ॥
 कबहुँक निबिड तिमिर आलिंगति

कबहुँक पिक-स्वर गावति ।

कबहुँक संभ्रम 'क्वासि-क्वासि' करि संग-हीन उठि धावत ॥
 कबहुँक नयन मूँदि अंतरगति बनमाला पहिरावति ।
 'परमानंद' प्रभु स्याम ध्यान करि ऐसैं बिरहु गमावति^५ ॥

६६६

(सारंग)

माई ! को मिलिबै नंदकिसोरै ।

एक बार को^६ नैन दिखावै मेरे मन के चोरै ॥
 जागत गगन^७ गनत नहिं खूटत क्यों पाऊँगी भोरै ।
 सुनि री सखी ! तब^८ कैसैं जीजै सुनि तमचुर खग-रोरै ॥

१. स्याम (ग.), २. भेटोंगी (ग. ड. छ. ज.)

३. नैननि निरखौं तब (ग.), ४. मुख (घ. ड. छ.),

५. गँवावति, ६. मोहि नैन (ड. छ.)

७. जाम (ग. घ.), ८. अब (ग. घ. ड. छ.)

जो पें प्रीति होइ^१ अंतरगति जिनि^२ काहूऽब निहोरै ।
‘परमानंद’ प्रभु आइ मिलहिंगे सखी ! सीस जिनि ढोरै

६६७

(सोरठ)

हरि—बिनु बैरिनि रैनि बढी ।
हम अपराधिनि निटुर बिधाता काहे कौं सँवारि गढी ॥
तन—मन जोबन वृथा जात है बिरहा—अनल डढी ।
नंद—नँदन कौं रूपु बिचारत निसि—धोर^४ हर चढी ॥
जिहि गोपाल मेरे बस होते सो विद्या न पढी ।
‘परमानंद’ स्वामी न मिलें तौ घर तैं भली मढी ॥•

६६८

(कान्हरी)

ब्याकुल बार न बाँधति .छूटे ।
जब ते हरि मधुपुरी^५ कहँ सिधारे
उर के हार रहत सब टूटे ॥
सदा अनमनी बिलख बदन अति
इहि ढँग रहति खिलवना^६ से फूटे ।
बिरह—बिहाल सकल गोपी—जन
आभरन मनहु बटकुटनु लूटे ॥
जल—प्रवाह लोचन तैं बाढे
बचन—सनेह अभ्यंतर—छूटे ।
‘परमानंद’ कहौं दुख का सौं
जैसै चित्र—लिखी मति टूटे ॥

६६९

(कान्हरी)

गोबिंद प्यारे बिनु कौन हरै नैननि की जरनि ।
सरद—निसा अग्नि^७ भई चंद भयौ तरनि ॥
मन—मन संतापु करति दुखित नंद—घरनि ।
प्रेम—पुलकि बार—बार अँसुअनि की ढरनि ॥

१. सत्य (ग. घ. उ. छ.), २. मति काहू सौं (घ. उ. छ.)

३. आनि (ग. घ. उ. छ.), ४. धरोहर (क. घ. उ. छ.)

• साधारण परिवर्तन से प० सं० ३८८७ पर सूरसागर में भी

५. कौं (क. उ. छ.), मधुपुरी सिधारे (ग. घ.),

६. खिलौना (ग. घ. उ. छ.), ७. अनल (घ. उ. छ.)

गरग—बचन सुरति आवै पाउन्ह^१ की परनि ।
‘परमानंद’ क्यौँ बिसारी क्रीडा की करनि ॥

१०००

(कान्हरौ)

हरि—बिनु हार करहु हो ! हाँतौ ।
कलप—समान आजु कौ बासर नाँहिन बिहाँतौ ॥
सुनि री सखी ! बिरह—दुख मो पै^२ सह्यौ नहिं जातौ ।
‘परमानंद’ साँवरे सीतल नामहि कौ है नातौ ॥

१००१

(कान्हरौ)

कौन रासिक है इनि बातनि कौ ?
नंदनंदन—बिनु का सौँ कहिए
सुनि री सखी ! मेरे दुख या तन कौ ॥
कहाँ वे जमुना—पुलिन मनोहर
कहाँ वे चंद सरद—रातनि कौ ।
कहाँ वे सेज—पौढिबौ बन कौ
फूल—बिछौना मृदु पातनि कौ ॥
कहाँ वे मंद—सुंगध—अनिल—रस
कहाँ वे षटपद जल—जातनि कौ ।
कहाँ वे दरस परस ‘परमानंद’
कमल—नयन कोमल गातनि कौ ॥

१००२

(केदारौ)

नींद तौ ताहि परै जाहि लाल^३ न भावै ।
चारि जाम निसि बैठी जागौँ कबहि^४ स्याम घन-आवै ॥
जा की^५ छूटि जाइ चिंतामनि सो कौनें ढँग सोवै ।
उपजी प्रीति पपीहा की सी सदा गगन—तन जोवै ॥
जा कौ मन जा ही सौँ बेध्यौ^६ सो ता हाथ बिकानौँ ।
‘परमानंद’ हिलग है ऐसी कहा रँक^७ कहा रानौँ ॥

१. पाइन (पायन) (घ.)

२. नाहिने सह्यौ जातौ (ड. छ.)

३. कान्ह (ग. छ.), ४. कबहुँ (ग. छ.),

५. जाकीउब छूटि परै (क.), ६. बाँध्यौ (ग. छ.)

७. प्रीति (क. ग. घ. ड.), ८. रंक (ग. घ.)

१००३

(केदारौ)

माधौ—मिलन अजहूँ दूरि ।

स्यामसुंदर ! सुमिरि तुब गुन नयन^१ आए पूरि ॥
 गयौ बसंत अनंत हरि—बिनु प्रकट पावस मास ।
 देखि जलधर—घटा उन्नत मुई चातक—त्रास^२ ॥
 'दास परमानंद' कौ प्रभु दीन—नाथ कहाइ ।
 कै तुम अपनौं बिरद छाँडहु कै तुम मिलहु आइ ॥

१००४

(केदारौ)

पून्यौं—चंद्र देखि मृगनैनी माधौ कौ मुख—सुरति करै ।
 रास—बिलास सँभारत फुनि—फुनि सीस ढोरै अरु नयन भरै
 कत ब्रजनाथ मधुपुरी जाते कत इहि पापी कंसु मरै ।
 जमुना—पुलिन^३ समीर सुसीतल उदित काम मनु तमिर हरै
 ओइ^४ दिन बहुरि कबहुँ करिहै हरि^५

रहसि कमल—कर बाँह धरै ।

'परमानंद' स्वामी के बिछुरें मलिन बदन अरु हृदौ जरै ॥

१००५

(मारु)

बोलि—बोलि रे ! बंस सुजाती^६ ।

राम—कृष्ण^७ की बातें कहौ कछु तुम हौ बाल—सँघाती ॥
 कर—पल्लव गहि अधर—बिंब धरै मधुर नाद—सुर करती ।
 गिर तरवर पसु तापस पंछी सब हीं कौ मनु हरती ॥
 सरद—रयनि रस रास—रसिक कौ अधर—सुधा—रस पाए^८ ।
 सुंदर मुख तैं या छिद्रनि करि अमृत—समोह^९ बहाए ॥
 चित्र बिषान देखि गृह—भीतर नैन नीर भरि आए ।
 कमलनयन घनस्याम मनोहर समाचार कछु पाए ॥
 वे हम वे तुम वे बन वे गृह सो रस कहाँ दुराए ।
 जब तैं बिछुरे नंदनँदन मेरे स्रवन नैन न अघाए ॥

१. नैन रहे जल—पूरि (ड. छ.)

२. प्यास, ३. तीर (घ.), ४. वे (छ.) वे ही (ग.), ५. सखि ! (ग. घ. उ. छ.)

६. सुजाती 'हो' (ग. में सर्वत्र), ७. कमल—नयन (क. ग. उ. छ.)

८. स्याम (घ. ड. छ.), ९. प्याए (ग. घ. उ. छ.)

१०. समूह (ग. उ. छ.), ११. वेत्र (ग.)

हम अबला मतिहीन दुखित^१ सब बिकल-वचन ब्रजनारी ॥
‘परमानंद’ प्रभु चतुर—सिरोमनि कारन कौन बिसारी ॥

१००६

(सोरठी)

गोपाल न आए मेरी माई !

जा—बिनु प्रान—ध्यान सद्यु नाही ता—बिनु कछु न सुहाई ॥
मोहनलाल अवधि वह राखी पीउ पावस रितु आई ॥
कोइल^२ तरफि—तरफि मग जोवै तारे गनत बिहाई ॥
‘परमानंद’ साँवन की समसरि मग जोवै चित^३ आसा ॥
हरि के^४ चरन चितवनी लागी लोचन मरत पियासा ॥

१००७

(सारंग)

माई ! हौं लागी साँचे के पाछें ।

नंद—कुँवार चतुर—चूडामनि गोप—भेष नट—काछें ॥
जुवति—जाति मोहन कौ भाजन सदा काम—अभिलाखी ॥
तिन्ह करीर—फल क्यों भावत है जिनि चाख्यौ रस—दाखी ॥
ओस प्यास जाय^५ कहौ कैसें जो न नदी—जल पीजै ॥
‘परमानंददास’ कौ ठाकुर प्रगट मिलै तौ जीजै ॥

१००८

(सोरठी)

ए दिन ऐसे हीं गए री !

हरि मधुबन दुख का सौं कहिये कलप—समान भए री ॥
अवधि गनत इकटक मगु चितवत सजनी ! नयन पिराने ॥
नागरि नारि मिलत रस बाढ्यौ प्रीतम भए बिराने ॥
अब कौ का की चाह करत है राज—काज लपटाने ॥
‘परमानंद’ स्वामी कत आवैं मिले हैं सयान—सयाने ॥

१००९

(सोरठी)

अब कत सुधि^६ आवै हमारी ।

कमलनयन बहुतनि के बल्लभ आनंद—कंद मुरारी ॥
उह अवसर तब हीं चलि बीत्यौ कान्ह कुँवर लरिकारि ॥
खेलत अंग—संग बन—भीतर कर गहि कंठ लगाई ॥

१. देखिकें गोकुल की सब नारी (ग.), २. कोकिल (ग. घ. ड. छ.)

३. चिंतासा (ख. छ.), ४. हरिचरन चित बनें (ख.)

५. जिय कहौ कैसें रहै (ख.), ६. सुरति (घ.)

राजकुँवार बड़े ब्रज—नाइकु नई प्रीति जिय भावै ।
 घूँघट में मुख—चंद्र बिलोकित मानवती जु मनावै ॥
 छाँडि राज—सुख रसिक साँवरौ अब कत गाँइ चरावै ।
 'परमानंद' प्रभु इहै भली जो कुसल सँदेसौ आवै ॥

१०१०

(विलावल)

अब कैसे पावत है आवनु ।
 सुंदरता सब गुन की परिमिति
 ब्रज तजि चले मधुपुरी छावन ॥
 कमल—नयन मुख—इंदु मनोहर
 नर—नारी—मन प्रीति बढावन ।
 नंदकिसोर बाल—लीला धरि
 वेनु—नाद सीखे हैं गावन ॥
 कंस—तुषार—त्रास तन—दुर्बल
 नलिन—देवकी—दुख—निवारन ।
 जदुकुल—कमल—दिवाकर प्रमुदित
 तिमिर—हरन प्रभु त्रिभुवन—तारन ॥
 रे अक्रूर ! क्रूर सुफलक—सुत !
 तोहि न बूझिये दूतहि आवन ।
 'परमानंद' स्वामी मिलिबे कौं
 लागी हैं गोपी बिधिहि मनावन ॥

१०११

(बिलावल)

सरद—राति गोपाल—लीला रही है नैननि लागी ।
 अब हीं जो ब्रजनाथ मिलहिं हरहिं मनसिज—आगी ॥
 भोग—भवन भुजंग सीतल बाहु—दंड बिसाल ।
 हरषि तन—त्रय—ताप—मोचन कामिनी—प्रतिपाल ॥
 कर—कमल सीतल धरत उर परिहरत मन की पीर ।
 'दास परमानंद' प्रभु हरि तरनि—तनया—तीर ॥

१०१२

(धनाश्री)

क्यों न बनै कुबिजा सौं आप अंग—त्रिभंगी ।
 सुभग सुजाति जानि कै हरि कीनी है अरु नैन—कुरंगी ॥

मोहन के मन अति मानी है कुटिल-कुटिल तैं तान तरंगी ॥
 'परमानंददास' के ठाकुर नृपति भएँ ऐसी अरधंगी ॥

१०१३

(धनाश्री)

क्यों न बनें कुबिजा सौ आप अंग-त्रिभंगी ।
 हम तन-मन सब सूधी ग्वालिन वे काम-कुटिल काजर-रंगी
 कनक-कमल-रस-रूप जानिकै बिन बासनि भूल्यौ भ्रम-भ्रंगी
 'परमानंद' भ्रमु रच्यौ जानि जल कृष्णसार तहाँ^१ हुती कुरंगी

१०१४

(गौरी)

कहाँ वे तब के दिननि कौ चैन ।
 जब गोपाल गोकुल में रहते सुंदर अंबुज-नैन ॥
 यद्यपि राम ! गोप-गोपी-कुल नव गोधनु के ठाट ।
 ए ब्रज बेनु सकल संपति-सुख ए जमुना के घाट ॥
 एक कृष्ण-बिनु सब दीसत है चंद्र-हीन जैसी राति ।
 'परमानंद' स्वामी के बिछुरें गई देह मुख-काँति ॥

१०१५

(कान्हरी)

जा के भवन लच्छमी देवी ।
 इतनौ नैक ओसिलौ लागत कुबजहिं मिले जदुमनिन एबी
 जद्यपि सब जानत जीवन-धन करत उग्रसेन की नेबी ।
 बड़े तैं बड़े सकल गुन-पूरन इन बातनि लागत है जेबी ॥
 मधुबन बसत स्यामघन-सुंदर बहु नृप-चरन-सरोरुह सेबी ।
 'परमानंददास' कौ ठाकुर जो देखिये सो सबै औरेबी ॥

१०१६

(केदारी)

गोबिंद ! फेरि गोरस-माटु ।
 प्रगट होहु बिनोद-मूरति कहहु बानी चाटु ॥
 बहुरि काहे न फेरि कीजै पहिलें ही सौ ठाटु ।
 विस्वकर्मा नंदनंदन सुहथ पोहमी पाटु ॥
 हमहिं जो सुख दियौ चाहत मोह-रसना काटु ।
 'दास परमानंद' प्रभु हरि संग लियै स्वराटु ॥

१. कौ (ग. घ. उ. छ.)

२. जहाँ (क.)

१०१७

(सारंग)

भए हैं पहार से दिना ।

निघटत नाहिन सुनि री सजनी ! मदनगोपाल बिना ॥
 स्याम—समीप कछुव नहिं जान्यौ जुग सम जात छिना ।
 'परमानंद' बिरहिनी हरि की तोरिऽब चली है तिना ॥

१०१८

(सारंग)

बिरह—बिनु नहीं^१ प्रीति कौ खोज ।

बिनु लागें कैंसै आवत है इन नैननि कौं रोज ॥
 स्याम—मनोहर बिछुरे^२ सखी री ! बैरी भयो मनोज ।
 'परमानंद' निसूगें^३ जे नर ते हैं राजा भोज ॥

१०१९

(कान्हरी)

कृबिजा हरि—मानी तो सबहिनि जानी ।

हरि के परसु भयौ तनु ऐसौ जैसौ सोनों 'बारह बानी' ॥
 केतिक बात चोप चंदन की है जु कछू पहिली पहिचानी ।
 'परमानंददास' हू जानी अरु पुरान सुक—ब्यास बखानी ॥

१०२०

(धनाश्री)

काहे कौं^४ दीनानाथ कहावत ।

भए कठिन निरमोही माधौ ! तेरे ब्रजवासी दुख पावत ॥
 कपटी कुटिल लोक मधुबनियाँ बतियनि ही बहरावत ।
 जिन मधुकर^५ मकरंद—रस चाख्यौ
 ताहि सीमल फल कैंसै भावत ॥
 इहि ब्रज क्यों रहिबौ गुसाँई ! राम—रूप चितै गुन गावत ।
 'परमानंद' प्रभु बहुत कहा कहौ अपनौ बिरद लजावत ॥

१०२१

(मलार)

पैयों तेरे लागौ पंथी ! मेरे बीर !

ग्वालिनी एक संदेसौ दीनौ ठाढी भई जमुना के तीर ॥

१. नाहिन (ग. ड. छ.) नाहि (घ.),

२. बिछुरें (ग. ड. छ.)

३. ज्ञान सूझे जे० (छ.),

४. कौं धौं (ग)

५. मकरंद—दरस—फल (ग. घ.) मकरंद—पान रस (क)

जो तुम जात कंस के पाटन कहियो रे ! मेरे तन की पीर ।
 खेलत मिलै बसुदेव-भवन-महि^१
 इतनक ढोटा स्याम सरीर ॥
 बहुरि-बहुरि^२ बिनती करति हों
 भरि-भरि लोचन डारति नीर ।
 'परमानंद' स्वामी सों कहियो
 चरन दिखावहु साहस धीर ॥

१०२२

(सारंग)

तौ तोहि जानोंगी जान ।
 जो तू हमारी मानसी बिथा मेटिहै भगवान ॥
 बिरहानल-दुखित कीनी चातक पिक चंद ।
 चंदन जलजात सम संभव बिष-कंद ॥
 'परमानंद' स्वामी गोपाल कमलनयन चाहि ।
 प्रीति करि जो मिल्यौ चाहै छाँडौ मति ताहि ॥

१०२३

(गौरी)

नैन भरि कबहुँ न देखनि पाए ।
 सकुचहिं सकुच रही घर-भीतर तब लागि भए पराए ॥
 प्रथम लरिकिनी गौनें आई रोकि-रोकि पिय राखी ।
 ससुर-सास की लज्जा मानी इहि मेरी सिखि साखी ॥
 हौं कहा जानौं मधुबन रहिहैं छाँडि नंद-गृह-बास ।
 'परमानंद' प्रभु-संग न खेल्यौ सरद-रयनि रस-रास ॥

१०२४

(सारंग)

ब्रज की औरै रीति भई ।
 प्रात समै अब नाहिंन सुनियतु प्रति गृह चलत रई ॥
 ससि की किरनि तरनि-सम लागत जागत निसा गई ।
 उद्भट भूप मकर के तन की आज्ञा होत नई ॥
 बृंदावन की भूमि भाँवती ग्वालनु छाँडि दई ।
 'परमानंद' लाल^३ के बिछुरें बिधना और ठई ॥

१. में (ग. घ. ङ. छ.)

२. बिनती बहुत करति (ग)

३. स्वामी (घ.)

१०२५

(बिहाग)

नींद तोहि बेचों सारी जो कोई गाहक होइ ।
आए मेरे ललना फिरि गए अँगना
मैं या पै हि रहि सोइ ॥

सीस धुनति कर सौं कर मीडति
तैं मेरौ सर्वसु डारौ री ! खोइ ।
'परमानंद' प्रभु अब कै मिलैं तौ राखौं नैन समोइ ॥

१०२६

(मलार)

बदरिया ! तू कत ब्रज पर घोरी ।
असल न साल सु लावन लागी बिधना लिख्यो बिछोरी ॥
रहो^१ जु रहो जाउ घर अपनै दुख पावत है किसोरी ।
'परमानंद' प्रभु सो क्यों जीवै जाकी बिछुरी जोरी ॥

१०२७

(बिहागरौ)

माई री ! चंद लग्यौ दुख दैन ।
कहाँ वे देस कहाँ वे मोहन कहाँ वे सुख की रैन ॥
तारे गिनत गई री ! सब निसि नैकु न लागे नैन ।
'परमानंद' प्रभु पिय बिछुरे तैं पल न परत चित चैन ॥

१०२८

(सारंग)

काहे तैं ब्रज कह्यौ रहन ।
कमलनयन—बिना अब हीं लागी दुख सहन ॥
मानौं रवि—कोटि—किरनि लग्यौ हृदौ दहन ।
स्यामसुंदर—बिनु बिधु गोकुल गह्यौ मानौं गहन ॥
बिरह—बिथा कौन मेटै मेरौ ई लहन ।
'परमानंद' प्रभु बिना नैन लागे जल बहन ॥

१०२९

(सारंग)

ऐसैं दिन काहू जिनि बीतौ ।
जैसैं पिउ—बिनु मोहि जाति है जग लागतु सब रीतौ ॥
भावी—बस निकसनि नहिं पावत प्रान हमारे रहै पी तौ ।
'परमानंद' जीव जो जातौ होतौ नेह सही तौ ॥

१. रहे जु रहे जाहि गृह (ग.)

१०३०

(सारंग)

हरि मो सौ गमन^१ बात कही ।
 मन गहर उत तें नहिं आवत हौं सुनि सोच रही ॥
 आजु सखी सपनों मैं देख्यौ विरह बेलि उलही ।
 जेइ-जेइ बचन कहे हरि मोसौं तेइ-तेइ भए सही ॥
 और सखी ! सपने में देख्यौ सागर-मैंड ढही ।
 'परमानंद' स्वामी के बिछुरें दुख मनु जात बही ॥ •

१०३१

(सारंग)

हरि कौ मिलनु भयो अब दूरि ।
 स्याम-मनोहर कहाँ पाइये सब आनंद की मूरि ।
 जब-जब सुरति संग की आवै नैन लिए जल पूरि ।
 वा मूरति^२ कौ दरसन नाहिन रही बिसूरि-बिसूरि ॥
 कछु हू सेवा भई न मो पै हौं चरननि की धूरि ।
 वह सनेह अब क्यों बिसरतु है जब बाँधत लट-जूरि ॥
 तौ भेटिये नंद के नंदन भाग्य होंहि जो भूरि ।
 'परमानंद' बिरह भयो बैरी तिहिं डारी कटि चूरि ॥

१०३२

(सारंग)

सखी री ! कहि धौ गोपाल कब आवै ।
 बहुत दिवस के प्यासे लोचन अमृत प्याइ जिवावै ॥
 नटवर-भेष धरें या ब्रज में मुरली-सब्द सुनावै ।
 मोरमुकुट गुंजा-मनि^३-माला रचि-रुचि^४ रास बनावै ॥
 कब गिरि चढि पीतांबर फेरै धौरी धेनु बुलावै ।
 'परमानंददास' कौ ठाकुर ब्रज-जुवती-मन भावै ॥

१०३३

(सारंग)

वे देखियतु मधुवन^५ के रूख री !
 तिनि^६ में स्याम हमारे प्रीतम
 जिननि हरी मेरी नींद-भूख री ॥

१. चलन (ग.)

• पद संख्या ३५८३ पर सूरसागर में भी पाठ परिवर्तन से

२. काम-रत (ड. छ.), ३. बन (ड.), ४. रचि (ड.)

५. हमारे मधुवन (ड. छ.), ६. वा वन के स्वामी (ड. छ. ग.)

कहा करों कछु कहत न आवै
 दरसन-बिनु लागत अति दूख री ।
 'परमानंद' स्वामी के बिछुरें
 बिरह कोल्हू भयौ तन मेरौ ऊख री ॥

१०३४

(देवगंधार)

सखी री ! कित ही है वह गाउँ ।
 जहाँ बसत ब्रजराज-लाडिलौ मथुरा मोहन नाउँ ॥
 कालिंदी के कूल बसति है । परम मनोहर ठाऊँ ।
 मो तन पंख होहिं सुनि सजनी ! अब ही उठि उडि जाऊँ ॥
 होनों होई सो होऊ किनि अब ही हौं इहाँ अन्न न खाऊँ ।
 'परमानंद' प्रभु कबहूँ न छाँड़ों अबकै पकरनि पाऊँ ॥

१०३५

(मारू)

कहाँ री ! साँवरौ पाइये खेलिये मिलि साथ ।
 देखि सरद कौ चंद्रमा मीँडति सब हाथ ॥
 हम अबला जोबन-भरी भई कान्हहिं जोग ।
 हमें तजि हरि मथुरा गए कुबजा सौं भोग ॥
 जैसी रितु तैसी निसा कैसें बन चैन ।
 कैसें मुकुलित हैं द्रुम लता हुलसत मन मैन ॥
 बिरह बिकल ब्रज-भामिनी सोचति पछिताइ ।
 'परमानंद' प्रभु-मिलन कौ कछु करहु उपाइ ॥

१०३६

(गौरी)

किये माई ! बारू के से घरुबा ।
 गए उदारि-पुदारि खेलि-मिलि मोहन नंद-दुलरुवा ॥
 ते दिन बिसरि गए मनमोहन जब डारे दधि-चरुवा ।
 'परमानंद' स्वामी के बिछुरें सूकनि लागे तरुवा ॥

१०३७

(आसावरी)

हमारे अंतर की बिरह पीर कैसे हूँ न जाई ।
 गोविंद-गुन-स्रवन-कथन प्रान रहे माई !
 भवन-काज कुटुंब-लाज जा पर बिसराए ।
 गोकुल-पति तजि गए सु अजहूँ न आए ॥

तजों देइ इहि सनेह आगें सचु नाही ।
 बहुरि आस हरि—बिलास वृंदावन माहीं ॥
 'परमानंद' स्वामी गोपाल जन कौ दुख जानें ।
 पूरब—हेतु सखी ! चेति मिले ही रति मानें ॥

१०३८

(आसावरी)

मेरो मन गोविंद सौं मान्यौं ता तैं और न जिय भावै ।
 जागत सोवत इहै उतकंठा कोउ ब्रजनाथ मिलावै ॥
 बाढी प्रीति आनि उर—अंतर चरन—कमल चितु दीनौं ।
 कृष्ण—बिरह गोकुल की गोपी घर ही में बन कीनौं ॥
 छाँडे अहार—विहार देह—सुख और न चाली कारु ।
 'परमानंद' बसत हैं घर में जैसे रहत बटाऊ ॥

१०३९

(सारंग)

हमारें माई ! इहै बहुत जो बात चलावै ।
 राज—काज में स्याम—मनोहर कृपा करैं तो निकट बुलावैं ॥
 जादौपति वसुदेव कौ नंदन अब काहे कौं गोकुल आवै ।
 भए छत्रपति मधुवन—बासी अब काहे कौं गाँइ चरावै ॥
 चूक परी सेवन नहीं पाए मन समुझत विरह—दुख पावै ।
 'परमानंददास' कौ ठाकुर जा कौ जसु^१ ब्रह्मादिक गावै ॥

१०४०

(मलार)

नंद कौ लाडिलौ लला ।

कब देखौं कब मिलौं अंक भरि कंदर्प—कोटि—कला ॥
 सावन—मास दहै वह चातक नान्हें बूँद—झला ।
 ता प्रीतम—बिनु गनत न खूटहिं वासर—बरष—पला ॥
 कहा करौं मनु रहै न राख्यौ विरहा दियौ जला ।
 'परमानंददास' इहि औसर हरि—बिनु कौन भला ॥

१०४१

(सारंग)

कब लगि मन करौं हौं गाढौ ।

स्याम—मनोहर दिन—प्रति देखौं अपने आँगन ठाढौ ॥
 सपने माँझ दिखाई दीनौ दोऊ हाथ पसास्यौ ।
 जागी रैनि बहुत दुख उपज्यौ सिर धरनी गहि मास्यौ ॥

सोइ जु घरी भली प्रीतम सौं इतनौ सुख बहुतेरौ ।
‘परमानंद’ स्वामी कबहिं मिलेंगे प्रान—जीवन—धन मेरौ ॥

१०४२

(गौरी)

लरिकाई लौं रोई देत हैं जैसे इहाँ देते ।
पाछे तैं मेरे माट कौ गो—रस हरि लेते ॥
दुरि—दुरा कौ खेलिबौ बन—महियाँ ।
बाल—दसा लपटाइ कै गहते^१ मेरी बहियाँ ॥
वे बातें जब सुरति करी लोचन भरि आए ।
‘परमानंद’ प्रभु प्रीति कै हरि भए पराए ॥

१०४३

(गौरी)

मदनगोपाल हमारे उनकें किहि लखे में पारे ॥
तब वह प्रीति-मिलनि बन मँह की प्राननि किए न न्यारे ।
स्याम—मनोहर आय बैठते रुचिर तलप पर पारे ॥
बछ उबेरि खेलिबे के मिसि चलत सवार—सवारे ।
तब ऐसी करि हमारे हित कौ संखचूड से मारे ॥
तुम ठाकुर बनिता तहाँ केती हम गुन—ग्राम बिचारे ।
‘परमानंद’ प्रभु तिनि की कहावति जनम नाथ-हित हारे ॥

१०४४

(सारंग)

कहाँ तैं आए हौ द्विज—राज !
साँचु कहौ तुम कहाँ जाहुगे कहाँ बसौगे आज ॥
हम तौ थकित अस्त—उदयाकर रहे तलप इहाँ साज ।
इहि बट बसत जु कारौ भोगी कहत तिहारे काज ॥
गोकुल जाउ सँकेत सबनि सौं जाइ कहौ हरि ! लाज ।
‘परमानंद’ बछ डरत हमारे तुष्णि विप्र ! लेहु नाज ॥

24. भ्रमर-गीत

१०४५

(सारंग)

आजु कछु नीकी बात सुनावै ।
भुज फरकत कंचुकी—बँद तरकत नंदनँदन घर आवै ॥